



حِكْمَاتٌ بِجَمَلِ الْعِلْمِ
جَمَالُ الْحَفْنِيِّ

مقدمة

في هذا العالم الذي تحكمه القوانين العلمية والمنطق الصارم، هناك زوايا معتممة لم يصلها نور التفسير بعد... زوايا تختبئ فيها الحكايات التي يجهلها العلم

هل سبق لك أن سمعت صوتًا هامسًا في أذنك وأنت وحدك؟ هل شعرت يومًا بأن هناك من يراقبك رغم فراغ المكان؟ ماذا عن تلك القصص التي تتناقلها الألسن همسًا، والتي يقسم أصحابها أنها حدثت بالفعل، لكن لا برهان عليها سوى الخوف في أعينهم؟

في هذه الصفحات، لن تجد تفسيرًا علميًا يريح عقلك... بل ستجد قصصًا تقف على الحدود الفاصلة بين الواقع والكابوس، بين العقل والجنون، بين الحقيقة والخيال. ادخل، ولكن كن حذرًا، فقد تجد نفسك وجهًا لوجه مع ما لم يكن ينبغي لك أن تعرفه.

مرحبًا بك في عالم "حكايات يجهلها العلم"... حيث لا إجابة، بل المزيد من الأسئلة

إلى والدي الحبيب،

إليك يا من كنت دائماً صخرتي التي أستند إليها، ونوري الذي يرشدني في عتمة الأيام. يا من علمتني أن القوة ليست في الجسد وحده، بل في القلب والعقل معاً. يا من منحني الحب دون شرط، والدعم دون تردد، والإيمان دون قيد.

كل حرف في هذه الصفحات هو امتداد لما غرسته في داخلي من شغف وعزيمة، وكل قصة هي صدى لصوتك الذي طالما شجعني على المضي قدماً. هذه الحكايات ليست مجرد كلمات، بل هي عربون امتنان لوجودك في حياتي، ولفضلك الذي لا يُرد.

أميرة والجن

"قصة حقيقية"

أنا عندي 37 سنة وفيه جن عايش معايا من وقت ما كان عندي 9 سنين, ممكن المواقف اللي هحكياها الكوا يكون صعب تصديقا لكني عشتها وعشت كل لحظة منها بخلوها ومرها, برعبها وطمأنينتها, في أوقات كتير كان بيحميني من مخاطر وكوارث كنت هقع فيها, هحكياها من البداية خالص وحابة أعرف رأيكوا

أنا من مواليد محافظة سوهاج وكنت عايشة في قرية صغيرة جنب الجبل تعداد سكانها قليل, عشان محدش بيحب يسكن في القرى المحدوفة البعيدة عن الخدمات والمواصلات

ومن حظي اللي مش عارفة إذا كان وحش ولا لا إن معنديش اخوات بنات, كل اخواتي صبيان, يعني مفيش بنت أقعد أو ألعب معاها في طفولتي, الصبيان ليهم ألعاب لوحدهم صعب ألعبها معاهام وبيرفضوا أصلا يلاعبوني, وأمي طول اليوم يا إما مشغولة بمهام البيت يا إما قاعدة مع قريبتها مرات عمي اللي بتقضي معظم الوقت معاها, يعني الظروف خلتنني وحيدة, غير اجتماعية, الكلام دا وأنا عندي 9 سنين

كنت بصحى من النوم ألاقى نفسي وحدي, خايفة, محدش معايا, ودايما بحس إنني مش لوحدي, فيه حد في الدولاب, أو واقف في ركن الأوضة, أو تحت السرير, نفس الأفكار اللي جات للأطفال كلهم في السن دا, ولإن الإضاءة وقتها مكانت بنفس القوة حاليا فكانت معظم أركان البيت ضلمة عشان كل مكان فيه لمبة واحدة متعلقة في النص والأركان مبيوصلهاش أي

إضاءة, فكنت أقوم أتأكد إن مفيش حد في الأركان دي وأحط إيدي عشان أتأكد أكثر, أو أفتح الدولاب وامشي إيدي جواه عشان أتأكد برضو, وحاجات طفولية كثير من دي

الخوف بدأ يزيد معايا, وطول مانا لوحدي بكون خايفة, والموضوع بدأ ياخذ منحني تاني, سخونية بقي وهلاوس, وأول موقف حصل معايا وأنا سخنة وبهلوس وأمي قاعدة جمبي ساعتها قرئت سورة يوسف كاملة وبالتجويد, ولما صحيت من النوم أمي سألتني إنتي حفظتي.. السورة دي امتي وإزاي؟ بس أنا مكنتش فاكرة أي حاجة

الجبل ورا بيتنا على طول, يعني بمجرد ما أخرج من الباب الخلفي الصغير للبيت بيكون " الجبل في وشي وبعد شوية مشي قليلين ببداً منحدر الصعود للجبل, في يوم خرجت أتمشى لحد نقطة معينة وارجع تاني كالعادة ولأول مرة ألقى مغارة أول مرة أشوفها, باينة من بعيد إنها مغارة, الفضول خلاني أتمشى ناحيتها أعرف جواها إيه, وفي نص المسافة لقيت واحد ظهرلي وبيشاورلي بيحذرنني إني أبعد عن المغارة بس أنا مهتميتش وفضلت ماشية ناحية المغارة لحد ما بقيت قصادها, خفت أدخل فيها فببص حواليا لقيت بيوت القرية بعيدة جدا وجمب المغارة لقيت مبنى صغير له باب حديد جديد بيلمع ومفتوح, دخلت دماغي من الباب أبص شمال ويمين عشان أعرف إيه المكان دا لقيت باب خرجوا منه 4 دكاترة بالبالتوهات البيضة وكل اثنين منهم ماسكين سرير متحرك عليه جثة في كفنها مطلعينها من التلاجة, المرعب إن الجتتين صاحيين وبيصرخوا إن الدكاترة دول ملائكة العذاب مش الرحمة, بعدين لقيت دكتورين تانيين مخرجين طفل يبصرخ من الألم والرعب وبيبص عليا عشان أنقذه منهم, جريت عليهم عشان أقولهم دا عايش سيبوه لكن محدش فيهم كان شايفني ولا سامعني ولما حاولت أمسك واحد فيهم من درعه مسكت الهوا كإنهم بشر حقيقين وأنا اللي جن أو عفريت, لحد ما الطفل مات وهو باصص عليا وحسيت بوجع قلب رهيب ساعتها, وفي وسط خوفي وحزني ورعبي لقيت إيد مسكتني وبتشدني تخرجني بره المكان, بصيت عليه عشان أشكيله من اللي شوفته وأطلب منه مساعدة الناس اللي جوه لقيته نفس الشخص اللي كان بيشاورلي إني مدخلش المغارة, حكيتله عن اللي شوفته لكن ملامح وشه متغيرتش وقالي بنظرة جامدة كدا لسه هنتشوفي من دا كثير ولما حس إني مش قادرة أمشي راح شالني بين إيديه ومشي بيا كام خطوة بعديها لقيت نفسي ببعد عن الأرض وهو ظهرله جناحين بيطير بيهم لحد ما وصلني لسطح بيتنا وقالي بابتسامه كدا متبعديش عن بيتك تاني, الغريبة إن بعد دا كله صحيت لقيت نفسي نائمة على سطح بيتنا مع إن لو كان دا كله حلم كان المفروض أكون نائمة في أوضتي

مش السطح, فانا مش عارفة إذا كان دا حلم ولا حقيقة ودا أول موقف من عشرات المواقف
..اللي حصلت معايا

الجن اللي أنقذني في المرة الأولى بدأت أشوفه أكثر من مرة, أحيانا في الحقيقة وأحيانا في الأحلام. وتاني مرة شوفته فيها كان في مندره بينما (مكان للضيافة في الصعيد) كنا واقفين أنا وهو ولما حبيت أتعرف عليه ولما سألته أنت مين؟ هو افكر إنني نسيت ونسيت اللي عمله معايا راح بصلي بعتاب وزعل واختفى

حكيت لأمي لكن كانت بتقولي إنها مجرد أحلام ومكانتش بتصدقني لأنني وقتها كنت طفلة عندها تسع سنين, بس اللي بدأ يؤكد كلامي هو أخويا الصغير اللي كان بيثوف ناس غريبة في البيت ولما يحاول يلمسهم كانت إيده تمسك الهواء, لحد ما في مرة حصل موقف خطير

كنت نايمه في أوضتي والشاب دا ظهرلي في الحلم قالي (اصحي) بنبرة صوت عالية ولما صحيت لقيته واقف جنب سريري في الحقيقة وبيشاوري ناحية الباب وقال (أخوكي)

نطيت من فوق السرير وجريت للأوضة اللي نايم فيها أخويا الصغير لقيت تعبان أسود ضخم ملفوف على جسمه, التعبان لونه أسود ومنقوش على جسمه رموز وخطوط غريبة باللون الأصفر الذهبي, اتسمرت مكاني من الصدمة والخوف ومكنتش عارفة هل أصرخ عشان حد من أهلي يبجي وينقذ أخويا ولا أحاول أنقذه أنا وأواجه التعبان

وبعد ثواني من التردد قررت أنقذه أنا حتى لو فيها موتي, وقتها التعبان بص في وشي بصة كلها تحدي, كانت نظرة إنسان لإنسان مش مجرد تعبان, ولما قرا أفكارني وحس بقراري راح فك جسمه عن جسم أخويا وخرج من فتحة السقف اللي كانت (جريد النخل) جريت أخويا الصغير أظمن عليه لقيته نايم وبيتنفس عادي وطبيعي ومحسش بأي حاجه من اللي حصلت, بعدها صحيت من النوم تاني ومعرفش إذا كان دا حلم ولا حقيقة, وأول حاجه عملتها إنني رحت اطمنت على أخويا وصحيت غصب عنه ونزلته لأمي وحكيته اللي حصل لكن مصدقتنيش

وقالتلي إن الفتحة اللي في السقف دي صغيرة وفيها (عش للطير) ومستحيل تعبان بالحجم دا يدخل فيها أو يخرج منها ولو كان تعبان حقيقي كان زمانه قتلنا كلنا

لما بقى عندي 14 سنة حصل معايا موقف تاني لا يمكن أنساه, مرات عمي اللي ساكنه معنا في بيت العائلة ابنا كان متخانق مع عائلة العمدة والقتل عندنا كان سهل جدا, وفي يوم خرج من البيت ومرجعش ومكانش فيه تليفونات محمولة زي دلوقتي والساعة 2 بالليل سمعتها بتخبط على أوضة أبويا وأمي وهي بتصرخ وتقول الحقوا ابني قتلوه وغدروا بيه, البيت كله اتشقلب وحصل هرج ومرج والجيران صحبوا, والكل خرج من البيت حتى اخواتي الصبيان اللي مكانوش كبار وقتها, راحوا يدوروا على ابن عمي اللي اتوقعوا انه اتقتل واترمى وسط الأرض الزراعية, كلهم خرجوا ولما حببت أخرج معاهم أبويا زعقلي وقال لي خليك انتي في البيت عشان مينفعش أخرج في الوقت دا, كنت وقتها وصلت لعتبة البيت لما كنت وراهم وبعد كلام أبويا معرفتش أعمل إيه, هل أدخل البيت تاني ولا أخرج معاهم! أكيد لهفة أبويا وخوفه على ابن أخوه هينسوه إني عصيت كلامه وخرجت, خصوصا إن مرات عمي ومرات خالي وأمي كلهم خرجوا عادي, فقررت أخرج أنا كمان وراهم لإني بخاف أقعد في البيت لوحدي زي ما قولتلكوا قبل كدا, وبمجرد ما اتخذت القرار ونويت أخطي أول خطوة بره البيت سمعت في السما صرخة عالية ولما بصيت لقيت طائر ضخم هجم عليا وقبل ما اتحرك من مكاني كان ضاربني في راسي ووقعت وأغمى عليا, ولما صحيت من النوم قعدت أعيط وأصرخ وأعاتب أمي إنها سابتنني وحدي في وقت زي دا وحكيته اللي حصل, راحت قالتلي إزاي. يعني دا احنا لما رجعنا من بره لقيناكي نائمة في أوضتك عادي

الجن اللي ملازمني ويحمني دا بدأ يظهرلي في الحقيقة على هيئة صبي في نفس عمري, 14 سنة تقريبا, كنت لما أخرج أقعد قدام البيت فيه شجرتين كدا شابكين في بعض من تحت على هيئة رقم سبعة, لما شوفته لأول مرة ارتحتله ولقيت نفسي بسأله انت منين وجيت هنا إزاي لإن بيتنا يعتبر آخر بيوت القرية قريب من الجبل, قالي إنه من عائلة اسمها عائلة البسيوني, وأبوه كان ساكن في المدينة ورجع القرية من تاني, شكله كان عادي ولا بس جلابية بس عينيه كانت كلها ذكاء ونظراته كانت نظرات راجل كبير, كنت بكون قاعدة على الشجرة وهو بيتكلم

ويلف حوالين الشجرتين ويقول علي نصايح وناس يحذرنني مني, حتى البنات اللي معايا في المدرسة كان عارفهم وبيكلمني عنهم, كنت بسمعله ومش بشبع من كلامه أبدا, لحد ما كنت كل يوم بستناه في نفس المكان عشان أقعد معاه واسمع منه الكلام اللي بيتضحلي بعدين إن كله صح.

بدأت بعدها تطلع إشاعات عليا في البلد, أني مجنونة, وبيتهيلني حاجات, وبكلم ناس مش موجودين, وانتوا عارفين طبعا القرى, نقل الكلام فيها بين الناس أسرع من المحطات الإذاعية, والصبيان والبنات اللي في سني بدؤوا يقولوا عليا إني متكبرة ومغرورة عشان معنديش صاحبات بنات وعشان أنا حلوة برضو ممكن يكونوا بيغيروا مني, الله أعلم

بعدها عرفت إن مفيش أصلا عائلة بالاسم دا في قريتنا ومفيش حد بمواصفات الولد اللي كان بييجي يقعد معايا ويحكلي

بعدها كبرت وبدؤوا العرسان يتقدمولي وأنا أرفض لحد ما اتقدملي ابن عمي, ورفضته, كنت شايفاه عايش معايا على طول ومتربيين مع بعض وزى أخويا يعني, مكنتش متقبلة إنه يكون زوجي, وأمي لما قعدت معايا وحاولت تقنعني وتذكرلي محاسن عمي ومراته وابنهم وتربيته, قولتلها إني بحب عمي جدا ومرات عمي بعترها أمي الثانية بس مش متقبلة الموضوع نهائي. وقلناه بعد كدا

شغل أبويا بقى في المدينة وقرر بدل ما يروح وييجي إنه ينقلنا معاه هناك, من ناحية نكون قريبين من بعض ومن ناحية إننا نغير جو القرية وننفتح على الناس شوية, أنا كمان شوفت شغل في محل أسلي بيه وقتي, وفي يوم من الأيام اتأخرت في المحل دا بسبب ضغط الشغل. واتأخرت ساعة ونص عن الميعاد اللي يرجع فيه كل يوم

اليوم دا حصل معايا موقف بيحصل في الافلام بس, ويعتبر من أغرب المواقف اللي مش هنسأها طول حياتي

المواصلات مكانتش شغاله دايمًا والوقت اللي انا اتأخرت فيه دا كانت السواقين تخاف توقف لحد بيشاورلها, لأنه يا إما هيكون اللي بيشاور عفريت يا إما من قطاعين الطرق, وفضلت واقفه نص ساعة معدوش فيها غير ميكروباصين بس ومرضيوش يوقفولي قررت أستغل الوقت واتمشى والميكروباص اللي يعدي أشاورله, منها أكون قللت المسافة ومنها أمشي رجلي.

لحد ما في منطقة معينة كدا فيها دوران كنت ماشيه فيها وشوفت ميكروباص جاي من بعيد وبيلف, شاورتله ومش عارفه السواق شكله اتفاجئ بيا في المكان دا وخاف مني راح واخذ الدوران بسرعة عشان يهرب مني وبدون قصد خبطني بالمرآة بتاعة العربية وقعت على الأرض وهو كمل جري

قبل ما اقع على الأرض حسيت فيه هوا مسكني أو خفف من قوة الضربة أو الوقعة مش عارفة لكن حسيت بدا فعلا وصحيت على لمسات حد بيلحس وشي, فوقت مفزوعة لقيت كلب واقف جمبي وبيلحس راسي وخدي, الموقف والمكان خلوني اترعبت وخصوصا إني عقلي لسه مستوعبش إني عملت حادثة, لكن لما افكرت هديت شوية ورجعت خوفت من ثاني بسبب الكلب اللي قاعد جمبي وباصص عليا

قمت نفضت هدومي وعدلتها, وكملت مشي وأنا كل شويه أبص ورايا على الكلب اللي ماشي ورايا دا, كل ما ابصله واوقف يروح يقف ويبص عليا, بيتمشى ورايا بمسافة متر أو مترين, وبقينا على الحالة دي ربع ساعة أو أكثر لحد ما شوفت نور جاي من ورايا وبسبب الشارع اللي كان ضلمة معرفتش اللي جاي دا ميكروباص ولا ملاكي ولا إيه بس كان كثاف واحد وطلع موتسيكل فنزلت إيدي بعد ما خد باله إني بشاورله, قلل السرعة لحد ما عدى من جمبي وكان عليه شابين, اللي من ورا لما بص عليا ولقاني وحدي ضرب كتف اللي بيسوق وقاله. حاجه راح وقف الموتسيكل ورجعولي, ونواياهم من نظراتهم مكانتش كويسه أبدا

الشاب اللي كان راكب من ورا نزل وقرب مني وببيصلي بصة كلها طمع وسألني انتي لوحدك؟

اللحظة كانت صعبة جدا ومن الخوف رجليا ولساني اتربطوا وجسمي كله اتنفض ومكنتش عارفه أقوله إيه ولا اتصرف إزاي, اتقدم خطوة ثاني وهو بيسألني اسمك إيه؟

وفي اللحظة دي الكلب ظهر من ورايا وبقى قدامي ووقف قصاد الشاب دا وزام عليه بغضب مسمعتوش من كلب قبل كدا, ووقت يريل من بقه مياه زي مياة النار وعنيه اتلونت, الشاب رجع خطوتين وهو يبيلق في الكلب وبيقول لصاحبه شغل بسرعة دا شكله مفترس, ونط ورا صاحبه وجريوا بالموتسيكل

الكلب بعد رجع لشكله وحالته الطبيعيين ورجع وقف ورايا مستنيني أكمل مشي, أنا حسيت بالأمان مع الكلب أكثر من أي إنسان ممكن يوصلني في اليوم دا والشوارع دي, وفضلنا ماشيين لحد ما وصلت الشارع اللي فيه بيتنا وبمجرد ما دخلت الشارع وقف وراح يتابعني

بعنيه لحد ما وصلت قبل البيت بكام متر وأنا كل ما أبص ورايا لأقيه واقف مكانه متابعتي
لحد ما وقفت قدام باب البيت وبصيت عليه بصه أخيرة لقيته اختفى

اتقدملي أكثر من عريس بعد ما نقلنا للمدينة وأنا كنت برفض وأهلي مش عارفين سبب
الرفض, أنا نفسي مكنتش عارفة برفض ليه

مع إنني كبرت خلاص وكل اللي في نفس عمري بيتجوزوا عادي لكني كنت برفض

أبويا وأمي مكانوش بيضغطوا عليا, آخرهم كانوا بيحاولوا يقنعوني بالحاح لكن أخويا الكبير
هو اللي ضغط عليا وخنقني وكان هيموتني لإن الموضوع وصل عنده للشك. وقالي أول
عريس هيجي يتقدم ويكون ابن ناس ومناسب هتجوزيه وقد كان

يوم جوازي طبعا مكانش يوم عادي, اتجوزت في الشتا وفي اليوم دا بالذات المطر نزل وكان
شديد لدرجة إننا لما وصلنا للأستوديو عشان صور الفرحة معرفناش ننزل من المطر اللي
غرق الشوارع بالطين

كل حاجه اتلغت حتى قاعة الأفراح مرحتهاش, كنت ببكي من جوايا عشان عايزه أفرح زي
أي بنت لكن مكنتش ببين زعلي قدام جوزي عشان ميز علش أكثر ماهو زعلان

أول أسبوعين من الفرحة كانوا عاديين خالص ومحصلش فيهم أي مواقف غريبة, لكن في يوم
وأنا قاعدة مستنيه جوزي حوالي الساعة 11 بالليل كنت بتفرج على التلفزيون بره على الكنبه
وخلصت المسلسل وقررت أنام لحد ما جوزي يرجع يصحيني أحضرله العشا وقبل ما عنيا
تغمض وأنام إلا وسمعت صوت شئ بيوقع في المطبخ وأطباق وكبايات بتتكسر, وبمجرد ما
قررت أقوم أشوف فيه إيه ويادب قعدت وخالص هقف وفجأة حاجه اترمت عليا. زي ما يكون
وقعت عليا حيطه بس مش شايفها

حسيت بحاجه مكثفه جسمي ومكلبشاه كدا وبقيت نايمة على الكنبه على ضهري وجسمي
متثبت مش عارفه أحركه, فيه شئ قاعد فوقي ودائس بإيده على خدي ودائس عليه بكل قوته,
مكنتش عارفه أبص كويس أشوف إيه الشئ دا لكن شوفت إيده, كانت كلها شعر وضوافرها
طويلة وريحتها وحشه جدا جدا, حاولت أرفع طرف عيني أكثر عشان أشوف إيه الشئ دا
وياريتني ما شوفته, لمحت شكله, كان شبه الغوريلا بشعر كثيف عليه تراب, بدأ يتكلم

ويصرح بصوت مش مفهوم, سمعته بيقولي "ليه كدا؟ اتجوزتي ليه؟ فاكرة إنك هتبعدي عني؟
". أو حد هيقدر يمنعك مني؟ مستحيل

كنت ببكي بعد ما شوفت منظره, عنيا كانت بتنزّل دموع وحدها من الخوف والرعب وقلة
الحيلة, مصدقتش إن هو دا اللي كان بيحميني ويخاف عليا وأنقذني كذا مرة قبل كدا, طب هو
كان فاكروني هفضل كدا على طول من غير جواز! ولو كان هيتجوزني هل كان هينفع ولا لا
!وإزاي

بدأت استجمع نفسي وقرّيت آية الكرسي فيه سري والمعوذات لحدا ما التقلّ اللي كاتم عليا بدأ
يخف و قدرت أقوم وأنا مرعوبة, مشيت بالعافية ناحية المطبخ لقيت المطبّيقية واقعة والأطباق
الصيني والكوبايات متكسرين في أرضية المطبخ كلها, قررت أهرب من البيت وأنا ببص
حواليا كل ثانية, خايفة يظهرلي تاني, لبست أي حاجة جات في وشي ولفيت الطرحة بسرعة
من غير ما أقفلها وخرجت جري من الباب وسبته مفتوح ونزلت جري على بيت خالي اللي
كان قريب من بيت جوزي, وبالصدفة لقيت أمي هناك واتخضت هي ومرات خالي لما شافوني
كدا ولما حكيتلهم الحكاية بصوا لبعض ومصدقونيش وقالولي يمكن كنتي بتحلّمي بكابوس, مش
عارفة ليه حتى بعد ما كبرت محدش برضو بيصدقني

قررت محكّيش لجوزي, خفت يفتكرني مجنونة ولا ملبوسه وكمان هو شخص جديد وغريب
عليا أو أنا دماغي فاكروه كدا

ظروف شغل جوزي كانت بتخليه طول اليوم بره, كنت بشغل الراديو على إذاعة القرآن
الكريم وبعد دقائق الأقي الإذاعة اتغيرت لإذاعة الأغاني, ولما أرجعها للقرآن تروح ترجع
للأغاني من نفسها, فكنت بقفل الراديو

بعد كا النور بدأ يقطع كثير, كانت أيام الثورة, وكنت بشوف كوابيس عجيبة, خاصة الكابوس
اللي كنت بشوف نفسي في مكان غريب زي الصحرا, فيه ناس غريبة بنتكلم لغة غريبة, لبسهم
عجيب وطريقة مشيهم أعجب, وكل واحد فيهم كان يشوفني أو يعدي من جمبي كان بينحنيلي
باحترام

الصحرا اللي كنت بشوفها في أحلامي تقريبا كانت مكان الجن, طول عمري بسمع إنهم
بيعيشوا في الصحاري أو في الوديان أو فوق المياه أو تحتها, أنا استنتجت كدا من عقلي

وممكن يكون صح وممكن يكون غلط, خاصة إن الناس اللي بشوفها هناك كانت غريبة من حيث أطوالهم ومقاساتهم, وطريقة لبسهم كانت شبه الأفلام اللي بنشوفها بتحكي عن قريش والإسلام لما ظهر في بدايته

الجو بيكون حر جدا وكنت شخص من بعيد قاعد في خيمة على الكرسي بتاعه وبيتابعني باهتمام وهو بيبتسم, وعلى الرغم من إنه بعيد جدا لكني بكون شايفه عنيه وابتسامته, ولما جوزي بيجي وأصحى من الحلم دا بلاقي نفسي كإني كنت في عالم وانتقلت لعالم ثاني, مش إحساس حد كان نايم, لأنه مهما نمت بصحى تعبانه كإني كنت صاحبة وبحتاج أنام ثاني

حياتي بقت معظمها نوم وخمول, يادوب أصحى أرتب الشقة وأحضر الأكل وأكل وأنام ثاني, وجوزي اللي كان في الشغل طول اليوم محسش بالاختلاف اللي ظهر عليا, 3 سنين ونص من غير خلفه وعلى الحال دا, طول الوقت بكون حاسه إنني متخدره أو حد مديني بنج, حتى لو حد من بيت جدي اللي ساكنين جمبنا جي يزورنا يادوب يقعد ربع ساعة بالكثير ويمشي ثاني لما يشوفني نعسانة وكل شوية بتاوب, مكنتش بخرج أروحهم لإن جوزي بيجير عليا ومانعني من النزول وأي حد علوز يشوفني كان بيجيلي الشقة, أخت جوزي وأختي وأخويا ومرات خالي وغيرهم

وفي مرة أختي جات تقعد معايا شويه وكنا بنتفرج على التلفزيون وهي من النوع الخواف, التلفزيون فجأة صوته بقى عالي فجأة بعدين رجع واطي ثاني, بصلتي وقاتلي اوعي تكوني بتعملي فيا مقلب أنا بخاف, ابتسمتلها ومقولتلهاش حاجه, بعدين فجأة التلفزيون صوته علي وفضل كام ثانية عالي ولما أختي مسكت الريموت عشان توطيه راح الصوت رجع زي ما كان, اختي نطت من على الكنبه وأنا قومت شيلت فيشة التلفزيون واختي اتصلت بأخويا بيجي ياخذها وخافت تزورني ثاني

وقتها أنا خوفت لما أخويا جي خد أختي وسابوني في الشقة لوحدي, كنت حاسة إن فيه حاجه هتصلي, ساعات بحس بيهم قبل ما يظهروا, فجأة وانا واقفة جمب الباب اللي قفلته بعد ما أختي مشت لقيت التلفزيون اشتغل وبصوت عالي جدا بصيت عليه والفيشه كانت متشاله, ضربات قلبي زادت ورجليا تقلت مبقتش عارفة أحركها, ومش عارف هل أجري بره الشقة باللبس بتاعي دا والناس هتقول عليا إيه, وبين حيرتي وخوفي ببص على الطرقة اللي فيها أوضة النوم لقيت ضل أسود خرج منها بسرعة وجاي يجري ناحيتي وفي ثانية بقى قدامي, ضل ملوش ملامح غير إيدين طوال ورجل قصيرة, وشكل مستطيل كدا, مسكني من رقبتي وخنقتي وراح يزوم بصوت مخيف كأنه حيوان مفترس, فجأة فتح بقه قربه من وشي وبقه كان

بيكبر بالتدريج في كل سنتي يقربه من وشي, مبعثش قادرة أتنفس وحسيت إني خلاص هموت وفي لحظاتي الأخيرة وقولت في نفسي يارب يكون دا كابوس من الكوابيس بتاعتي, يارب أكون بحلم, وفجأة خرج من أوضتي الشاب اللي كنت بشوفه قاعد على كرسي في الحلم واللي أنقذني من المغارة اللي كنت جمبها, كان عريان خالص, جري على الشئ الأسود دا ومسكه من رقبته وشده لورا بعيد عني ومسكوا الاتنين في بعض وهما بيصرخوا بكلام مش فاهماه لحد ما الشاب دا قدر يبعد الضل دا عني ورماه في الحيطه اختفى

الشاب قرب مني وهو لسه عريان وباين من عنيه إنه عايز يطمئن عليا, كان واضح الخوف والحنية مرسومين على ملامحه, وبمجرد ما قرب مني وقبل ما يوصل عندي بص على الباب واختفى, بعد ما اختفى بثانية الباب اتفتح وجوزي دخل لقاني مرميه على الأرض, اتخض من المنظر وحاول يفوقني ويكلمني, أنا كنت فايقه ومفتحه عيني بس الموقف ربط لساني وخلاني معرفتش أتكلم ولا أقول حاجه

بعدها الأحلام بتاعتي بدأت تاخذ منحى تاني مينفعش أقوله, خصوصا مع الشاب اللي ظهرلي عريان دا, مكانش ينفع أحكيها حتى لجوزي, لكن المرعب هي الأيام اللي عشتها بعدين واللي خلت جوزي يشك فيا, تخيلوا بسبب الأحلام دي بطني اتنفخت بالتدريج كإني حامل, كنت بحس إن فيه حاجه بتتحرك في بطني, وبطني كبرت كإني في السادس أو السابع وجوزي مش لاقى تفسير لكل دا, خدني ورحنا للدكتورة يشوف دا حمل ولا إيه لكن كان مجرد انتفاخ, مع إن كل أعراض الحمل اللي كنت بسمع عنها كنت بحس بيها وبدأت أشوف في أحلامي إني أم ..لطفلين وماشية بيهم, طفل ماشي جمبي وماسكاه من إيده وطفل شايلاه على دراعي

قررت أحكي لجوزي اللي بيحصل معايا في الأحلام لإني كنت حاسه إني بخونه, قررت أقوله أخيرا بعد نوعية حلم معينة اكررت معايا كتير, كنت في البداية بشوف إن الشقة بتاعتي كلها ضباب كدا وفيه ناس بتمشي وتروح وتيجي فيها ومحدث شايفني, زي ما تكون شقتهم وأنا اللي غريبة فيها, وفجأة ألقى نفسي نزلت تحت الأرض بسرعة جدا وبقيت في مكان غريب أرضه كلها طوب أسود والناس بتجري هنا وهناك والشرطة أو الجيش بتجري وراهم وتقتل فيهم, وفي وسط المشهد دا شوفت واحدة جميلة جدا جدا, زي أفلام الكرتون كدا, شعر أصفر طويل وعيون زرقة, شبه الأميرات كدا, كانت بتبصلي بحقد وغل وبتبتسم بطرف شفايفها

وهي فرحانة باللي بيحصل فيا, حاولت أهرب وأجري زي الناس اللي بتجري خايفه من القتل, وكل الأبواب كانت بنتقفل في وشي لحد ما لحقت باب بيت كان مفتوح جريت عليه وهو بيتقفل واحدة واحدة وفجأة سمعت صوت حد من الجنود بينادينني وماسك سلاح في إيده وقرب مني والباب كان اتقفل, أنا استسلمت للموت وقلت خلاص دي لحظاتي الأخيرة, وبسرعة الباب اتفتح وإيد اتمدتلي شدتني وقفلت الباب بسرعة.

كان الشاب إياه اللي بينقذني في كل مرة, وكنت مستسلمة لفكرة إنه جوزي في الحلم, اتعلقت فيه وحضنته وأنا مخضوضه وراح يهديني ويطمني وخذني من إيدي وفضلنا نمشي في سرايب داخل البيت وننزل سلام لتحت الأرض لحد ما وصلنا للشقة اللي أنا عايشة فيها. دلوقتي ودا اللي أقنعني أكثر إنه جوزي وحصل تواصل كثير ما بينا في أحلام مختلفة.

لما حكيت لجوزي اتهمني باني أنا اللي وصلت نفسي للمرحلة دي مع إني مش عارفة أنا عملت إيه, أنا وافقت على كل حاجة اقترحها طول ثلاث سنين ونص بدون خلفه, روحنا لدكاترة وكلهم قالوا مفيش حد فينا فيه عيب يمنعه من الخلفه, لكن حتى جوزي اللي حكيتله اكتشفت إنه مش مؤمن بالعالم دا أصلا لا جن ولا عفاريت ولا شيوخ.

كان نفسي يصدقني ونلاقي حل مع اللي بيحصلني, أنا عاوزه أعيش حياة حقيقية مع شخص حقيقي, مش عايزه أعيش في الأحلام والخيالات مع إن من جوايا كنت حابه كدا, كان في الحلم بيفهمني أكثر من جوزي اللي طول الوقت مهمل من ناحيتي وغايب عني.

الخلاف بدأ يزيد بيني وبين جوزي, الأول كان يشوفني قايمه من النوم مفزوعة ودلوقتي بيسمعني وهو جمبي وأنا بتواصل مع الشاب دا في الحلم, وكان بيقولني نامي مستورة وغطي جسمك كله وكنت بعمل كدا في عز الحر لكن من غير فايده, لحد ما في يوم صحاني الصبح وهو بيزعق فيا ويقول خلاص هجيبلك شيخ دي بمفتش عيشه, وقام دخل الحمام وهو بييسب ويلعن الجن وبيقول أنا كان مالي أتجوز واحده ملبوسة, فجأة سمعت صوت خبط جامد في الحمام وقومت مفزوعة أطمئن عليه وحاولت أفتح الباب اللي رفض يتفتح في إيدي, بعدين سمعت صراخه زاد واتهدب على الأرض والصوت سكت والباب اتفتح لوحده بسهولة.

دخلت لقيته واقع على الأرض مغمى عليه, كلمت اخواته وجابوا دكاتره من غير فايده, أربع أيام وهو نايم على السرير وجسمه سخن وبيهدني بكلام مش مفهوم والعرق اللي في هدومه كنت بعصره ينزل مياه كإن الهدوم مغسولة.

كنت بشوف جوزي بيضيع مني واحدة واحدة, نمت ليلتها وأنا مخنوقة ومعيطة وهموم الدنيا كلها على كتافي, والصبح صحيت على صوت جوزي فايق وبيتكلم عادي, قومت من الفرحة عشان أتأكد إنني مش في حلم وفعلا كان صاحي وكويس كان محصلتلوش حاجه, سألته أنت كويس؟ السخونية راحت؟

قالي راحت امبارح بعد ما سهرتي جمبي عمليكي كمادات وانتي بتتشميني وبعدين روحتي المطبخ عملتيلي كوبايه حاجه دافيه معرفش إيه هي وشربتها ونمت وصحيت كويس, أنا عيني اتفتحت واتصدمت من اللي بيقوله لإنني معملتش ولا حاجه من دول إمبارح ولما شافني كدا. وطى صوته وقالي أنا عارف إنه مكانتش انتي.. وسكت

تاني يوم جوزي لقيته داخل عليا ومعاه شيخ, وقالي البسي عبايه وبطلون تحتها تحسبا لأي تشنجات ممكن تجيلك, قولتله تشنجات إيه أنا عمري ما حصلتلي تشنجات وأنا صحيا كويسة, وصوتنا بدأ يعلى لحد ما زعقت فيه لأول مره معرفش عملت كدا إزاي وفجأة اللمبة بتاعة اوضة النوم فرقعت, جوزي بمجرد ما فرقعت خرج يجري بره الأوضه, بعد ثواني ندمت وقررت إنني لازم أسمع كلامه عشان نشوف حل للي بيحصل دا وأرتاح, وفعلا لبست. وخرجت من الأوضة للطريقة اللي بتودي للصالة

الشيخ وجوزي كانوا قاعدين في مكان يخليهم يشوفوا اللي خارج من أوضة النوم وبمجرد ما خرجت لقيت الاتنين عندهم اتفتحت وخافوا جدا وهما باصين عليا بس مش عليا قوي, كأنهم باصين على حاجه ماشيه جمبي, فجأة الشيخ قام مفزوع ومد إيداه وهو بيشاور عليا وقالي خليك مكانك وحرك صباعه ناحية اللي جمبي وقعد يقول حد الله بيني وبينك حد الله بيني وبينك وخرج مفزوع من الشقة

الشيخ هرب من الشقة وهو بيشاورلي بصباغة وبيقول حد الله بيني وبينك, كررها كثير لحد ما خرج, وقفت أنا وجوزي باصين لبعض مش فاهمين حاجه, نظرات جوزي كمان كانت خايفه. وجري بره بسرعة وهو بيقول هشوف شيخ تاني ومجاش البيت غير بعدها بتلات أيام

خلال التلات أيام دول حصل معايا موقف مرعب لا يمكن أنساه, لأول مرة كنت هموت من الخوف في الحقيقة مش في الكوابيس زي ما كان بيحصل معايا

خالتي جات زارتني, استقبلتها وقعدنا وحكيانا وهزرنا كالعادة ورحت المطبخ عشان أعملها عصير, وخلال التحضير سمعت صوت حاجه اتهدبت في الصالة زي صوت باب أو دولا ب وقع على الأرض, سبت اللي ف إيدي وخرجت أشوف فيه إيه لقيت خالتي واقعة على الأرض في مدخل الحمام, نصها اللي من تحت جوه الحمام والنص الثاني في الصالة بره, حجمها اتغير, خالتي من النوع السمين شويه لكن وهي واقعة قدامي دلوقتي كانت أرفع بكتير بس مركزتش وافكرتها غيبوبة سكر لإن خالتي عندها السكر بس محصلهاش كدا قبل كدا, قربت منها بهدوء وحسيت بالخوف مش عارفه ليه وفجأة قبل ما أوصلها فتحت عينيها وبصتلي برعب وهي لسه ثابتة في مكانها, عنيتها بدأت تتحول للون الأسود بالتدريج وبدأت تخرج منهم دخان خفيف زي دخان السجارة كدا, المنظر دا كان كفيّل إنه يخلي جسمي يتنفّض, كل سنتي في جسمي انتفض وحسيت بقشعريرة وتنميل في رجليا اللي بقت ثقيلة مش قادرة أحركها, فجأة خالتي وقفت مرة واحدة بدون ما تستخدم إيديها كأنها آلة وبدأت تمشي ناحتي بالبطيء وعنيا مثبتاها في عيني وابتسامة مرسومة على شفايفها مبشوفهاش غير في أفلام الرعب

ضربات قلبي زادت وأنا بفكر هتعمل إيه لما توصلي, عاوزه أحرك رجلي أو إيدي أو أي حاجه في جسمي لكن الخوف كان مخليني ثابتة في الأرض وفاقدة القدرة على التحكم في أي شئ, خالتي وقفت قصادي مباشرة, السخونة المكان زادت وحسيت إن اللي واقف قدامي شعله من نار, وقفت قدامي بالظبط, سنتيمترات بين عيني وعينها, وقتها, بحاول الأقي كلام أو صفلكوا بيه إحساسي وقتها بس مش عارفة, تقريبا أعلى مرحلة من الرعب وصلها إنسان قبل كدا مكانتش نص الرعب اللي حسيت بيه أنا, فجأة اتحولت لدخان أسود واختفت وهي قدام عيني.

بقيت أشوف كوابيس تخص أبويا وأمي, كنت أشوف أمي بتموت وهي في بيتنا اللي في سوهاج وأخواتي ميقولوليش ويدفنوها من غير ما أنزل أشوفها وأودعها, واروح البلد أمشي في المقابر بالليل لوحدي وأحاول أعرف القبر الخاص بالعائلة بتاعتنا لحد ما الإقيه وأنبش القبر وانزله لحد ما أوصل للكفن اللي ملفوفه فيه أمي وافك الرباط بتاعه واكشف وشها عشان أبوسها تروح تفتح عنيتها وتصرخ صرخة مرعبة وتمسكني بأديها من رقبتي واصحى مفزوعة وجسمي كله عرقان وبتنفض من الخوف, ومن كتر ما شوفت كوابيس إن أمي بتموت بقي عندي برود لما ماتت فعلا بعدها بفترة وكان دموعي نشفت عليها ومش عارفه أبكي عليها ثاني.

حتى أبويا حلمت إنه مات واطدفن لوحدو في مكان بعيد في الصحرا, وأنا بمشي فيها بحاول أوصل للمكان لحد ما اوصل لأرض معينة وحاجه جوايا تقولي أبوكي مدفون هنا وفي البقعة دي بالظبط, وخلال الحلم افنكر الحلم بتاع أمي واقول في نفسي لا مش هنبش قبر أبويا هقعد جمبه أقراله قرآن وأمشي, وفجأة وانا قاعد ألاقي غراب كبير بيحوم حوالين القبر, غراب ضخم عيونه حمرا وزي ما اكون عرفت نيته, كان عايز ينزل بنبش قبر أبويا, الغريب إنني مخوفتش منه وبمجرد ما نزل على الأرض قومت ولوحت بإيدي عشان يهرب, كان أوقات يحفر شويه صغيرين وأوقات يهرب مني لحد ما قرر إن يحفر ومهتمش بتهديدي, وأنا من شدة غضبي جريت عليه ومسكته وقطعته بإيدي واكلته بسناني بالدم والریش, المرعب إنني صحيت من النوم ولقيت بقي فيه ريش أسود وطعم الدم.

.تعبت وزهقت وقرفت من عيشتي, اتمنيت الموت بجد من اللي بيحصلي ويحصل معايا جوزي رجع بعد 3 أيام زي قولت قبل كدا والتعامل بينا كان فيه برود ونفور, هو خايف مني وأنا مش قابلاه, لحد ما في يوم كنت نائمة وسمعت جوزي رجع من الشغل بالليل كعادته, سمعت صوت المفتاح في الباب ودخل الشقة وراح الحمام اتشطف وغير هدومه وجي نام جمبي, مع إن جوزي من عادته بيدخل على السرير بهدوم الشغل على طول وبتبقى كلها تراب ووسخ وكنت بتخانق معاه بسبب الموضوع دا, رجليه بتكون متوسخة من الكعب وبيعمل علامة دائما في ملاية السرير, لكن المرة دي كان مختلف خالص ومرتب ومستحمي وجي خدني في حضنه واكتشفت بعدها إنه مكانش جوزي

عرفت إن اللي كان نايم جمبي مكانش جوزي لأنه كان حنين زيادة عن اللزوم وكان حاطط بيرفيوم عمري ما شमित زيه قبل كدا, وكان هادي جدا لدرجة إنني نمت وأنا في حضنه كدا, صحيت على صوت تليفون مزعج محطوط جمبي, كنت في حالة خمول ومسكت التليفون بعيون نعسانة وحاولت أقفله أو أخليه صامت معرفتش, مكانش بيستجيب لاي أمر, ناديت على جوزي وقولتله يقفل التليفون دا, لكني ملقيتوش, قومت أدور عليه في الشقة ملوش أي أثر, مش من عادته إنه بييجي في الوقت دا وينزل تاني, ولما زهقت من صوت التليفون رميته في درج الكومودينو وكملت نوم, صحيت على صوت الباب بره بيتفتح بالمفتاح وصوت جوزي وهو بيدخل الشقة, وقتها النوم طار من عيني وفوقت بسرعة, وجوزي جي دخل ونام على

السريير كعادته, فاتأكدت إن دا جوزي الحقيقي واللي كان من شويه مكانش جوزي, فتحت درج الكومودينو عشان أبص على التليفون اللي رميته فيه ملفيتوش, الكلام دا كله حصل الساعة اتنين أو ثلاثة الفجر تقريبا.

بعد الموقف دا بأيام رجعنا (سوهاج) وحاولت أدور على علاج لحالتي واتواصلت مع شيخ على الإنترنت وفي نفس اليوم المطبخ بتاع البيت مسكت فيه النار وكانت هتاكل البيت كله لولا ستر ربنا, كنت بحلم بكوابيس إنني بقتل أهلى واحد واحد وبقتل المعالجين اللي كانوا ببيجوا. يعالجوني, خسيت وتحت عيني بقى أسود, واللي يشوفني يفتكرني أكبر من سني بعشر سنين.

رجعت لشقتي تاني وأنا مقررة أعيش ببرود ومفكرش كثير, وبعد فترة خلفت بنتي, وشغلت نفسي بيها وبعد سنة جوزي قرر ينقل من الشقة اللي عايشين فيها لشقة تاني كان وارثها, مكنتش حابه أغير مكان السكن في الأول لكن بعيد قولت يمكن السكن الجديد يكون بداية جديدة, لكن للأسف كل حاجه رجعت تاني وأصعب من الأول.

أول شهر عدا كويس جدا مفيش أي كوابيس أو مواقف ترعبني, كنت بس حاسه إن المكان ثقيل على قلبي ومش مستحمله بس طالما مكانش فيه كوابيس كنت بتطمئن وأصبر نفسي واقول يمكن كل اللي بيحصلي كان بسبب الشقة القديمة مع إنه كان بيحصلي من وأنا طفلة وقبل ما أتجوز بس كنت بواسي نفسي واحاول أقنع عقلي بكدا, لحد ما الكوابيس بدأت ترجع تاني, في يوم حلمت بفيل ضخم أنيابه كبيرة وبيجري ورايا وهو بيصرخ وعاوز يدهسني في غابة ضلمة معرفش معالمها وكنت بجري في أي مكان وأنا تايهه.

في يوم اتخانقت أنا وجوزي وشدينا مع بعض في الكلام بسبب إنني مروحتش عزا واحدة قرييته في العائلة, ولما اتعصب عليا شوفته عنيه بتخرج من مكانها واسنانه بقت سوده فسبته. ومشيت من قدامه, وبدأ النفور والبرود يزيد بيني وبينه.

اعتزلت كل حاجه تقريبا, والوحدة والكآبة خلوني استسلمت للجني اللي معايا وسلمته نفسي, كان بيحكلي كثير, كنت بعرف منه أهله وعشيرته, ومين مسحور ومين معموله سحر أسود, وبيعملوه إزاي, وكل ما استسلامي له يزيد يقرب مني أكثر, لحد ما في يوم حصل موقف بينلي إنه بيحمني وبيخاف عليا أكثر من أي حد.

جوزي جي قالي إن خالته مع أمه في الشقة اللي تحتنا وقالي أنزل أسلم عليها, لبست ونزلت وأنا على السلم الأخير سمعت صوت ضحك هيسثيري في شقة حماتي, معرفتش أدخل ولا أرجع لإن سمعتهم بيقلوا إنها ممسوسة مس خفيف والحالة دي بتجيبها كل فين وفين, خبطت

ودخلت وأول ما خالة جوزي شافنتني بعد ما كانت هادية لقيتها بحلقت فيا وبصت في وشي زي ما يكون الحالة رجعتلها تاني, بحلقت فيا جامد وقربت مني وهي بتمشي بالراحة وحماتي وبنتها بيحاولوا يكلموها ويتواصلوا معاها وهي مش سامعاهم, أنا خوفت وكنت برجع بضمهري لورا لحد ما اتزنقت في الحيطه وهي لسه بتقرب مني لحد ما وصلتلي وبتحرك راسها شمال ويمين بالراحة, فجأة خرج مني صوت رجالي وزعق فيها بكلمة واحدة وقالها أرجعي, راحت اتفرعت ورجعت تجري من الخوف وراحت مكانها ومسكت دماغها وهي بتتكلم كلام مش مفهوم باللغة العربية الفصحى وفجأة ظهرت حروف بتخرج من جسمها وتلف حوالينها في دوامة, أنا حسيت بحرارة شديدة وجسمي سخن وأعصابي ارتخت وأغمى عليا, وصحيت لقيت نفسي على الكنبه وحماتي قاعدة جمبي ولما اطمنت اعتذرتلي وقالتلي حقك عليا ومن بعدها البيت عرف إنني مخاويه, بس مش مهم, بعدها سمعت إن خالة جوزي حالتها اتحسننت وخفت

السكن الجديد كان فيه طريق قطر بعدي عليه وأنا راجعه بعد ما أشتري خضار أو أي حاجه من تحت, كنت بمجرد ما اقف ورا الحواجز مع الناس واحنا مستنيين القطر وبمجرد ما يعدي كنت بسمع صوت صرخة بنت قوية جدا, من قوتها كان يجيلي صدع وأفقد توازني واتسند على أي حاجه جمبي, عديت على السكة دي مرة واثنين والتالته كان جوزي جمبي, بعد ما القطر فات وسمعت الصرخة وعدينا وانا في نص المزلقات بين خطوط السكة الحديد سمعت الصرخة من تاني بعد ما دوست على مكان معين تحت رجلي, فقدت توازني تاني وجوزي سندني وعدينا وانا مغمضة عنيا رحت شفت بنت رفيعة جسمها هزيل وشعرها بيوقع وحالتها صعبة جدا, فتحت عيني ورجعت للمكان اللي دوست عليه وسط السكة الحديد وسمعت الصرخة تاني وجوزي مش فاهم بيحصل إيه رحت قعدت وحفرت بإيدي في الزلط وجوزي محرج من نظرات الناس وعاوزني أقوم وبعد شبر من الحفر شوفت كيس شفاف جواه حاجه لونها أحمر, بصيت فيه كانت تقريبا ملابس داخلية حريمي, حطيته في شنطتي ومشيت

رجعت البيت أنا وجوزي وهو مذهول من اللي حصل, وبدأت أفك الكيس دا لقيت جواه قطعة ملابس حريمي شكلها جديد وجواها ورقة مكتوب عليها طلاس وحروف وصورة للبننت اللي شوفتها لما غمضت عيني ومشخبط على وشها مع شوية كلام بالاسود زي تفريق ألم عذاب, بدأت أفك العمل وأنا بقرا آيات قرآنية وعملت حاجات كذا علمهالي الجني واتمنيت أكون سبب في شفاء البننت الغلبانة دي, والحمد لله تاني مرة عديت السكة الحديد مسمعتش صوت أي صراخ.

الجن بدأ يظهر لبنتي, وأول مرة اشوف بنتي بالمنظر دا, كنا واقفين قاعدين أنا وأمي في الصالة وهي قاعد بتلعب قدامنا, فجأة حسيت بيها بتبص ل فوق وفتحت عينيها برعب وهي بتتابع شئ بيتحرك على الحيطه, بعدها بدأت تصرخ من الخوف ووقفت واتشجبت وطلعت تجري هنا وهناك زي العروسة اللعبة في حركة آليه, جريت عليها وحاولت أمسكها لكن معرفتش, كانت سريعة جدا, أسرع مني أنا وأمي, كانت بتحاول تهرب منا وتروح ناحية الحمام, أنا من جوايا حسيت إن اللي بيحصل دا كان مخصوص عشان يستدرجها للحمام ويأذيها هناك عشان دا مكان قوتهم وسيطرتهم, حاولت أكون في نفس سرعتها وقبل ما توصل الحمام بخطوات كنت مسكتها وضميتها وحاولت أهدئها وأطمئنها من التشنجات خاصة وإنها قبل ما توصل للحمام بدأت أشوف على الباب خريشات على شكل خطوط مش منتظمة, زي ما يكون كيان موجود جوه ومن فرحته بقومها قرر يستخدم ضوافره على الباب تعبيراً عن فرحته بنجاح خطته, لكن ربنا ستر ودخلت بيها أوضة النوم وحضنتها وقرأتها قرآن لحد ما نامت في حضني.

بعدها بيومين كنت واقفة مع جارتني بنتكلم وحي أخويا هزر معايا هزار سخيف قلل من قيمتي قدامها, وأنا جيت على نفسي ومقررتش أرد عليه عشان هو أخويا وراجل ومهما كان مينفعش أقلل من قيمته مع إنه أصغر مني, وقتها زعلت جدا ودخلت البيت مددت على الكنبه, وعلى الرغم من الدوشة والزحمة عيني اتقفلت ونمت بعد ثواني, أمي عرفت باللي حصل وجاءت طبطبت عليا تصالحنى عشان عارفة إنى لما بنام زعلانه من حد بتحصل حاجات مش كويسة, وقد كان

حلمت إنى موجودة في أرض سودا كإن السواد دا كان دم ونشف, الجو حر وأنا لوحدي, وفيه حمام سباحة بس اللي جواه مكانتش مياه, كانت حمم بركانية بتغلي, جسمي ثابت في الأرض مش عارفه أحركه, وفجأة شوفت كيان ضخم واقف وبيبص عليا بحقد وكره كبير, ماسك سلسلة ضخمة وبيلفها على دراعه, شكله شكل الحيوانات وواقف بصعوبة نفس ووقفه الإنسان, جسمه لونه احمر وجلده مليون تشققات بتطلع منها النار وفيه قرنين مخيفين في راسه, كان بيلف السلسلة على إيده اليمين وبيستعد وهو بيكلمني بلغة مش عارفاها, كان بيكلمني بثقه كأنه عارف إنى فاهماه بيقول إيه, المنظر كان مرعب وأقرب تشبيه هو تشبيه الجلاد لما بيجهز نفسه وأدواته لتنفيذ حكم الإعدام.

رمى السلسلة عليا واتلفت حوالين رجلي, وبدأ يشدني ويضحك وهو بيكلمني وأنا مش فاهماه,
صرخت من الألم اللي كان في رجلي وأنا لا حول لي ولا قوة, عرفت نيّته وهو بينقل بصره
بيني وبين حمام السباحة اللي مليون نار بتغلي

فجأة سمعت صوت باب انفتح وخرج منه شاب لايس لبس شبه أهل النوبة كدا, وجري ناحية
الكائن دا وهو بيقوله سيبها, وخلال جريه بدأ يتحول لنفس شكل الكائن دا لحد ما وصل عنده
وبقوا الاتنين شكل بعض بالظبط, بدؤوا يتخانقوا ويضربوا بعض وفهمت من كلام الكائن
الأول اللي كان عايز ياذيني إن فيه بنت هي اللي أمرته يعمل كدا ومش هيمشي من المكان دا
غير وروحي في إيده ومحدث هيقدر يمنعي منه, الشاب اللي اتحول لما سمع الكلام دا غضبه
زاد وحجمه بقى أكبر وصراعهم بقى أقوى وأنا مكنتش مستحيلة قوة الصوت اللي شبه
حيوانات أسطورية بتخانق مع بعض دا غير صوت العواصف والصفير وأصوات تانيه
مرعبة سمعتها لأول مرة, الشاب كان بيحاول في الأول إنه ياخذ السلسلة اللي بدايتها في إيد
الكائن دا وأخراها في رجلي, كان بيحاول ينفذني الأول وبعدين يتعامل معاه, لحد ما نجح في
كدا فعلا بعدها قتلة بسهولة

لف ناحيتي وهو لسه بشكل المرعب بس مكنتش خايفة مني, اتقدم ناحيتي وشكله بدأ يرجع
للشكل الطبيعي للشاب اللي ظهر أول مرة, فك السلسلة من رجلي وشالني بين أيديه وظهرتلي
أجنحة وطار بيا من المكان

صحيت مرعوبة لقيت أخويا بيضربني على خدي وهو بيفوقني ويقولني خلاص اهدي اهدي,
ببص لقيتني نائمة على الأرض, فسألته أنا وقعت من على الكنبة ولا إيه, وقبل ما يجاوبني
بصيت لقيت أختي الحامل وأمي ومرات أخويا قاعدين جمب بعض ببيكوا بشكل هيستيري
ومستخبين في بعض من الخوف, إيد أخويا كانت كلها دم, اتخضيت وسألته مالك حصلك إيه؟
قالولي إنني حرفيا كسرت البيت على أخويا وعليهم, حتى حوض المطبخ القوي اللي ميتكسرش
غير بالشاكوش كسرتة بإيدي عادي, ونبرة صوتي اتغيرت بقت مرعبة ودخلت الحمام وأنا
بزمجر وأقول كلام مش مفهوم ومحدث قدر عليا غير لما رجعت لمكاني تاني في الصالة
وأغمى عليا

اتأكدت إن كل اللي كان بيحصلني مكانش مجرد هلاوس وأحلام, فيه كتير منها طبيعي بس
يمكن عشان كنت قاعدة وحدي في شقتي كنت فاكرها كوابيس وبتعدي, مرات أخويا كانت

نظراتها ليا كلها خوف وزعلت من نفسي لما قالولي إني ضربتها ضربة فوية في بطنها مع إنها لسه والدة قيصري من عشرين يوم

طقوس الزواج في عالم الجن غريبة جدا, هحكىلكوا عليها بالتفصيل, وفيه مفاجأة هفجرها للبنات, خاصة اللي بيحلموا بالجن العاشق ويطير بيهم لأماكن جميلة وبيعيشوا معاه أحلام وردية.

لكن خليني في البداية أحكىلكوا على شئ خلاني آخذ خطوة العلاج بنفسي حتى لو مفيش حد هيساعدني, كنت نائمة وصحيت لإن بنتي ضربتني بالقلم على وشي, على الرغم من إيدها صغيرة لكن القلم وجعني, ومعرفش إذا كان وجع موضعي ولا نفسي, لكني اتوجعت جدا, واتوجعت أكثر لما سمعتها بتقوللي أنا بكرهك .. إنتي مش ماما. إنتي موتي ماما وقطعتيلها صوابها وشديتي شعرها, أنا شوفتك على حقيقتك ومش عايزه أشوفك تاني

أبوها كان واقف جنبها مستغرب من اللي عملته واللي قالته لكنه متكلمش ولا قال حاجه ودا كمان وجعني, سابني وخرج وهي خرجت وراه وأنا دخلت في نوبة بكاء قوية, كنت ببكي بهيستيريا زي الطفلة والصوت كان عالي فسمعت صوت الباب بينفتح وينقل, سابوني وخرجوا من غير حتى ما جوزي يتعاطف معايا بنظرة أو حتى يحاول يقعد جمبي لحد ما اهدى.

أنا مش ضحية بالكامل عشان مصعبش على حد, أنا كمان كنت سبب في اللي حصل لما سبتله نفسي في أوقات معينة, فضلت كذا يوم مش باكل كويس ولا بنام كويس, إرهاق وكوابيس وحد. عاوز يموتني, لحد ما قررت إني أنهى كل دا بطريقتي

فيه بنت أعرفها من أيام ما كنت عايشه في سوهاج, صاحبتني في المدرسة, كنت أعرف إن أبوها راجل تقي وبيعالج الحالات اللي زي حالتي, بس مكنتش أعرف إذا كان لسه عايش ولا الله يرحمه, فقررت أسافر البلد وأزور بيتها وأكون لوحدي خلال رحلة العلاج دي, ولما قولت لجوزي وافق عادي ولا كإن أمري يهमे ودا اللي خلاني أتمسك بقراري وأحاول ألاقي حل لمشكلتي.

نزلت البلد ورحت بيتنا هناك, ومن بعده خرجت اتمشيت على الكوبري شويه واللي بتعدي عليه المواصلات لحد ما ركبة عربية رايحة للقرية اللي فيها صاحبتني, سألت راجل كبير بعد

ما نزلت القرية عن بيت أبوها ولأن القرية صغيرة واسم أبوها معروف دلني على البيت, ومن حسن حظي لما رحلت وبعد السلامة عرفت إنها اتجوزت بس جات النهاردا زيارة لبيتها, ولما سألتها عن أبوها قالتلي الله يرحمه, كان باين على عنيا كل حاجة من غير ما أحكي, وهي عرفت أنا جايه ليه, فقالتلي عمي يعرف في الحاجات دي تعالي آخذك ونروح نزوره, وقد كان.

وصلنا بيت عمها واستقبلنا وقعدت معاه, وقتها حسيت إنني في حمل بينزل من على كتفي لاني اخترت اتعالج, عمها قالي احكي لي كل حاجة حصلتك لحد الوقت اللي انتي قاعدة فيه قدامي.

حكيت حاجات كتير, أوقات كنت ببكي في مواقف معينة, حكيت حاجات مقولتهاش لحد منكم في قصتي ولا هتعر فوها, بعدها قام ونادى على مراته قعدت جنبنا وقالي بصي يا بنتي أنا من كلامك عرفت شوية حاجات بس حابب أتأكد منها بس خلي عينك في عيني ومتحركيهاش, وراح مسك إيد مراته وقعد يقرأ حاجات معينة وهو باصص عليا بقوة حسيت وقتها إن نن عيني الشمال اتقسم نصين, بعدها سكت وقالي إنتي النهاردا هتحلمي حلم ولما تصحي هتكوني فاكركه كل تفاصيله وتيجي بكره عندي في نفس الميعاد دا وتحكيهولي.

سألته على كام حاجة حبيت أعرف إجابتهم لكنه قالي بكره إن شاء الله تيجي وهقولك كل حاجة بس خلينا نستنى اللحم, رجعت لبيتنا واللي كان فيه عمي وأسرته, اتعشنا واتكلمنا لحد ما جي وقت النوم وكل واحد راح مكانه, وأنا نمت في أوضة الضيوف.

مجرد ما قفلت عيني وخلص هروح في النوم سمعت حد صوت بينادي عليا بعصية, قلبي دق من الخوف وفتحت عيني بصيت حواليا ملقيتش حد, بعدها نمت ولقيت نفسي قدام قصر فخم, الأرض مفروشة بالسجاد الأحمر والورد, والستائر لونها أسود والقصر نفسه منقوش باللون الذهبي, كانت الرجالة والستات واقفين صفين, معظم الرجالة كبيرة في السن وشعرها أبيض وعيونها متكحلة وملامحها حادة, لابسين بدلات سودة وشوية صبيان برضو لابسين أسود بس شكلهم كان شبه بعض جدا, الكل تقريبا كان بيصلي عشان اتقدم لداخل القصر, كنت بمشي خطوة وارجع الثانية من الخوف, كان فيه بعضهم مبتسم وبيقولي مبروك وأنا بتقدم ناحية سلم القصر, كنت لابسة فستان أسود قصير بحمالات وشعري مفرد على كتفي, وأنا عمري ما لبست كدا أو ظهرت كدا قدام حد غير جوزي, اتمشيت لحد ما وصلت لسلم القصر ولقيت الشاب الجني واقف في أعلى السلم لابسة بدلة أنيقة جدا ومبتسم, نزل بثقة وهدوء لحد عندي والابتسامه مش مفارقه شفايفه, لحد ما وقف قدامي, مسك إيدي وباسها بحركة رومانسية ومشى بيا وطلعنا السلم مع بعض, بعد ما وصلنا للاخر طلع من جيبه علبة صغيرة وفتحها,

كان فيها خاتم فص أسود ضخم على شكل دمعة, مسك إيدي الشمال ولبسني الخاتم, وبمجرد ما الخاتم دخل صباعي فجأة لف حواليه بحركة ديناميكية ومسك في صباعي قوي كأنه اتعشق في صباعي, بعدها حسيت بنار في صباعي كإن الخاتم دا طالع من جهنم, انتططت من الألم وحاولت أخلع الخاتم لكن الشاب مسك إيدي بهدوء وابتسم وقالني مينفعش, اصبري شويه. وهنتعودي عليه ومش هتحسي بيه, دا بقى جزء منك خلاص

بعدها جي راجل عجوز قرب مننا, ملابسه كانت مختلفة عن كل اللي موجودين, قرب مني ومسك راسي من الجنب بإيديه الاتنين وبدأ يقول كلام مش فاهماه زي ما تكون تلاوة معينة بصيغة بيقولها دايمًا في المناسبات دي, حسيت بصداع رهيب في راسي بس مقدرتش اتحرك, بعدها ساب راسي ومسك إيدي بقوة وأنا بحاول افلتها من إيده والشاب بيهديني, وعند منطقة الوريد وبمهارة دكتور جرح إيدي في منطقة الوريد ولما بدأ الدم يخرج مسك إيد الشاب وحطها على إيدي

أنا وقتها اتهزيت وجسمي انتفض ومفهمتش إيه اللي بيحصل وفلت إيدي وجريت جوه القصر, وأول أوضة لقيتها في وشي فتحتها ودخلت جوها

أوضة كبيرة فخمة زي بتاعة البشوات, أثاثها واضح إنه غالي جدا وفي منتصفها سرير كبير مفروش بالحريز, كنت بيكي من غير سبب, يمكن من هول الموقف اللي أنا فيه, ووسط بكايا ببص لقيت تعابين كبيرة لونها أسود في نص الأوضة, ملفوفة حوالين بعض في دايرة زي الإعصار وبتقرب مني, وجمب التعابين دي شوفت ست شكلها قبيح جدا وشعرها أبيض وعليه تراب, بتبصلي بعينها اللي كان لونها أبيض وبتصرخ وهي بتقرب مني, هي والتعابين, وأول ما انا صرخت اتفتح الباب وظهر الشاب وجي ناحيتي منع من الست والتعابين وهو بيتخانق معاهم ويقطع فيهم, وبالتدريج شكله بدأ يتحول ويزداد قوة, جلده أحمر متشقق وأسنانه بقت شبه الإبر وطلعله قرنين كبار, شكله خوفني جدا مع إني مش أول مره أشوفه, لما شوفته أنا كمان بدأت أصرخ من الخوف منه وهو جي ناحيتي وهو بيتحول لشكل إنسان عشان مخافش, فجأة صوت عم صاحبتني نادى عليه باسمه وطبعًا مش هينفع أقوله, هو بص ناحية الصوت باستغراب ودهشة, وبصلي واختفى زي الدخان الأسود

فجأة المكان اللي أنا قاعدة فيه اتغير, الحيطان قديمة جدا وعليها عنكبوت في كل حته, الأرضية مليانة زبالة ولونها أسود, السرير اللي قاعدة عليه مرتبته متقطعة ومتبهذلة والسرير مكسور أصلاً, قومت خرجت من الأوضة, القصر اللي أنا فيه كله قديم والأوض كلها مفتوحة ملهاش أبواب ومفيش إضاءة, جريت بره القصر وأنا بحاول أوصل للبوابة, كل حاجه حواليا

كانت قديمة جدا كإن القصر مهجور من مئات السنين, بصيت على المخرج بتاع القصر
وجريت ونفسي مقطوع وأنا بحاول أسبق الزمن قبل ما الشاب دا يطلعلي, جريت وجريت
والباب كان بباعد عني كإني بجري في مكاني, وفجأة لقيته واقف قدام المخرج, كان ببصلي
بغضب وحب في نفس الوقت, بإشارة منه بقيت عنده, بيني وبينه شبر, ظهرلي بشكله الحقيقي,
المرعب, بجلده وقرونه, فجأة حضني جدا, من شدة الحزن حسيت إنه بيحزن العضم بتاعي,
صرخت وصرخت وبعدها صحيت

بعد ما حلمت بالكابوس دا ثاني يوم رحتم لصاحبتني, واللي فعلا كلامه اتحقق وحلمت
بالحلم ورحتم عشان أحكيهوله, المرة دي كنت لوحدي, صاحبتني مكانتش معايا, استقبلني هو
ومراته اللي قعدت معانا طول الفترة اللي قعدتها هناك

حكيتله الحلم وقولتله إنني سمعت صوتك بتنده على الجنى باسمه خلال الحلم, هز راسه بوقار
وقالي أبوه ندهت عليه باسمه لإنني مكنتش أعرفه لما شوفته أول مرة, ولما لاحظ الاستغراب
وعدم الفهم عليا, قالي لما كنتي عندي امبارح وقريت عليكى شوفته ظهر في ركن الأوضة
اللي احنا قاعدين فيها دلوقتي, وشاورلي بإيده على الركن اللي ظهر فيه, كمل كلامه وقال,
كان واقف وبببص عليا ومتضايق من اللي بعمله, وقبل ما أعرف هو مين وقبيلته إيه اختفى,
وعشان تكوني عارفه, هو بيتواصل عن طريقك فقط يعني مش بيكون متلبسك, ودا اللي
خلاكي طول الوقت متشكيش إنك ممسوسة

والحكاية وما فيها يا بنتي إن الجن دا كان معاكي لحظة بلحظة من يوم ولادتك, كان متابعتك
لحظة بلحظة وانتي بتكبري, ولما كان أي حد بيحاول يصاحبك أو يقرب منك كان بببعده عنك,
وظهرلك على هيئة الولد الصغير اللي في سنك واللي كان بيكلمك وانتي صغيرة عند الشجرة
عشان يفضل معاكي طول الوقت ومتتعلقيش بحد غيره, وهو نفسه اللي كان بيظهرلك في
الحلم ويحميكي في كل مرة زي ما حصل معاكي

والكوابيس اللي كنتي بتشوف فيها دي كانت بسبب سحر أسود معمولك, بداية مفعوله كان اللي
حصل معاكي عند الجبل وهنا الجنى دا بدأ يتدخل ويحميكي, هو بالمناسبة جن مسلم,
والمسلمين عندهم زي عندنا بالظبط فيه منهم الملتزم وفيه منهم اللي لأ, ودا طبعا تفسير
قراءتك لسورة يوسف كاملة وانتي صغيرة من غير ما تكوني حافظاها, حتى لو تلاحظي إن

طول فترة حياتك لما كنتي تقري قرآن أو تصلي مكانش بيحصلك حاجة زي ما بيحصل لمعظم الناس اللي بيكون معاهم جن كافر ويبدأ يتشنج بمجرد ما يسمع شيخ بيقرأ عليه قرآن.

قالي كمان عن حلم حلمته وأنا نسيت أحكيهوله امبارح وسط الكلام الكثير اللي قولته, الجني دا في مرة من المرات وسط الحلم كتفني وشربني مادة صفرا من زجاجة صغيرة, قالي إن المادة دي هي أكبر مشكلة أنا فيها دلوقتي وهي اللي هتصعب علاجي.

كَمَل كلامه بنبرته الهادية وقال, يا بنتي دا جن عاشق, أبوه ملك خادم السبع أيام, واليوم اللي كان بيحصل فيه معاكي حاجات كتير بيكون يومه هو, عشان بيكون في اليوم دا أقوى, وعمل طقوس زواجه منك والأحلام اللي كنتي بتحلميها إن معاكي أطفال كان بيصور هالك هو عشان نتقبلي فكرة الأمومة والزواج منه, مع إنه عارف إن دا ممنوع عندنا وعندهم

أما بقى انتقالك معاه بروحك وانتقال الإنسان في الأحلام عموما في المواقف دي بروحه وإحساسه إنه عايش الحقيقية فعلا دا يعتبر موضوع كبير وتفصيله أكبر ومش مهم تعرفيها دلوقتي.

أما اللي كنتي تشوفيهم معاكي في الشقة وواخدين راحتهم وسط الضباب كإنك انتي اللي ضيفة عندهم مش العكس, دول عشيرته, أمرهم إنهم يبقوا معاكي وحواليكي ويحموكي, بس زي ما فيه منهم اللي بينفذ الأوامر, فيه منهم الخبيث اللي كان بيعلي التلفزيون ويغيّر محطات الراديو زي ما كان بيحصل معاكي ويخوف قرابيك من زيارتك.

وطبعا ممكن تكوني خمنتني إن الست اللي بتشوفيهما في الكوابيس بشكل وحش وشعر كله تراب دي واحدة من قبيلته بتحبه, وبتغير منك عشان شايفاه بيهتم بيكي انتي وعشان كذا كانت بتظهر لك في كل مرة وتحاول تاذيكي وهو كان كل مرة بينقذك.

حتى أهلك كان ممكن يأذيههم بسببك, خاصة أخوكي والموقف اللي حصل معاكي وقالوا إن صوتك اتحول لصوت وحش ورحتي الحمام وقعدتي تزومي زي الحيوانات, كان عاوز يستدرج أخوكي للحمام ولو أخوكي كان دخل وراكي فعلا مكانش هيجصله خير, بس ربنا سترها وأخوكي وباقي أهلك استنوكي بره في الصلاة لحد ما خرجتي لوحداك وأغمى عليك.

وجوزك يعتبر سبب من الأسباب لكل اللي حصلك, إهماله ليكي خلاكي تستسلمي للجني دا. وقدوته وسيطرته عليك زادوا بالتدريج.

بعدها قالي أوعدك إنك بعد الجلسة دي هتتحسني كثير جدا لكن الأمر راجع لقوة إيمانك وثقتك في نفسك, مش هتشوفي أي كوابيس تاني بس ساعدي نفسك زي مانا هحاول أساعدك دلوقتي

... وبدأت رحلة العلاج

قال بسم الله ومسك إيد مراته وحطها على راسي كحاجز بيني وبينه, وبدأ يقرأ

بالتدريج بقيت أحس بدوخان وإن راسي ثقيلة جدا, غمضت عيني واستسلمت للي بيحصل, كنت سامع صوت شبيه بحد ماسك مرزبه ضخمة ويضرب بيها على صفيح حديد بشكل متكرر, الصوت وتردده كان قوي جدا, غمضت عيني أكثر سمعت صوت همهمة أشخاص وبالتدريج بدأت توضح, كانوا بيتكلموا لغة عربية فصحي وبيتناقشوا بصوت عالي أقرب للخناق لكن من شدة تعبي والصداع محفظتش ولا كلمة من اللي قالوه

بعدها للأسف سمعت صوت شاب, بيبكي, بوجع وحزن, كانت دموع حد مجروح وهيتخلى عن حبيبته, أنا كمان بدأت أبكي زيه, بنفس حرقه بكاه تقريبا, حسيت إنه قريب مني, وشنا احنا الاتنين كان قصاد بعض, وبنبكي مع بعض, كنت بشهق زي الأطفال

بعد وقت قصير كل الأصوات اختفت, فتحت عنيا بهدوء على صوت مراته وهي بتصحيني وجايبالي مشروب بارد شربته, حسيت إنني خفيفة زي الريشة, حسيت إنني اتغيرت, شكرتهم جدا وخرجت وأنا ناوية أغير حياتي

طلبت الانفصال من زوجي وبعد فترة تردد منه تم الانفصال, وحاليا عايشه مع أبويا وبنتي اللي تعتبر كل حياتي واديتها كل طاقتي ومجهودي, وقررت أخليها تعيش حياة أحسن من حياتي, حصلت بعض الكوابيس كل فترة والثانية لكن بشكل عابر ومش مهم أحكيها, حياتي اتحسننت والحمد لله على كل شئ

انتهت

ليلة في المشرحة

نا بشتغل في فرز الجثث، ممكن تكون الشغلانة دي جديدة عليك وأول مرة تسمع عنها، باختصار فيه جثث كتير بتيجي عندنا ومنها بيكون غير معروفة الهوية، يعني لا معاها بطاقة ولا تليفون ولا أي حاجة نعرف صاحبها من خلالها، وأحسن جثة بتيجي بتكون عبارة عن قطعتين باقي الجثث فيه بيكون ثلاثة وخمسة لحد ما خيالك يسمحك، شغلانتنا إننا بنجمع كل جثة لوحدها "زي لعبة المكعبات" وبنحطها في التلاجة لحين تحقيق النيابة ما ينتهي وبعدين نشوف هنعمل فيها إيه، شغلانة مقرفة طبعا بالنسبالك وبالنسبالي لما كنت جديد، لكن بمرور الوقت اتعودت عليها وبقيت اتعامل مع الجثث عادي، جثث جاية من تصادم حوادث سيارات أو قطر مع سيارات أو جرايم غامضة أو جرايم شرف وغيرهم، جثث الأطفال بس هي اللي بتعامل معاها بحنية وحرص أما باقي الجثث بعاملهم عادي زي بعضهم.

وفي ليلة جاتلنا جثة بنت عندها حوالي 19 سنة، الجثة كانت قطعة واحدة ودي حاجة جديدة بالنسبالي لكن لما قربت منها ودققت فيها لقيت فيه فتحة بالطول في بطنها من أولها لآخرها ومتخيفة وكل حاجة، مخي راح على طول إنها حادثة شرف وخلص يعني، بس سألت نفسي إيه اللي جابها عندنا؟

وأنا بوقع على الاستلام سألت الشخص اللي استلمتها منه قالي إن القسم عندها مليون والطبيب

.المسؤول قرر ينقلها عندنا لحد ما ببيان لها صاحب

البنيت ملامحها هادية ومغمضة عينها في هدوء كأنها نائمة، وشها فيه ملامح البراءة ودا بسبب
.صغر سنها لأنها لسه مشافنتش حاجه في الدنيا

مش عارف ليه شعور داخلي خلاني أعاملها كمعاملة الأطفال، اخترتلها أحسن تلاجة سليمة
وكمان التلاجات اللي حواليتها مفيهاش جنث تزعجها، وبمجرد ما دخلتها وقفلت التلاجة
.خلاص راحت من بالي، زيتها زي غيرها

فضلت موجودة عندي حوالي أسبوع، لحد ما واحد جيرانني من البلد اتصل بيا وقالني إنه اتطرد
من الشغل من فترة وساب السكن ومش عاوز يرجع البلد ومحتاج أي مكان ينام فيه لمدة يوم
.أو يومين لحد ما يدور على سكن جديد وشغل جديد

طبعا أنا مراتي وأولادي معايا فمش هينفع استضيفه في شقتي فقولتله عندنا غرفة استراحة في
مشرحة المستشفى ممكن تقضي فيها يومين وأكثر كمان لو حابب، قالي مشرحة مشرحة مش
مهم أجيلك امتي؟

قولتله النهاردا لو عاوز، وبالفعل بعد المغرب كان عندي، وقتها كنت خلصت الشيفت
ومستنيه، لما جي طلبتله عشا وأكلت معاه حاجه بسيطة وبعدها خدته ووصلته للاستراحة، أنا
بعنتي بيها جدا لأن محدش بيستخدمها غيري وأحيانا بيات فيها لو عندنا ضغط شغل، فيها
تليفزيون صغير وسرير نضيف وحمام معقول واديته المفتاح وقولتله استريح هنا لحد ما ربنا
.يحلها وبكرة الصبح متفطرش عشان هجيب فطار ونيجي نفطر سوا

شكرني جدا وكانت أحيانا دموعه هتغلبه وهو بيتكلم بس بيحاول يتماسك وأنا متأكد إن بات
ليلته ودموعه على خده

بصوا هو أنا مش عارف اللي حكاهولي بعد ما رحلته تاني يوم حقيقة ولا كذب لأن فيه كلام
كثير مصدقتوش بالرغم من الحلفانات اللي حلفها لما شاف نظرات الاستنكار في عيني، لكن
.لما خبطت الباب عليه وفتحتني حضني وجسمه بيتنفض وعرقان وصوته متقطع

عاوزين تعرفوا اللي حصل معاه؟

.. هحكيلكوا

..

أنا عمري ما نمت في مشرحة قبل كدا، بس الظروف هي اللي أجبرتني، الحمد لله إنني لقيت مكان أنام فيه اليومين دول لحد ما اشوف شغلانة وادور على سكن قريب منها، استراحة المشرحة كانت هادية جدا، بصراحة المكان كله هادي ودا في خد ذاته شئ يوتر الأعصاب، فيه ناس بنتوتر من الزحمة أو الصوت العالي ويحبوا الهدوء، لكن لو جربوا الهدوء في مكان مخصص للجثث صدقوني هيتوتروا أكثر.

لكن أنا في إيه ولا في إيه؟

طردت كل حاجه من دماغي ودخلت الحمام خدش دش ع السريع مناسب لإمكانيات الحمام وخرجت غيرت هدومي ومددت على السرير وفي دقائق كنت نمت من التعب والحزن.

بالليل الباب خبّط عليا بهدوء واحترام فصحيت، استغربت المكان اللي أنا نايم فيه لكن بعد لحظات افكرت اللي حصل معايا وإني نايم في استراحة مشرحة، صوت الباب خبّط ثاني بشكل محترم ومنتظم برضو، أنا قافل الباب من جوه زي ما بلدياتي قالي يعني، فظنيت إن اللي بيخبّط دا هو المناوب اللي بيمسك فترة مسائية، ماهي الاستراحة أكيد مش بتاعة بلدياتي بس، قولت أكيد عاوز ياخذ حاجه سكر أو شاي مثلا أو شي خاص بيه هنا، قومت فتحت الباب ملقيتش حد.

بصيت في الممر شمال ويمين ملقيتش حد، بصراحة حسيت بتأنيب الضمير، أكيد الراجل عارف إنني نايم هنا ولما خبط ومصحيتش راح مشي عشان ميزعجنيش، وأنا برضو خدت وقت كثير ما ما استوعبت وقومت فتحت الباب

رجعت ثاني ومددت على السرير بحاول استدعي النوم وقبل منام الصوت خبّط ثاني لكن بشكل مفزع وبسرعة، قومت في ثواني فتحت الباب لقيت بنت بتبص حواليتها مفزوعة وهي

بتخبّط ومش شايفه إن الباب اتفتح لسه، ولنا بصّت قدامها وشافنتي وشافت الباب مفتوح راحت داخلة بسرعة وقالتلي اقفل الباب اقفل.

شكلها وفزعها خوّفتني أنا كمان رحت قافل الباب بسرعة ووقفنا لحظات باصين لبعض مش فاهم حاجه.

دي مين؟

وايه اللي جابها هنا؟

وبتعمل إيه في وقت متأخر زي دا؟

معقول بلدياتي مظبّط الاستراحة ومنصفها كأنها غرفة في فندق عشان يجيب فيها نسوان؟ ويقولني أحيانا ببات فيها لو فيه ضغط شغل، هاه، قال ضغط شغل قال.

لكن البننت شكلها صغير وواضح من لبسها وهيئتها إنها محترمة، لالا اليومين دول محدش عارف المحترمة من اللي مش محترمة، اختلط الحابل بالنابل زي ما بيقولوا، كل التساؤلات دي جات في بالي في ثواني وفي الآخر قولتلها خير فيه إيه؟

اترددت قبل ما تجاوب عليا وردت عليا بسؤال، الأستاذ سيد فين؟

الأستاذ سيد آه، تبقى الاستراحة مخصصة للنسوان أكيد، قولتلها إنه مشي من بدري، ولما سكتت قولتلها الأستاذ سيّد مش موجود، عشان تتلم وتمشي يعني، فضلت ساكته وباصة في الأرض، أنا كنت سامع صوت أفكارها تقريبا، كانت عايزة تقولي طب ممكن أبات الليلة هنا؟ أو يمكن خيالي الو*خ صورلي كدا، راحت أخيراً قالتلي أصلي مش مرتاحة، قولتلها في نفس الثانية ولا أنا كمان مرتاح ولا سيد مرتاح ولا هيثم مرتاح -هيثم دا واحد صاحبي- محدش مرتاح في الدنيا دي، كان من الواضح إنها قالت جملتها الأخيرة منتظرة مني أسألها مش مرتاحة ليه؟ فتبدأ تحكي لي شريط مدته ساعة ونص عن أبوها اللي مات وهي صغيرة وامها اللي اتجوزت من بعد أبوها وجوز امها اللي بيعاملها وحش، وبدأت نظراته تتغير ليها بعد ما شافها بتكتبر وتبقى مزة قدامه -لإنها كانت مزة فعلا- وإنها مش بتعمل كدا غير عشان مضطرة لإنها هربت من البيت وحكاوي كتير هتصدع راسي بيها، فالحمد لله إنني رديت عليها

على طول، ولما سمعتني بقولها محدش مرتاح ونبرتي خدت منعطف زعيق راحت قالت وهي لسه باصة في الأرض، سلامتك.. بس ياريت لما سيّد يبجي تقولة أميرة مش مرتاحة، وهو هيفهم على طول، وسابنتي وخرجت.

إقال أميرة مش مرتاحة

وأنا مالي إذا كانت مرتاحة ولا لا؟

مش كفاية اللي أنا فيه؟

طفيت النور ورجعت للسريير تاني عشان أكمل نوم مع إني عارف إني مش هعرف أنام، طالما صحيت خلاص. لكن حاولت أنام وحاولت وبمجرد ما قربت أدخل في النوم الباب خبّط تاني، لعنت أميرة وسيد مع بعض وقومت متعصب فتحت النور وفتحت الباب ملقيتش حد، وبعدين في الليلة السوداء دي؟

الغريب إني بمجرد ما هقفل الباب سمعت صوت مياه في الحمام بعدها زي ما تكون حاجة وقعت فيه واتخبطت بالأرض، سبت الباب ورحت الحمام أشوف فيه إيه لقيت كل حاجة مكانها عادي زي ما سبتها! وبعدين؟

الأغرب بقى إني لما رجعت أقفل الباب لقيتها واقفه بتترعش أكثر من المرة الأولى وبتقولي أنا مش هرجع مكاني تاني واللي يحصل يحصل. من عادتي لما أتعصب جدا بدوس على سناني في محاولة لكتم غضبي بقدر الإمكان وبعد ثواني من محاولة السيطرة على نفسي كنت هسألها واضطر اسمع منها، لكن الشيطان لعب في دماغي، مش هيا قالت بنفسها مش هرجع مكاني تاني؟ خلاص اقولها تنام عندي هنا، هي تنام على السريير وأنا في الحته الفاضيه اللي ع الأرض دي، أو على الكرسي اللي هناك دا، إيه اللي أنا بفكر فيه دا؟ حاولت أسيطر على شيطاني شويه وقولتها بهدوء خير، حصل إيه؟

قالتلي أنا لسه جديدة في المكان هنا يادوب أسبوع وبتحصل معايا مواقف وحشه ومحدّش مقدر. ولا محترم نفسه كإن معاهم اخوات بنات

بمجرد ما قالت الكلمتين دول نظرتي ليها اتغيرت 180 درجة، أنا كنت فاكرها في البداية استغفر الله العظيم لكن واضح إنها بتشتغل هنا، قولتلها بأدب بعد ما نبرة صوتي اتغيرت

ناحيتهأ، طب أنا أساعدك إزاي؟

من عادة المشرحة إنها بتكون باردة جدا عشان الجثث اللي فيها تفضل في حالة سليمة، على حد علمي يعني، لكن مكنتش متصور إنها هتكون بالبرودة دي، البرد بيدخل في عضمي والغريبة إن أميرة واقفة عادي مش حاسة بأي برد مع إن هدومها أخف من هدومي، أنا كان نفسي أتنفض من البرد بس ماسك نفسي بالعافية عشان منظري قدامها

سألتهأ وأنا ببص حواليا هما فين؟ قالتلي مين؟

قولتهأ اللي هنمثل قدامهم إني خطيبك

قالتلي كل واحد موجود في مكان لوحده، وممكن أي حد فيهم يبجي في أي لحظة يعني، مش كلنا موجودين هنا

فضلت واقف مستني هنعمل أي ولا هنروح فين ولما لقتني ببص حواليا بملل قالتلي اقعد هناك وشاورتلي في ركن المشرحة على مكتب صغير وكرسى بلاستيك أصغر، وقالتلي اقعد انت هنا وأنا هروح أعمل حاجه نشربها، تشرب شاي معايا؟

الموقف كان محتاج مشروب سخن فعلا، بس محتاج أكثر مغادرة المكان بالكامل ولإن مينفعش أقولها كدا بعد ما وافقت على طلبها قولتهأ ماشي اشرب

اتمشيت ناحية المكتب وقعدت على الكرسي بالراحة لأن شكله ضعيف وممكن رجله تتكسر في أي لحظة

أميرة ابتسمت ابتسامة رضا كبيرة جدا وقالتلي مش هتأخر عليك وسابتني وخرجت

مفيش شغل ومفيش سكن وسيد ومشرحة وأميرة وشاي في صحة الميتين، فاضلك إيه تشوفه تاني يا فقري؟

كنت سرحان بكلم نفسي وتقريبا نسيت برودة المكان أو جسمي اتعود عليها، ولما خلصت كلام

مع نفسي لقيتني ببص تلقائي على تلاجة الجثث اللي قدامي

هي الجثة مسموحها تقعد في التلاجة كام يوم؟
طب يعني مفيش أي ريحة بتطلع منها لو قعدت فترة طويلة مثلا شهر أو شهرين ولا الجثة ليها
مدة معينة ولو زادت بيدفنوها على طول؟

طب مياخدوا الجثث دي يدوها لطلبة الطب يتعلموا فيها وفي الآخر يدفنوها, بدل ما الطلبة
بتروح تدفع للحفارين ويطلعولهم جثث من القبور وينتهكوا حرمتها

لكن لا لا أكيد ممكن فيه جثث قرابهم ببيجوا يدوروا عليهم ويلاقوهم هنا

هو الميت صحيح بيحس باللي حواليه زي ما الشيوخ بيقولوا؟ يعني الجثث حاسين بيا دلوقتي
وبوجودي زي مانا حاسس بيهم؟

بمجرد ما سألت نفسي السؤال دا سمعت صوت طاقة خفيفة, كأنك بتضرب حديدة بحديدة, أو
كأن حصل انزلاق في المفصلات بتاعة تلاجة من التلاجات, وفي نفس الثانية اللي سمعت فيها
الصوت وقفت مفزوع وأنا بفكر إن ممكن جثة من الجثث تكون بعتتلي إشارة أو إجابة على
سؤالي الأخير, يا ليلة سودة مسودة بسواد

قومت وكنت هجري من الخضة لكن بعد ثواني من التفكير نفسي أفنعتني إنها صدفة وياما
بتحصل معانا واحنا في البيت

، سواء مثلا مع الدولاب أو السرير أو الكنبه, أحيانا بنسمع منهم نفس الصوت, ونفتكره
عادي, مع إنه ممكن يكون عفريت كان واقف ولما تعب من الوقوف قعد على الكنبه من غير
ما ياخذ باله إنها هتعمل صوت وعمل الصوت دا, أو مثلا كان برّه الدولاب ودخل تاني فعمل
الصوت دا, أو كان نايم على السرير واتقلب على جنبه الثاني أو على ظهره وعمل الصوت
دا.

أميرة اتأخرت ليه؟

سألت نفسي وأنا لسه بفكر في الجثث, وبصراحة جي في بالي إنني أفتح تلاجة من التلاجات

واشوف جثة, ودي مش أول مرة أشوف جثة, أنا حضرت تغسيل جدي وعلى قد ما الموضوع كان رهيب ومهيب جدا لكن كان في أوله وبعد دقائق بقى عادي, أكيد برضو لو فتحت التلاجة وشوفت جثة هيبقى الموضوع صعب في البداية وبعدين هيبقى عادي, اتمشيت ووقفت في نص المشرحة وأنا باصص على التلاجات بفكر اختار أنهي واحدة فيهم, وياترى اللي هختارها هيكون جواها راجل ولا ست ولا طفل, هيكونوا عريانين صح؟

ممكن تطلع تلاجة فاضية, وأنا بفكر وبلف حوالين نفسي هنا وهناك ومش عارف ليه بصيت للمكتب والكرسي اللي كنت قاعد عليهم لقيتهم غيروا مكانهم, في الأول كان الكرسي البلاستيك لازق في الحيطه والمكتب قدامه مباشرة, دلوقتي بين الكرسي والحيطه حوالى نص متر والمكتب قدامه مباشرة بنفس المسافة اللي كانت قبل كدا, يعني إنا الاتنين شئ واحد واتحرك بعيد عن الحيطه بنفس الدرجة, قبل ما اخاف أو أفكر في أي حاجه سمعت صوت أميرة داخله.. من الباب وبتقولي الشاي

مردتش عليها وشاورتلها على الكرسي والمكتب اللي حطت عليه الشاي ولسه هسألها هما اتحركوا من مكانهم ولا أنا بيتهيئلي لقيتها بتسألني انت قومت من مكانك ليه وبتعمل إيه عندك؟

فكرت أقولها الفكرة المجنونة اللي جات في بالي من دقائق بس خوفت أحسن تزعل أو تفكرني شخص مهمل يعني وبلعب في أي حاجه وكان ممكن أعملها مشكلة لولا ما دخلت وأنقذت الموقف, بس هجاوب أقولها إيه يعني؟ كنت بتمشى؟ ولا بورترية عجبنى وقومت أتفرج عليه؟ ولا لون المشرحة واو ومين النقاش اللي عملهاكوا؟

ولما شافنتي مش عارف أقول إيه ابتسمتلي بخبث وقالتي خلاص خلاص فهمت, أنا برضو لما كنت جديدة هنا وجيت أول مرة كنت زيك كدا, كان عندي فضول أتعرف على المكان حواليا, الظاهر فيه حاجات بينا مشتركة

اجابتها ريحتني ومع ذلك معرفتش أتكلم, مسكت كوباية شاي عشان تجييهالي لكن قبل ما ترفعها نزلتها تاني وقالتلي بمكر إيه رأيك هوريك حاجة عمرك ما شوقتها ولا هتشوفها؟

سألته حاجة إيه؟ وانا عارف إن قصدها على جثة أكيد, قالتلي جثة جات هنا من كام يوم لكن إيه حاجه تحفة

هو أنا بقيت بارد ليه؟ ومش حاسس بخطورة الموقف اللي أنا فيه, هو الخوف راح فين؟
..سألت نفسي وأنا شايفها بنتحرك ناحية تلاجة من التلاجات عشان تفتحها

..أكيد أنا مش خايف عشان فيه ست في المكان, الراجل بيظمن برضو بوجود ست جمبه

أميرة فتحت التلاجة وشاورت بعنيها على الجثة وقالتلي تعالي شوف كدا, حاجه مبتاجيش هنا كثير, هنا بس بدأت أحس بالخوف, خفت أكثر مما كنت قاعد لوحدتي, اتشجعت واتمشتيت وأنا بقدّم خطوة وارجعها تاني لحد ما وقفت ورا أميرة مع إني كان المفروض اقف قصاها من الناحية الثانية للجثة, شوفت الجثة نائمة ونص جسمها مكشوف والباقي مغطى بملايه بيضة, الجثة كانت لشاب في بدايات العشرينات, جميل جدا بملامح أوروبية وشعر شبه أصفر, الشاب كان كانه نايم في هدوء وكان باين على وجهه مسحة حزن, وأكيد حزنه دا بسبب المواقف اللي عاشها واللي مات بسببها ولا إيه اللي جابه هنا؟ أكيد جريمة قتل, أو حادث غامض ولم يستدل على معلومات عن الضحية

ركزت مع نظرات أميرة للشاب وكانت عكس نظراتي تماما, كانت بتبصله كإنها بتبص للوحة فنية أو ساندوتش لذيذ, ومن غير ما تشيل عنيها من عليه ملامح وشها اتغيرت للحزن وقالتلي أكيد هيدفعوا فيه مبلغ كبير عشان ياخدوه للتشريح وأكيد كمان المسؤولين هنا مستنيين المهلة المسموحة لجثته تنتهي بسرعة دون التعرّف على هويتها عشان يقبضوا, المسكين دا الظاهر مرتاحش لا وهو عايش ولا هيرتاح وهو ميت

بعدها قفلت التلاجة واتجهت لواحدة ثانية من غير ما تتكلم وانا وراها, فتحتها وانا واقف وراها برضو وكانت فيها جثة طفل صغير, حوالي أربع سنين, بطنه مفتوحة من تحت رقبتة لحد آخرها, ومفیش ولا أي عضو من الأعضاء الداخلية في بطنه, كانت فارغة تماما لدرجة إني شوفت ضلوعه وانحناءاتها, كان شبه الخروف لما بشوفه متعلّق عند الجزار وجاهز للتقطيع, نظرة واحدة للطفل كانت كفيلة بإنّي ارجع لورا وحطيت إيدي على بوقي وكنّت هرّجّ وحاولت أسيطر على نفسي بقدر الإمكان, سمعت صوت أميرة من ورايا بتكلم نفسها

أكد لقيه عند تجار أعضاء بعد ما قبضوا عليهم، وطبعاً ولم يستدل على الجثة، وسكنت شويه.
وقالت وهي بنتهي كلامها، يا حسرة أبوه وأمه عليه.

قفلت التلاجة بهدوء وفجأة نبرة صوتها اتغيرت وقالتلي تعالا اوريك واحد ربنا يحرقه في جهنم يارب، وبقت تخبط رجلها في الأرض من شدة الغضب يعني وهي رايحة ناحية تلاجة وفتحتها بعنف يخالف حرمة الميت من وجهة نظري، وقالتلي تعالا شوف، أهي أمثال الناس دي موتها أحسن، الستات والبنات مبيسلموش منه لا بره ولا جوه، شوف ميّت ازاي؟ مش لو كان عايش كان أحسننا، بصراحة مفهمتش حاجه لكن كلماتها شجعتني والفضول قتلتني عشان اعرف الميت دا عمل إيه أو اشوفه على الأقل، ولأول مرة وقفت قصادها من الناحية الثانية من التلاجة مش وراها زي المرايةت اللي فاتوا، راجل أربعيني حليق الدقن بشنب كثيف، فيه بدايات صلح بتتكون على راسه وصدرة مغطى بكمية لا بأس بيها من الشعر، آخر ما بصيت في كل حنة فيه سألتها ماله دا عمل إيه؟

قالتلي دا تاعبنا كلنا هنا تخيل إنه إنه، فضلت باصصلها مستنيها تكمل لكن الكلام وقف على لسانها ومرضيتش تكمل وسكنت، وبسرعة غيرت الموضوع بابتسامه وقالتلي تعالا هوريك جثة ست مش طايقاها ومستنيه ياخدوها من هنا بفارغ الصبر، وراحت فتحت التلاجة وانا بسألها ماله الراجل دا؟ قالتلي بس تعالا شوف دي وهقولك ماله الراجل تعالا، وقفت جمب التلاجة وبصيت على الست اللي قدامي، كانت في الثلاثينات أو أواخرها مش متأكد، رفيعة نسبياً وملامحها حادة ومن خبرتي بقراءة الوشوش حسيت إنها لما كانت عايشة كانت ست مش ساهلة، قبل ما أسألها مالها قالتلي دي غيارة ومبتحبش غير نفسها وعاوزه تاخذ اهتمام الناس كلها لوحدها، كنت هسألها هو انتي ببيعتوكي تعيشي مع الناس قبل ما تموت ولما يموتوا تيجي تعملي تقارير عنهم هنا ولا إيه؟ اصل لو حكنتي عن واحد بس كان ممكن افكر إنها كانت !تعرفه قبل ما يموت أو بنتشبه عليه لكن كل ما تفتح تلاجة جثة تحكي لي حكايتها سألتها إنتي عارفة الحاجات دي كلها منين؟

كانت بتبص للست بقرف ولما سمعت سؤالي بصتلي وهي بتبتسم وقالتلي هجاوبك، ولا اقولك هخليك تعرف بنفسك لما تشوف الجثة دي.

اتمشت ناحية التلاجة وبصراحة نبرتها وكلامها خلوني أفق للحظات قبل ما اشوف الجثة اللي

فتحت تلاجتها، خصوصا كمان إنها بعد ما فتحتها وفتت باصة عليا مستنياني أروح عندها، نظرتها كانت غريبة وغير مفهومة، كانت أكثر نظرة جدية شوفتها في عنيا لحد دلوقتي

قرّبت من الجثة بترقب وأنا بفكر إيه اللي ممكن يكون غريب في الجثة دي عن الجثث اللي فاتت؟ لكن لما قرّبت منها عرفت السبب لإني بعدها رجعت لورا وأنا مش مصدق، فضلت أنا وهي باصين لبعض للحظات وفي الآخر سألتها هو مات؟
قالتلي وانت فاكّر بعد الضربة اللي خدها منك هيفضل عايش؟

الدنيا لقت بيا وافتكرت بعدها الموقف اللي خلاني سبت الشغل، أو بمعنى أصح هربت منه، بعد ما اتخافقت مع المقاول بسبب تأخر الأجرة وكنت محتاج فلوس ضروري أبعثها البلد لكنه كان مقاول ياكل مال اليتيم، ويحلف على المصحف ورقة ورقة، ويأكل حقوق ناس، طلبت منه الأيام اللي اشتغلتها يعني مطلبتش منه سلفة زي ما ناس بتطلب وبيوافق لحبايبه بس أو لعصافيره بس، لكنه كلمني ببرود وعرفت إني مش هاخذ منه فلوس وكلمة مني على كلمة منه صوتنا بقى عالي، لكن صوته كان أعلى وكلامه أقدّر واتفاجئتت بيه بيشتمني بوالدتي، بعد ما سمعت الشتيمة تقريبا مسمعتش حاجه ولا شوفت حاجه كنت مُغيب عن الوعي، وفي ثواني رفعت الكوريك اللي في إيدي ونزلت بيه على دماغه ومن شدة الضربة وقع على الأرض ومسك دماغه وهو بيصرخ والعمال اتجمعوا حواليه وأنا سبت المكان ومشيت، وقولت عوضي على الله في الأيام اللي اشتغلتها وراحت عليا، رنّوا عليا كتير بعدها لكني مفتحتش على أي حد فيهم، كلهم عارفين إني مش غلطان وعارفين أخلاقي، وآخر ما زهقت كسرت شريحة التليفون.

أنا كنت فاكّره هيتعالج ويطلع بعد اسبوع ولا اتنين وكمان بصراحة هربت عشان الشرطة وسين وجيم وأكد هنتيجي في صفة فقولت أحنفي فترة لحد ما الدنيا تهدى والزمن بينسى.

فوقت من أفكاري وقولتلها كنت فاكّرها ضربة وتعدي، بصتلي بسخرية وقالتلي واهي معدّتش يا أستاذ

بعدها اتحركت مش عارف راحت فين وسابتنني مذهول وغرقان وسط أفكاري، يعني أنا قاتل؟
يعني البوليس بيدور عليا؟ يعني ممكن أدخل السجن واتعدم؟

نادت عليا وانتشلتني من وسط أفكارى ولما بصيت عليها لقيتها فتحت تلاجة تاني وبتشاورلي
..بدماعها يعني شوف دي كمان

فيه إيه؟ هو أنا قتلت حد تاني؟

رجليا بدأت تنتفض وانا بتمشى ناحيتها ونفسي كل دا يطلع حلم أو كابوس, وبمجرد ما قرّبت
منها لقيتها نائمة, رجعت بصيت للوش اللي واقف قدامي لثانية وللوش اللي نايم ثانيتين, بعدها
حسيت زي ما يكون.. عارفين الكهرا لما تمشي في الكابل كدا لأول مرة؟ أنا حسيت إن فيه
كهرا مشت في جسمي بنفس السرعة, وفي ثانية قلبي بدل ما كان بيدق بهدوء بقى يدق زي
الطبلّة, آخر مرة عنينا التقوا ببعض كان وشها خالي من التعبيرات كان مخيف ومرعب جدا
.كانه صنم وفيه روح

من سرعة انطلاقتي في الجري في أول خطوة كنت هتزلح لكن ربنا ستر وبأقصى سرعتي
وبخوفي وهلعي وضربات قلبي اللي زادت جريت ناحية الاستراحة مش عارف إيه وانا بتخبط
في الحيطان، مكنتش عارف أفكر في المقاول ولا في الجثة اللي قاعد معاها من الصبح؟
وبمجرد ما دخلت قفلت الباب على نفسي وانا بحاول آخذ نفسي ومش عارف أعمل إيه, وآخر
شوية طاقة كانوا فاضلين فيّا يادوب وصلوني وقعدوني على السرير بعد ما حيلي اتهد وبعدها
أغمى عليا أو معرفش إيه اللي حصلني؟

وكل اللي فاكره إن سيّد خبط عليا صحاني الصبح وقومت فتحتله وانا منهار وحكيته كل اللي
حصل معايا ومكانش مصدّقني

انتهت

غرفة الحاجة زينب

صديق ليا من الجنسية السورية عرف إنني بكتب قصص رعب فقرر يحكي لي قصة حصلت معاه شخصيا في سوريا, وقتها عمره كان 14 سنة, القصة حصلت معاه في البيت لما أهله كانوا بره وهو قاعد لوحده ويمكن سبب القصة دي وغيرها من اللي هحكيه إنه كان بيحاول يتعلم الإسقاط النجمي وقرأ فيه كتير عشان كان حابب يجربه.

قال لي في يوم من الأيام كانوا أهلي كلهم بره البيت, أبويا وأمي وأخواتي البنات وأنا قاعد في الأوضة بتاعتي لوحدي, بالمناسبة هو اسمه خالد.

وأنا قاعد سمعت صوت خفيف مكتوم جاي من أوضة الضيوف زي ما يكون ضحك مكتوم أو همس, في البداية مركزتش كويس لكن لما اتعاد أكثر من مرة بدأت ودني تلقائيا تبقى أقوى حاسة شغاله في جسمي لحد ما سمعت الصوت بوضوح واتفقت إن فيه حاجه غلط بتحصل في البيت, ولأنني كنت لوحدي وقتها بدأت أخاف لكن قبل ما اوصل لمرحلة الرعب قولت في نفسي يمكن أبويا مثلا جاي من بره وراح أوضة الضيوف ومعاه ضيف مثلا أو حد غريب, لكن اللي خلاني أبدأ أخاف من جديد هي ريحة الخشب المحروق اللي بدأت أشمها على خفيف في البداية لحد ما بقت قوية مش مجرد ريحة عابرة وخلص.

شجعت نفسي من جديد وقومت خارج من أوضتي واتجهت لأوضة الضيوف, خطواتي كانت ثقيلة وبطيئة وحاجة جوايا بتحذرنني وبتقول لي بلاش لكني كنت خلاص أخذت القرار, دا بيتنا! ولو خوفت منه هعيش فيه إزاي

وقفت قصاد الباب وإيدي مسكت المقبض وفتحته بهدوء, ومش هتصدقوني في اللي جاي, حرارة جسمي فجأة زادت جدا ووقفت مكاني متجمد مصدوم من اللي بشوفه قدام عيني, الأوضة اللي المفروض تكون فاضية شوفت فيها أربع أشخاص قاعدين على الأرض وبيلعبوا كوتشينة, صوتهم كان عالي في البداية وبعدين بدؤوا يهمهموا لبعض بصوت واطي كأنهم يعني عارفين إن فيه واحد واقف على مدخل الأوضة وباصص عليهم.

ملابسهم كانت معظمها أبيض وبشرتهم لونها رمادي باهت, وفي وسط لحظة الذهول واحد فيه بص وراه ناحيتي وقال لي تعالا ألعب معانا, عينه كانت واسعة بشكل مش طبيعي.

الصدمة عقدت لساني ورجليا ثقلت ومكنتش قادر أتحرك, كنت عايز ارجع لورا أو أقفل الباب من تاني لكني حسيت إنني كل خطوة بخطيها لورا كانت الأوضة بتاخذ خطوة ناحيتي لقدام كانوا مستمتعين بخوفي كأنهم بيتغذوا عليه وبصولي كلهم بعيونهم الواسعة وضحكهم المكتومة بدأت تعلا وتزيد, حسيت إن كل حاجه بتضحك عليا وتسخر مني حتى الجماد والحيط والكراسي كانوا بيضحكوا على خوفي

واحد من الأربعة رفع كروت الكوتشينة ناحيتي وقال لي لو لعبت معنا هتعرف كل حاجه ولو رفضت هتشف حاجات عمرك ما هتساها, وابتسمني ابتسامة لزجة عمري ما هتساها بصيت في الكروت واللي مكانتش كروت كوتشينة عادية, كان كروت مرسوم عليها وشوش مشوهة وعيون بتنزف وحيوانات بتتحرك زي البني آدمين

فجأة حسيت إن سيطرت على جسمي بدأت ترجلي بالتدريج ورجليا بقيت خفيفة رحت لفيت وجريت ناحية أوضتي من شدة الخوف مع إنني المفروض أجري ناحية باب الشقة, صوت أنفاسهم وضحكاتهم كان بيجري ورايا, دخلت أوضتي وقلقت الباب بسرعة وانا واقف ضهري للباب باخذ نفسي لأنني متهيئلي جريت خمسة كيلو مش كام متر قليلين, لحظات صمت.. بعدها "سمعت خبط خفيف على باب أوضتي, خبط خفيف منتظم كأنه بيقلبي" مش هتهرب مننا

فضلت قاعد ورا الباب بتنفض وجسمي كل بيتر عش, خفت أروح سريري أو أي مكان في أوضتي يروحوا يدخلوا عليا, لا خليني ورا الباب أحسن, مش فاكر المدة اللي قعدتها وأنا مستني حد من أهلي يبجي عشان يخلصني من الورطة اللي أنا فيها وأنا بلعن نفسي إنني مخرجتش معاهم لحد ما سمعت باب الشقة انفتح وأمي واخواتي البنات دخلوا, فتحت باب أوضتي فتحة صغيرة وبصيت عليهم عشان اتأكد إنهم فعلا أمي واخواتي مش مجرد حركات والأعيب بتتعمل فيا زي ما بشوف في الأفلام ولما اتأكدت خرجت أجري ناحية أمي وحضنتها وبكيت

أمي واخواتي البنات كانوا مذهولين من اللي بعمله وفضلوا لحظات مش فاهمين حاجه وأنا مكنتش عارف اتكلم واشرح كنت ما صدقت اطمنت بوجود أمي معايا.. بعد دقائق هدبت وأمي دخلت معايا أوضتي وحكىتلها كل اللي حصل

كان الإنزعاج واضح على ملامحها مش الرعب, افكرتها إنها هتخاف من الأوضة أو مش هتصدقني وهتقولي إننا عايشين من زمان في البيت ومحدث فيها شاف الحاجات اللي بحكيها دي وممكن تكون تهيؤات, لكن لما يظهر الانزعاج على ملامحها ومنتكلمش ولا تقولي حاجه دول خلوني أشك إن الموضوع كبير وفيه سر أنا مش عارفه, كإنها منزعة إنهم ظهرولي أنا مثلا والمفروض يظهر لحد تاني غيري, أو أنا لسه صغير عشان يظهرولي, واللي خلاني شكيت أكثر إنها قامت من غير ما تتكلم وراحت اتصلت بوالدي وقالتلي خليك انت في اوضتك. ومتخافش اللي حصل دا مش هيحصل تاني ولا هيتكرر

دخلت أوضتي بعد ما اطمنت شوية وأعصابي ارتاحت بوجود حد معايا في البيت, وبعد نص ساعة أول أقل سمعت باب الشقة بيتفتح وسمعت صوت أبويا بره ببسأل عني وهو مفزوع, ولما خرجت عشان اشوفه واطمنه عليا لقيت أمي خدته أوضتهم وقلت الباب وراهم, أنا كمان قفلت الباب ورجعت أوضتي تاني وبعد عشر دقائق أو أقل أبويا فتح الباب ودخل يطمن عليا وهو خايف جدا وعمال يتحسس شعري وجسمي عشان يتأكد إن مفيش عضو فيا ناقص أو متاكل مثلا.

سألته بعنيا عن تفسير للي حصلي دا, ماهو بعد اللي عملته أمي أكيد فيه سر أنا مش عارفه, بص في عنيا وفهم وكان واضح عليه التردد في الأول لكن حسم أمره وقال بحنان زي ما متعود منه, بص يا خالد أنت كبير دلوقتي واللي حصل معاك دا شئ طبيعي جدا, سكت شويه كإنه مكذب نفسه أو إن المفروض ميبدأش البداية دي وكمل كلامه, أوضة الضيوف واللي شوفته فيها ممكن يكون مرة وخلص مش هتتكر تاني فمتخافش منها, الأوضة دي قبل ما تكون أوضة ضيوف كانت عايشه فيها جدتك الله يرحمها, وكان بيتنا طبيعي جدا بس الشئ الوحيد اللي مكانش طبيعي إنها كانت لو ناوية تنام بره البيت لأي ظرف من الظروف كانت لازم تجيب صينية أكل فاضية وتحط على أطرافها أربع شمعات وفي النص تحط برغل وتدخلهم الأوضة وتروح مشوارها ولما ترجع البيت تاني يوم كانت تخرج بالصينية فاضية والشمع خلصان, حاولنا أنا وأمك نستفسر منها ونعرف سر اللي بتعمله دا ومين اللي بياكل البرغل لكنها كانت بتقولنا إنها بتحمينا من شرهم, ولو كانت جدتك هتنام بره البيت أكثر من

يوم كانت تخلي أمك وتشدد عليها إنها تحط الصينية والأربع شمعات كل يوم بالليل وتاخذها.
تاني يوم الصبح, أمك طبعا كانت بتخاف في الأول لكن مع مرور الوقت اتعودت

كنت بسمع أبويا وبقي مفتوح من الصدمة وشبهه مش مصدق اللي بسمعه, ولولا الأربعة اللي شوفتهم بيلعبوا كوتشينة في أوضة الضيوف مكنتش هصدق خالص, سألت أبويا بصوت واطي كدا يعني جدتي كانت بتشتغل في السحر والأعمال وتخلي الناس.. وقبل ما اكمل كلامي أبويا قاطعني فجأة بغضب على غير عادته واتمالك أعصابه وقال جيتك حجة وزارت بيت ربنا كذا مرة وعمرها ما أذت حد والناس كلها زعلت عليها لما ماتت, الحارة كلها عيطت إنت مش كنت صغير وقتها كان عندك تسع سنين يعني أكيد فاهم وفاكر اللي حصل

افتكرت فعلا جنازة جدتي, وقبل الجنازة حتى كنت بشوف حب الناس ليها وهما بيسلموا عليها ويزورونا في البيت لو مرضت, أبويا قام باس راسي وقال هروح آخذ حمام وانت اخرج يلا عشان نتعشى مع بعض, كنت جعان ومليش نفس في نفس الوقت, قعدت معاهم على السفرة أكل وأنا سرحان وبعدها دخلت أوضتي ونمت, وليلتها شوفت واحد من أربع الكوايبس اللي شوفتها في حياتي, ظهرولي فيه الأربعة مع بعض

كابوس مخيف جدا, كنت واقف في أوضة الجلوس لما كانت أوضة جدتي, وشايف سريرها ودولابها الصغير والصندوق اللي بتحط فيه حاجاتها, بس الجو كان كئيب جدا والأوضة كانت ضيقة جدا عليا كإني واقف جوه دولاب صغير مققول عليا وملوش باب

فجأة سمعت صوت جاي حواليا من كل مكان بيقولي "الوقت بيقرب يا خالد, الجدة عارفة وأنت دلوقتي بقيت عارف" بصيت حواليا في فزع عشان اشوف مصدر الصوت لكن مفيش, وفجأة وراسي عماله تلف في كل مكان شوفتهم.. شوفتهم بيطلعوا من الحيط كل ركن من أركان.. الأوضة الأربعة طلعتي منه واحد

أربع عفاريت خرجوا ليا من أركان الأوضة الأربعة وأنا واقف مكان في النص مش عارف. أتحرك ومش عارف إذا كان من الخوف ولا في شيء مثبتني وربطني في الأرض

بدؤوا يقربوا ناحيتي بنفس مسافة الخطوات كإنهم مربع كبير وبيتنقل عليا بالتدريج, بدأ أستكشف ملامحهم عن قرب وتتضحلي أكثر من المرة الأولى اللي شوفتهم فيها, وأكثر واحد

واللي كان مرعب بالنسبالي من بينهم كان بيمشي عادي وكل حاجه زيهم بس دماغه مايله علي جنبه الشمال وبيتكلم ويتحرك وهي بنفس الوضعية, مش بيعدها أبدا

بمجردا قربوا مني ووقفوا في نفس المسافة واللي كانت متر أو أقل بيني وبين كل واحد فيهم فجأة الأرض اتحركت تحتي وبدأت تلف, لكن الغريب إنهم ثابتين في نفس المربع اللي شكلوه في البداية, كان البقعة اللي وانا فيها بس هي اللي بتتحرك

وبدأت تقف قصاد كل واحد فيهم لمدة دقيقة عشان أشوفهم كلهم بالتدريج واتعرف على ملامحهم, ومن حسن حظي إن كلهم كانوا طالعين بهيئة البشر, مفيش بس غير عضو أو عضوين في كل واحد فيهم تعرف منهم إن البشري اللي قصادي دا مش من ضمن البشر, يعني عشان أقربلكوا الصورة كانوا متحولين لبشر بنسبة 80 في المية تقريبا

أول واحد الدائرة اللي تحتي وقفت قصاده كان أطولهم وأضخمهم, جسمه أبيض زي الثلج وعنيه وشفافيه مرسوم فيهم ابتسامة لزجة على طول كانه مولود بيها, بص في عنيا وابتسامته زادت كانه مستمتع باللحظة وغمزلي بعينه

في اللحظة دي أنا غمضت عيني من الخوف وفجأة الدائرة اللي تحتي اتحركت ووقفت قصاد الجن الثاني, كنت عارف طبعا إن دا اللي حصل وقررت ابقى مغمض عيني عشان الدائرة تكمل لفتها على الباب وتخلص من غير ما اشوف ولا واحد من الباقيين ويخلصوا واخلص من الكابوس دا

لكن الدائرة فضلت ثابتة مبنتحركش, فتحت عيني لقيتني واقف قصاد الجن الثاني, اللي راسه مايلة ناحية الشمال, فضل باصلي باشمنزاز كدا كانه مش حاببني أو مش مقتنع بيا, أو كانه جاي معاهم غصب عنه

الدائرة اتحركت قصاد الجن الثالث, كان الشعر مغطي كل جسمه ونظرته جامدة, مفياهش تعابير, شعر جسمه كان كثيف جدا وطويل كانه قرد على هيئة بشر واقف قصادي, الدائرة اتحركت من ثاني ناحية آخر واحد واللي كان أجملهم وأشبههم جدا بالبشر, ابتسامة هادية وهز دماغه كعلامة إنني أظن يعني, وفضلت باصص عليه اتفرج على ملامحه كلها, كان كانه غلطة وسطهم, وفجأة وانا بفحص كل حته فيه ومنبهر بجماله الدائرة اللي تحتي لفت بسرعة جدا ووقفت قصاد الجن الأول, وفي نفس اللحظة اختفت كل معالم أوضة جدتي اللي واقفين كلنا وسطها وبقينا واقفين في أوض سودة واسعة ملهش نهاية

الخوف رجعلي ثاني وعنيا في عين الجن الأول وبيبتسملني ابتسامته اللي بقت مستفزة وبعد ثواني من استمتاعه بخوف قال "هتنزل قبر جدتك, فيه عقد لابساها, طلعه خليه معاك لحد ما نقولك تعمل بيه إيه" وقبل ما ارد عليه ولا افهم حاجه أو هو كمان يقول أي كلام زيادة كل حاجه حواليا بدأت تتبخر وتختفي, حتى هما كمان اتبخروا وصحيت من النوم عرقان وريقي ناشف وجسمي كله بيتنفض من تحت, حمدت ربنا إني صحيت, شربت كل المياه اللي جمبي تقريبا وبصيت في ساعة التليفون

الحلم كله مكملش سبع دقائق من وقت ما سبت التليفون من إيدي ونمت, كنت فاكرك هلاقي! الساعة تلاته أو أربعة الفجر, قولت في نفسي لسه هنام ثاني واحلم بكوابيس ثاني

ثم فجأة افتكرت العقد اللي طلبوا مني أطلعه من قبر جدتي, إزاي هنزل اجيبه لوحدي! ولو مجبتوش هيحصل إيه! وأسئلة غيرها كثير فضلت أفكر فيها بعد ما النوم طار مني عيني, وبعد ساعات نمت وصحيت الصبح متأخر على غير العادة, كنت مرهق جدا وقررت أحكي لأمي واعرف منها إيه سر العقد اللي مع جدتي ومدفون معاها, ناديت عليا وردت عليا من المطبخ, خرجت من أوضتي وقبل ما ادخل المطبخ فجأة لقيت رجليا الاتنين ثبتوا في الأرض وظهرلي الجن الأول بابتسامته واللي كنت مريبة وعنيه فيها تحذير ورفع إيده وشاورلي بصباغة كعلامة (لا) وفضل ثواني واقف واختفى ورجليا اتفكوا من الأرض وظهرت أمي من وراه بتقولي مالك واقف ليه وبتحلق ليه كدا؟

أنا وقتها كنت بسأل نفسي هما هيطلعولي في الحقيقة كمان! هو أنا اتلعتت ولا إيه؟

أمي كلمتني ثاني ورددت نفس الكلام فقولتلها جعان عايز أفطر, وأنا لا جعان ولا ليا نفس... أفطر وقولت في نفسي الظاهر إن الأيام اللي جايه هتكون أسود أيام حياتي

عرفت وقتها إن الجن لو شافني هعمل حاجه هو مش عاوزها هيطلعي ويمنعني, فقررت أحكي مع أبويا واجرب زي ما قررت أحكي مع أمي ومنفعش, استنيتته لما رجع واستغلّيت فرصة إنه قاعد لوحده ببشوف نشرة الأخبار ورحت ناحيته وأنا ببص حواليا, لاحظت إني متلخبط وبقي متابعتي بعينه, وأنا ثانية ببص عليه والثانية اللي وراها بتلقت يمين وشمال, لحد ما قعدت جمبه والفضول عنده بيزيد, قعدت وهو لسه باصص عليا وبعد ثواني من الصمت سألتني فيه لكن شئ جوايا , حاجه ظهرتلك ثاني؟ كنت ناوي أحكي عن الحلم وعن الجن اللي ظهرلي فيه

منعني, فقولتله لا مفيش بس بحلم بعقد غريب كدا وأحياناً بحلم إن جدتي بتظهرلي وهي ماسكاه, أبويا عنيه بحلقت وفضوله زاد أكثر وسألني بلهفة, جدتك قالتلك سر العقد دا إيه؟

مثلت البلاهة وقولتله هو العقد دا وراه سر! قالي آه وبعدين قال لا وبعد ثواني قال احنا كنا شاكين في العقد دا أنا وأمك, جدتك على طول لابساه ووصتنا إنها لما تموت ندفنه معاها وهي لابساه, كنا الأول فاكرينه عقد عزيز عليها, لكن لما شددت علينا في أيامها الأخيرة ووصت إنها تدفن والعقد في رقبته فضلنا أنا وأمك نحاول نعرف سر العقد دا إيه, لكن هي مكانتش بتقول حاجه وكمان تعبها في أيامها الأخيرة مكانش بيخليها تتكلم كثير فمعرفة فاش منه عنه أي شئ, اليوم اللي ماتت فيه زي ما تكون كانت عارفه إنها هتموت, نادت عليا وشدت على إيدي وحذرتني لو منفذتش وصيتها

وبالفعل بعد ما ماتت واتغسلت حطوا العقد في رقبته ودفناه معاها, هزيت دماغي ومثلت إني بتفرج معاه على الأخبار وأنا عشرات الأسئلة بتلف حوالين دماغي, ياترى سر العقد دا إيه؟ هل يستاهل إني أغامر وأنزل القبر آخده من جدتي, يا ترى هيبقى زي خاتم سليمان كدا ولو لبسته الجن هيكونوا تحت أمري وغيرها مع الأسئلة مع شوية خيالات كدا اللي خلوني مسمعش أبويا وهو بيكرر السؤال أمك طبخه إيه النهاردا؟ وفي الآخر هزني في كتفي وعاد السؤال تاني فقولتله مش عارف, وقومت دخلت أوصتي وبمجرد ما دخلت وقفلت الباب لقيت الجن الرابع قاعد على سريري وبيصلي بابتسامه, أنا طبعا خفت من الصدمة في الأول بس بعدين الخوف بدأ يمشي بالتدريج لاني اتعودت عليهم خلاص, وقولت في نفسي كويس إنهم -بعطولي أحسن واحد فيهم -من وجهة نظري

قالي وهو لسه مبتسم احنا مش هنطلب منك أي طلبات تانيه, خد العقد خليه معاك وهنقولك تعمل بيه إيه وخلاص مش هتشوفنا تاني, أنا قررت أظهرلك في الحقيقة عشان متخافش زي ما حصل معاك في الحلم

سألته طب ليه انتوا متاخدوش العقد بنفسكوا؟ قالي بعد ما علامات الجدية ظهرت عليه, مينفعش... لازم اللي ياخده يكون من الإنس ويكون قريب من جدتك وانت أنسب واحد من وجهة نظرنا, فيه حاجات كثير انت متعرفهاش, واحنا مش عاوزينك انت أو أي حد من العيلة, سكت لحظات وكمل, اعمل اللي طلبناه منك ومتخافش هنكون معاك في رحلتك للمقابر مش هنسبيك

هزيت راسي واقتنعت وهو بدوره رجع يبتسم من تاني, فجأة سألته بسرعة كإني فاكّر إنه خلاص كدا هيختفي وقولتله, ينفع أخلي الحفار يطلعه واديله فلوس؟ اتبخرت ابتسامته وقالني بغضب, العقد دا مينفعش أي إنسان يلمسه أو يعرف بيه غيرك, أوعى تستجيب لسذاجتك وتعمل حاجة تخليك تندم عليها العمر كله.

هزيت راسي في اقتناع للمرة الثانية وقولتله كإني تلميذ عنده, خلاص اروح المقابر امتي؟ رد عليا بسرعة كإني مستنيني أسأل السؤال دا وقالني يوم 19 من الشهر الهجري اللي احنا فيه ولازم تخلص مهمتك وتاخذ العقد قبل الساعة 12 بالليل دا عشان سلامتك وعشان سلامتنا احنا. كمان معاك.

بصيت في التليفون اشوف التاريخ كام لقيت إن يوم 19 باقي عليه 3 أيام بصيت ناحيته لقيته اختفى, بصيت حواليا ملقيتلوش أي أثر, رحنت قعدت على سريري أفكر في التلات أيام دول هل هما وقت كافي أخطط فيهم هدخل القبر إزاي! أنا بخاف اقرب من الجنازة لحظة الدفن عشان مشوفش الميت بالكفن وهما بيدخلوه في القبر, ثم مين قال إني هدخل القبر وكمان !!ووحدي

الساعة 10 بالليل كنت واقف قصاد المقابر, رهبة فظيعة صعب وصفها بالكلام, شكل المقابر وهي مرصوفة من الداخل بشكل غير مرتب والأشجار الجافة والورق الأصفر المرمي على الأرض كل دا زود من رهبة المكان وهيبته جوايا, دخلت وأنا بقول الدعاء, شمّيت ريحة الرطوبة, التراب تحت رجلي كان ناعم جدا, ياترى دا تراب عادي ولا فيه أجزاء من الناس اللي اتدفنت هنا من عشرات السنين! القبور ملخبطة والكلام المكتوب عليها منها كثير باهت وفيه حوائط كثير مشققة كإن المكان محدش دخله من سنين, الجو هادي جدا, هدوء مخيف, "مفيش غير صوت الحشرات وصوت الريح وهي بتعدي جمب ودنبي وبتهمسلي "متكلمش

رحنت ناحية أوضة صغيرة بيحطوا فيها لوازم الحفر وجرادل مياه قديمة وحاجات خردة معرفش الحفار بيستخدمها في إيه, أخذت كوريك عشان أحفر بيه, بعد ما طردت فكرة إني أخذ كوريك معايا وقولت في نفسي لو حد شافني ماسك كوريك ورايح بيه ناحية الجبانة أو واقف إقصاد بابها هيقولوا عليا إيه

رحنت ناحية قبر جدتي وكل ما اقرب منه أحس إن الأرض تحت رجلي بقت باردة أكثر من الأول, كإن الأرض نفسها بتقولني ارجع, القبر شكله قديم ومكتوب عليه اسم العائلة بخط باهت. متأكّل, سمّيت الله وقريت اللي حافظه من القرآن وبدأت أحفر المدخل

وبعد ما شلت التراب اللي كان فاضل أفتح المدخل اللي تحت الأرض واللي مبني بالطوب اللبن والطين, وبمجرد ما فتحت فتحة صغيرة ضربت مناخيري ريحة نفاذة قوية مخلوطة ببخور, حطيت إيدي على مناخيري بسرعة وضربت باقي الطوب برجليا شوية والكوريك شوية لحد ما وقعت منهم اللي أقدر عليه وقعدت جنب القبر عشان الهوا اللي جوه يتغير.. وعشان أنا كمان أخذ نفسي

اتجهت ناحية القبر بعد ما عدت أكثر من نص ساعة اعتقدت إنها وقت كافي للقبر عشان تكون الريحة اللي جواه اتغيرت, نزلت الحفرة اللي لسه حافرها ووقفت للحظات وعقلي بيراجعني إذا كنت أدخل ولا لا, فجأة لمحت الأربعة بعد ما بقوا ضخام جدا وكل واحد فيها واقف على ركن من أركان المقابر, طول الواحد كان بيتعدى الأمتار وبنفس الهيئة اللي ظهرولي فيها في أول مرة بس على شكل أضخم عشان اشوفهم واطمن بوجودهم

كنت شايف عيونهم وأنا واقف قصاد قبر دجتي, عيونهم كلها متجه ناحية وهما بيحاولوا يطمنونني بنظراتهم إننا معاك وجمبك

اتطمنت ووطيت راسي ودخلت المقبرة, بمجرد ما دخلت شميت الريحة اللي شميتها لأول مرة بس كانت أخف وممكن احتمالها لدقيقة أو دقائق أكون أخذت فيهم العقد وخرجت, وعلى نور الكشاف الصغير اللي طلّعته من جيبي شوفت الجثث مرصوفة تحت

كانوا ثلاث جثث, جثتين عبارة عن تراب والجثة الثالثة كان في طريقها للتحويل زيهم, واللي أكيد هي جثة جدتي لأنها آخر واحدة ماتت في العيلة, قربت منها وأنا بتفحصها بفضول لا إراديا, الجثة ملفوفة في كفن متآكل اتحول لونه للرمادي من تأثير الزمن, العضم كان مدهون بزيت أو مادة لامعة بتخليه يلمع لما نور الكشاف يمر عليه, مش عارف إذا كانت الناس كلها كدا ولا دي ميزة في جدتي اللي وراها سر مش عارف إذا كان هيتكشف لي ولا لا, الجثة مايله على جنبها تجاه القبلة والعقد موجود في رقبته

طرف العقد كان بيلمع فمسكته بأطراف صوابعي وأنا مشمنز وقافل بقي وعنيا مغمضة نص غمضة, بمجرد ما لمست لقيته بارد جدا, حاولت أطلع له بإيد واحد معرفتش, بصيت ناحية المدخل وحطيت إيدي الثانية عشان أساعد نفسي ومشوفش اللي بعمله مع إن إيدي كانت بتوصف لمخي كل المناطق اللي بتلمسها في الجثة

مسكت العقد بإيدي الشمال ورفعت الرقبة بالراحة اليمين وأنا بسمع طقطقتها في إيدي لحد ما أخذت العقد وجريت ناحية المخرج.

بعدت عن القبر مترين تلاته وأنا باخد نفسي ومش مصدق اللي عملته, حسيت بلذة المغامرة والانتصار, بصيت حواليا لقيت الأربعة لسه واقفين مكانهم ومرسومة على ملامحهم أشد علامات السعادة, ابتسمت زيهم وأنا ماسك العقد وفرحان يمكن أكثر منهم, الفضول خلاني أتفحصه ومش عارف إذا كان دا شئ هيعجبهم ولا لا, وجهت عليه ضوء الكشف, عقد مصنوع من خيوط ذهب رفيعة متشابكة مع بعضها بعقريية كإنها شبكة عنكبوت, فيه أحجار سوده صغيرة بتلمع بشكل عجيب كإنها مصنوعة من يومين مثلاً, وفي نص العقد فيه قطعة معدنية محفور عليها رموز عجيبة كإنها مصنوعة من سحر قديم.

حطيت صباغي عليها اتحسس ملمسها وفجأة شعرت بنبض بيمر منها ليا وسمعت في دماغي كلام وهمهمات غريبة بلغة أشبه بفحيح الأفاعي, بعدت إيدي بسرعة وأنا بفكر ياترى العقد دا وقوته إيه! وبمجرد ما الأفكار دي جات في دماغي وفي وسط تساؤلاتي فجأة لمحت إسرته إيه ظل بيتحرك حواليا بسرعة, بصيت شمالي ويميني ملقبتش حاجة, بصيت ناحية العفاريت الأربعة اللي كانوا واقفين من لحظات عشان يطمنونني بوجودهم لقيتهم اختفوا, وفجأة جسمي كله بدأ يتسحب ويرجع لورا ناحية القبر المفتوح, اترعبت, حسيت بخوف عمري ما حسيت بيه في حياتي, وأنا في مكان لوحدي وكمان في موقف زي اللي أنا محطوط فيه دا, حولت بكل طاقتي أتخلص من الشئ اللي ببسحني لورا لكنه كان أقوى مني بمراحل, كنت ببص ورايا للقبر وأنا مش عارف إذا كنت أنا اللي بارجع لورا ولا هو اللي بيتحرك ناحيتي عشان يبيلعني, فجأة افتكرت العقد اللي في إيدي وحسيت إنه ملاذي الأخير وبدون ما أفكر رحت لابسه حوالين رقبتني وقولت اللي يحصل يحصل كدا كدا شكلها نهايتي.

في الثانية اللي لبسته فيها كل حاجه وقفت, فجأة تقريبا الكون كله سكن, حسيت بدفء غريب وطاقة بتتدفق في جسمي, وعلى الرغم من الخوف اللي كان مسيطر عليا من لحظات لكني حسيت بسعادة غير طبيعية, مش عارف إذا كانت سعادة بسبب العقد ولا بسبب إني اتخلصت من القوة اللي كانت بتشدني ناحية القبر وقفت.

افتكرت القبر وبصيت عليه لقيته بيتسد بالتدريج والتراب بيرجع مكانه في حركة اوتوماتيكية, اتصدمت من اللي بيحصل ولما رجعت بصيت قدامي تاني شوفته.

شكله وهيئته زي البشر لكن مشوّه, جسمه طويل بشكل ملحوظ, عيونه مشعّة بلون أحمر متوهج كأنها شبّاك لنار داخل جسمه لا تنطفئ, نظراته باردة وفيها تهديد صامت, إيدّه طويله ونازلة لتحت ركبته مع صوابع طويلة مدببة زي السكاكين, جلده أسود متشقق وبتنبعث من الشقوق دي نور برتقالي كأنه كيان مصنوع من حمم بركانية.

اختفى لحظة وظهر في السما في ركن من أركان المقابر وحصل قتال لمدة ثانية واختفى وظهر في ركن تاني واتكرر نفس القتال بنفس التوقيت, أربع قتالات حصلوا في أربع ثواني والخامسة كان واقف قدامي وبيبصلي بنظراته الجامدة والخالية من أي شعور.

وقفنا أنا وهو باصين لبعض مش عارف أتصرّف إزاي أو المفروض اعمل إيه عشان يختفي من قدامي, حواليه هالة مخيفة من اللون الأزرق القاتم, وفي وسط الحيرة اللي أنا فيها افكرت العقد اللي في رقبتني, رحمت مسكته بشويش وقلعته بهدوء وأنا باصص ناحية الكيان دا وبمجرد ما خلعته من رقبتني اختفى.

أخيرا اتنفست الصعداء وبلعت ريقني وأنا بحمد ربنا على الموقف اللي عدا على خير وبعد ثواني بصيت حواليا وشوفت المقابر كإني نسيت أنا فين, الخوف رجعلي من تاني, اتمشيت خطوات قليلة وخوفي بيزيد بالتدريج وأنا متجه ناحية البوابة, شئ قالي البس العقد من تاني طالما خايف, الكيان مش مؤذي ولو مؤذي فهو أكيد مش هياذيني لأنني أنا اللي لابس العقد. والواضح إنه بيكون تابع للي بيلبس العقد أو بيسمع كلامه مثلا وبينفذ أوامره.

شئ تاني قالي لا بلاش تلبسه, المرة الأولى عدت على خير ومحدث عارف المرة الثانية ممكن يحصل فيها إيه, وبين خوفي من اللي حصل وخوفي من اللي هيجصل رحمت ناھي الصراع ولبست العقد.

في نفس الثانية اللي لامست فيها قلادة العقد لصدري لقيته ظهر قدامي, عيوننا اتلاقت لثواني بعدها زي ما يكون عرف اللي جوايا وإنني مستدعيه لحمايتي, اداني ظهره وارتفع عن الأرض وبقى فوقني, رجعلي احساسا بالطمأنينة من تاني واتمشيت ناحية المخرج وأنا واقف

الخطوة أمشي ملكا, وبدأت تتسلل في عقلي أفكار شيطانية, الغريب إنني كنت بفكر فيها بلذة ومتعة ومش عارف العقد هو اللي هياهالي ولا دي أفكار طبيعية بتيجي في دماغ البشر بمجرد ما يكتسبوا قوة أو سلطة كبيرة, وأنا معايا قوة وسلطة لسه مش عارف حدودهم

انتشلني من وسط الأفكار دي إحساسي إنه اتحرك من فوقني واتجه لمكان معين وعيني تلقانيا تابعته كإني مربوط بيه, ظهر فوق قبر بعيد عني لمدة ثانية أو اتنين ورجع تاني وهو بيقولي "أنقذتك للمرة الثانية" صوته تخين جدا وعميق ومخيف في نفس الوقت, بصيت فوقني وسألته "بخوف إنت بتتكلم! رد عليا بعد ثواني كإنه مستسخف السؤال وقالني "طبعاً

سكت شويه وتابعت المشي بعدها سألتها اسمك إيه؟ قال "أشرم" صوته كان واضح جدا كإنه بيتكلم جمب ودني أو جوايا, مسألتوش عن شئ تاني بس أعجبت باسمه وكررته في سري! مرتين وأنا بفكر يا ترا دا معناه إيه

خرجت من المقابر ورحت ناحية البيت, مفيش حد في الشارع, الدنيا هادية جدا, طلعت الشقة وفتحت الباب وبمجرد ما شوفت اللي حصل وقعت على ركبتي من الرعب

الشقة حرفيا مفيش مكان فيها سليم, كل شئ على الأرض ومكسور, جريت ناحية أوضة أبويا وأمي ودوست على بابها اللي مكسور وواقع على الأرض ودخلت لقيت السرير واقع بيهم هما الاتنين ومدفونين في النص بين المرتبة والخشب, قربت منهم بهلع, كانوا بيتنفسوا بصعوبة كإنهم في لحظاتهم الأخيرة, أكيد اخواتي البنات حالتهم نفس الحالة دي هما كمان, فكرت أكلم البوليس أو الإسعاف لكن شئ جوايا فكرني بالسلسلة اللي في جيبي وبدون تفكير طلعتها ولبستها وظهرلي, مبصش حواليا ولا استنكر اللي حصل دا ولا اتكلم, كان باصص في عيني كإنه مستنيني أمره بشئ, بصلي باستمتاع وهو عارف اللي بيحصل جوايا وبفكر فيه, كان مستنيني أطلقه للشر

سألته وأنا مش متمالك أعصابي وبفكر في مصير عيلتي, تعرف مين اللي عمل كدا؟ قالي بمتعة "أعرف", سألتها تعرف تصلح اللي حاصل حواليك؟ رد عليا بنفس الرد, رحمت قولته صلح ودمر

اختفى من قدامي وبقيت أشوفه في هيئة طيف سريع جدا بيتحرك هنا وهناك وكل شئ على الأرض بيتحرك معاه, التكرس بيتصلح ويرجع مكانه والمقلوب بيتعدل ويرجع هو كمان لمكانه, وبعد دقيقة أو أكثر كانت كل حاجه في الشقة رجعت لطبيعتها, وقف قصادي تاني وقالني بصوته العميق "خليك لابس العقد متقلعوش ولو هتام دلوقتي نام بيه" واختفى

سمعت كلامه طبعاً وقررت أفضل صاحي وأنا لابس العقد, اطمنت على أبويا وأمي ورحت
كمان لاختواتي البنات, كل الأمور تمام, كلهم نايمين عادي كإن مفيش حاجه حصلت

قعدت على كرسي قريب من سرير أبويا وأمي عشان أفضل مطمئن عليهم وإن مفيش حاجه
هتيجي وتأذيهم, حطيت إيدي على القلادة وأنا فرحان بيها وبالقوة اللي كسبتها منها, وقعدت
طول الليل بفكر في اللي حصل واللي ممكن يحصل, لكن كنت مطمئن

بعد أقل من ساعة كان ظهر قدامي وقال "كل شئ انتهى" شكرته وقلعت القلادة وفضلت
برضو قاعد مكاني, وفي الوقت اللي متعودين يصحوا فيه كنت خرجت رحت أوضتي,
وغيرت هدومي واستحميت وأنا لسه بفكر في اللي حصل معايا, سيل مبينتهيش من الأفكار

خرجت من أوضتي كإن لسه صاحي من النوم ورحت المطبخ لأمي اللي سألتني صاحي
بدري ليه النهاردا, شكلك شوفت كوابيس زي اللي شوفناها أنا وأبوك؟ كوابيس! قولتلها أه
معرفتش أنا كوابيس انتوا شوفتوا كوابيس إيه؟

قالتلي أنا وأبوك حلمنا بنفس الحلم تقريبا, إن فيه ناس غريبة شكلها مرعب زي العفاريت
دخلوا البيت وكسروا كل اللي فيه وهاجمونا وكانوا هيقتلونا لحد ما صحينا في آخر لحظة,
حتى اختواتك البنات لسه خارجه من عندهم من شوية وشافوا نفس الكابوس, وأنت حلمت بإيه؟

نمت بعدها وجوايا شعور مزيج بين السطوة والخوف في نفس الوقت, فكرت في حاجات
كثيرم مكن أحققها بسهولة باستخدام العقد, وفي نفس الوقت في مشاكل كثير مكن نتعرضلها
سواء أنا أو حد من عيلتي لنفس السبب برضو, لكن إحساس السطوة كان أقوى من إحساس
الخوف.

نمت وحلمت حلم غريب جدا, حلمت إنني في مكان واسع ومظلم, كان زي قبة ضخمة محفوة
وسط الجبل, والأرض كانت مصنوعة من مادة لامعة كإنها زجاج أسود عاكس, وفي نص

القبة كان فيه مجموعة من الجن عاملين اجتماع, كل واحد فيهم كان قاعد على عرش مصنوع من مادة مختلفة, فيه اللي قاعد على حجر واللي قاعد على خشب متآكل واللي قاعد على ذهب باهت, ملامحهم هادية جدا وأشكالهم مش متشابهة

كل واحد منهم كانت له هالة خاصة محيطية بيه, وعيونها مليانة حكمة عمرها آلاف السنين, مكننش عارف اتحرك بس شايف بوضوح كل حاجه بتحصل قدامي, المكانش مكانش مخيف. وكانوا بيتناقشوا بلغة غريبة كلماتها ثقيلة, بعدها لغتهم اتغيرت وبدؤوا يتكلموا بلغتي

واحد منهم واللي كان تقريبا أكبرهم قال بنبرة عميقة ممزوجة بالغضب والحكمة "العقد دا تجاوز الحدود, مكانش المفروض يلمسه أي بشري

واحد منهم رد عليه بصوت هادي لكن مليان قوة " الخطأ مكانش خطأ خالد بالكامل, الجدة هي اللي فتحت الباب دا, وخالد بقى جزء من اللعبة, وخوفه على أهله هو اللي خلاه أمر أشرم "بالقضاء على العائلات الأربعة

رد عليه الجن الأكبر وقال " حلفاء الأربعة عائلات بيخططوا للانتقام ولو الحال استمر كما هو "عليه ميزان القوى هيتغير, والتدخل المباشر ممكن يؤدي لما هو أسوأ

رد جن تالت " خلاص نبعثله مرسل, شخص يقدر يحذره وينذره دن جرح القوانين المتفق "عليها مع البشر

كلهم كانوا بيتكلموا عني وبيناقشوا اللي حصل معايا خلال اليومين اللي فاتوا, مكننش أعرف إن الموضوع خطير للدرجة دي, كنت عاوز أهرب منهم, اتمنيت كل اللي حصل دا يكون مجرد كابوس طويل صحيت منه كذا مرة ومازلت مستمر فيه

فجأة كلهم بصوا ناحيتي, إحساس رهيب من الخوف, نظراتهم كانت تقريبا بتخترقني, بتخترق تفكير وجسمي وكل شئ فيا, أكبر واحد فيهم قالي بصوت ثابت "خالد, الفرصة الأخيرة ستأتيك "فاختر بحكمة

فجأة الباب انفتح ودخل منه واحد من الجن ملامحه هادية ووشه مليان تجاعيد, عيونه كلها حزم وشفقة في نفس الوقت, وقف قصادهم في خشوع, الجن الأكبر أشار له وقال " اذهب أنت, لكن تذكر لا يمكننا التدخل أكثر " الجن هز راسه في موافقة واحترام ولف ناحيتي وهو بيتمشى بخطى ثابتة, وكل خطوة يخطوها كان شكله بيختفي تدريجيا, وأول ما مد إيده ناحيتي صحيت مفزوع

صحيته وأنا حاسس إنني لسه موجود عندهم, مكنتش نايم ولا حاجه, أنفاسي ثقيلة وجسمي مش متحكم فيه, الغرفة كلها هدوء غير طبيعي كأنها مفصولة عن البيت والعالم الخارجي

رفعت عيني ناحية الركن لقيته واقف هناك, ظهر لي بمظهر بسيط كأنه بشري لكن طويل جدا, عيونه مشعّة بلون فضي وجسمه مغلف بهالة بيضا خافتة

قالي بصوته الهادي العميق "جيت اديك رسالتهم, الطريق اللي انت ماشي فيه نهايته ظلام مش "ليك لوحدهك, لكن لكل اللي حواليك

وعلى الرغم من الحلم ووقوفه قدامي لقيت نفسي بقوله وأنا جوايا شئ متمسك بالعقد "ليه كل "دا؟ العقد مجرد قوة, ليه عايزين تاخدوه مني؟

المرسول قرب مني خطوتين وقالي بنفس النبرة "العقد دا مش قوة بس, دي جزء من ميزان بين عالمك وعالمنا, جدتك مكنتش بتستخدمه, انت اللي استخدمته, وكل مرة بتستخدمه فيها "الميزان بيختل أكثر وأكثر والاختلال نهايته الخراب

سكت لحظات وانحنى ناحيتي وقال بصوت أعمق "اختر بحكمة لإن اللي هتعمله مش هياثر عليك لوحدهك, هياثر على كل شئ" وقبل ما يختفي طلع من جيبي ورقة قديمة مدها ناحيتي, مسكتها وقلبتها في أيدي, ورقة مهترئة لونها أحمر ومكتوب عليها بخط ضعيف جدا "مش كل "فرصة تعتبر قوة, أحيانا التنازل عن القوة هو أكبر قوة

دخلت بعدها ي دوامة من الصراع النفسي, هل اسمع لنصيحة الجن ولا استمر في طريقة واستخدم العقد في كسب القوة والسلطة, أحاسيس صعبة لا يمكن وصفها, حسيت إنني هكون أقوى لو اتخلصت من العقد, وبمجرد ما قررت حسيت باطمئنان غريب, وجو الأوضة بقي أهدى.

بصيت في الساعة لقيتها تلاتة قبل الفجر, قررت أقوم واتخلص من العقد بعد ما حسيت إن المعركة الحقيقية هي مش مع الجن ولا العقد, المعركة الحقيقية هي مع النفس

نزلت أمشي في الشارع مش عارف أروح فين, لحد ما جات في دماغي المدرسة القديمة, مدرسة مهجورة ومفيش بيوت حواليتها, قررت تكون هي وجهتي واتخلص من العقد هناك

الطريق كان ضلمة, والهوا ثقيل, وكل خطوة كنت بحس إن العقد وزنه بيتقل كأنه رافض اللي نويت عليه

كل صوت حواليا سواء ريح بتتحرك أو كلب بينبح كان بيخليني أبص ورايا بسرعة, كان أشرم بيحاول يخوفني ويمنعني, وصلت لبوابة المدرسة, اتمشيت تحت السور لحد ما لقيت جزء مكسور قدرت أنط منه للداخل

صوت خطواتي على البلاط القديم اتردد في كل حته, كل ما اتحرك كنت بسمع همسات خافته بتطاردني, بدأت أجمع حطب من تحت الأشجار القديمة والهمسات صوتها بيعلى أكثر ويبقى أوضح.

وقفت في نفس الساحة وحطيت الحطب على الأرض وولعت فيه النار عشان أرمي العقدة فيها, وبمجرد ما طلعت العقدة من جيبي إيدي اترعشت, حرارة العقدة زادة جدا, حاولت السيطرة عليه وقربته وأنا حاسس إني بزاد قوة في كل ثانية بتعدي, قربته ناحية النار وفي نفس اللحظة حسيت بألم رهيب في صدري, كان أشرم بيحاول يسيطر عليا للمرة الأخيرة

قبل ما ارمي العقدة في النار فجأة ظهر أشرم جنب النار وصرخ فيا بغضب "انت فاكر انك هتقدر تتخلص مني؟ أنا جزء منك, العقدة مش مجرد قطعة, دا انت

حسيت بخوف وجاتلي فكرة إني لو حرقت العقدة ممكن أنا كمان أتأذي وفي اللحظة دي ظهر المرسل جمبي وهو بيطبطب على كتفي وبيشاورلي براسه يعني كمل اللي نويت عليه, حسيت بالقوة رجعتلي من تاني بعد ما لمسني ورميت العقدة في النار

أشرم كان بيحاول يتقدم ناحية النار لكن جسمه بدأ يتلاشى ببطء وصوته يختفي بالتدريج وهو "بيقول " دي مش النهاية, أنا هفضل جواك

انتهت.

الشيخ البغدادي والجن

"قصة حقيقية"

كثير منا سمع قصص رعب لحد ما بقت القصص كلها عادية ومتشابهة, لكن القصة اللي أنا جايها لك دي هي أغرب قصة سمعت عنها, قصة حقيقية تشيب الراس, لكنها كبيرة شوية .. فاستحملوني

.. القصة حصلت في تونس مع إمام مسجد اسمه البغدادي

الشيخ البغدادي بيحكي وبيقول إن تمت دعوته هو وشيخ آخر لأحد المنازل في منطقة تونسية .. قديمة لقراءة القرآن ورقية البيت من هول الحوادث اللي حصلت فيه

وصل الشيخين للبيت واللي كان عبارة عن بيت قديم جدا يسكنوه ناس فقيرة, العائلة مكونه من أرملة وأولادها الاتنين, حالتهم فقيرة ومعاهمش يسكنوا في مكان

تاني غير بيتهم دا, الولدين كان فيهم واحد مجنون

الشيخ البغدادي سأل الأم عن سبب جنون ابنها فقالتله إنه كان بعقله وبصحة جيدة لحد ما في .. يود دخل سرداب في منطفة اسمها الدواميس واختفى هناك

بحثنا عنه في كل مكان لدرجة إننا بعد ما تعبنا من البحث شكينا إنه اتخطف أو اتقتل لحد ما فقدنا الأمل واستعوضنا ربنا, وبعد سنتين

من اختفاؤه ظهر

بعد ظهوره كان زي مانت شايف فاقد عقله وبيعاني من نوبات صرع, لكن المخيف إنه بمجرد دخوله البيت بدأت تحصل عندنا حاجات غريبة

البيت سكنت فيه ناس تاني غيرنا, كلهم مختفيين, بنسمع صوتهم خلف الجدران أو تحت الأرض, وساعات بنلاقي شعر وقادرات

.. وحاجات كثير مش تخصنا

وبعد ظهور ابني بأيام واحد جيرانا ساكن قصادنا قالنا إنه شاف من شباك بيتهم ناس بتتحرك في بيتنا, الناس دول مش ظاهر منهم غير نصهم

..العلوي فقط

الشيخ البغدادي كان متعود على الأحداث دي وبينما هو بيسمع من الأم شاف الابن الأصغير عنده سن مكسور في مقدمة أسنانه

ولما سأله عن السبب راح الابن قاله إني في يوم كنت في الدور العلوي بصلي المغرب في أوضتي, ولما خرجت منها عشان أنزل للدور

الأرضي شوفت في الممر قط أسود غريب عننا, والأغرب إن رأسه كانت عكس جسمه فافتكرته ميت, مكنتش أعرف مين اللي جابه

هنا أو إيه اللي جابه, مسكت عصايه وضربته بخوف عشان اشوفه حي ولا ميت, لكن بعد ما ضربته فجأة وقف وبص في عنيا بصة رعبتني

نظرته مكنتش نظرة حيوات لإنسان أبدا, وفجأة لقيته بيطلع أصوات غير مفهومة, زي ما تكون لغة, أصوات أول مرة أسمعها من قط وجري

..ناحية المطبخ واختفى هناك, جريت وراح وبحثت عنه لكنه فص ملح وداب

في نفس الليلة رجت أنام فحلمت إني قاعد بصلي ولما خلصت خرجت من الغرفة واتفاجئت بوجود واحد طويل واقف قدامي, لونه أسود

وماسك في إيده عصايه ووشه مليون غضب, وسألني إنت ليه لما شوفتني نايم هنا ضربتني؟ وراح ضاربني بمؤخرة بالعصايه اللي في إيده في بقي كسرلي السنة الأمامية

قبل ما الشيخ البغدادي يعلق على الموضوع راح الشاب حكاه قصة تانيه

قاله في يوم كنت نايم في غرفتي وسمعت حد بيخبط على الباب وبيقول اسمي, قومت افتح الباب ملقتش حد, رجعت سريري تاني وبعد دقائق صوت الخبط على الباب رجع أشد من الأول والصوت نادى عليا بنبرة أعلى, قومت بسرعة اشوف مين قبل ما يمشي وبرضو ملقتش حد

رجعت نمت وأنا بفكر في اللي بيحصل دا واللي بيحصل معانا من وقت ما أخويا رجع،
وسمعت الصوت ظهر من جديد خبط وحد بينادي، لكني أدركت إن الأصوات دي من باب
..الدولاب مش من باب الغرفة

ساعتها اتجمدت من الخوف وضربات قلبي زادت وجسمي بقى ثقيل جدا كأن لاصق في
السريير، وفجأة بهدوء دولابي اتفتح وخرج منه شخص قصير أصلع مش لابس هدوم، وفيه
شعر كثيف حول منطقة الوسط مغطي عورته وعينيه بتلمع لمعان غريب وبيمشي على إيده
..ورجله زي الحيوانات

وقتها اتجمدت مكاني حرفيا من شدة الخوف وعيني بس اللي كانت بتتابع المخلوق دا وهو
.. بيتحرك ببهدوء لحد ما خرج من باب غرفتي

..ساعتها الشيخ البغدادي عرف إنه قدام مشكلة جديدة غريبة ومواقف أول مرة يسمعاها
بعد ما سمعنا القصة العجيبة اللي بتحصل في البيت دا قررنا أنا والشيخ الجريدي إننا نسرع
..ونبدأ في القراءة ورقية البيت

وبمجرد ما قرأنا قرآن النور قطع عن المكان كله، لكننا فضلنا نقرا، بعدها سمعنا أصوات
وهمسات لناس بتتحرك حوالينا بس مش شايفينهم، بيتحركوا ويتنفسوا بغرض تخويفنا وبث
الرعب فينا لكننا مخفناش لأننا متعودين على حوادث مشابهة؟؟

فكملنا قراءة لحد ما النور رجع تاني، لكننا اتفاجئنا بوجود آثار أقدام كلها أوساخ ونجاسة
وروايح كريهة، الآثار دي مكانتش على الأرض زي ما أي حد ممكن يعتقد، المخيف إنها
..كانت على السقف، يعني اللي كانوا بيتحركوا كانوا في الأعلى مش على الأرض حوالينا

لما لقينا الموضوع اتطور طلبنا من الأم إنها تسيبنا وتروح تبات كام يوم مع حد من جيرانها
لحد ما نخلص، وفضل معانا الابن الأصغر اللي هو مش مجنون

في اليوم الثاني كنا احنا الاتنين بس أنا والشيخ الجريدي ومعانا الابن الأصغر وبمجرد ما بدأنا
قراءة ورقية راح الابن أغمى عليه، فحطيت إيدي على راسه وكملت قراءة وبعدها سمعنا
صوت ضحكات أشبه بنباح الكلاب، والعجيب إن الصوت كان جاي من تحت الأرض

نزلت براسي ووضعت وداني على الأرض فسمعت الصوت بوضوح أكثر, سألته إنت مين لكنه مردش, الصوت بقى أعلى فسألته بصوت أعلى لكنه برضو مردش, فلعننته, ووقتها "سمعت صوته لأول مرة وهو بيقول "اطلعوا من أرضي

وكملنا على الحال دا لحد ما الابن فاق من الإغماء وبدأ يتقيى, كان بيتقيى شعر

استمرينا على الحال دا أكثر من يوم ونفس المواقع الغربية بتحصل واللي اتعودنا عليها, لحد .ما حصل موقف أول مرة يحصل في حياتي

الأم جات واستأذنت تدخل الحمام لقضاء حاجتها, ومرت من الباب قدامنا, واحنا وقفنا قراءة يعني لحد ما تخلص وتخرج عشان ميحصلهاش حاجة في الحمام تأذيها. لكن بعد دقائق الباب, خبط تاني ولما رحت فتحت كانت الأم واقفة قدامي

يبقى مين اللي دخل من شويه؟؟

وفي يوم تاني وبعد وقت كبير من القراءة اقترحنا اننا نوقف قراءة ونرتاح شويه, وأنا من شدة التعب نمت, لكن لما صحيت ملقيتش حد معايا, كنت لوحدي في البيت, بصيت حواليا لقيت أبواب الغرف نص مفتوحة ومن خلفها فيه جن بببص عليا

وجههم كله غضب وكره, فكنت اروح وافتح الباب وأدور ملاقيش حد وبعدها مشيت

وفي اليوم الثاني عاتبت الشيخ الجريدي وقتلته لما مشيت مصحتنيش ليه كنت مشيت معاك؟

استغرب من سؤالي وقال لي انت مشيت قبلي بعد ما قولتلنا انك تعبان وعاوز ترجع بدري النهاردا ومش هتقدر تكمل قراءة

المهم كل قراءاتنا وأدعيتنا مجابتش نتيجة, لحد ما في يوم حلمت إنني في سرداب أسود ضيق, ولما حكيت للشيخ الجريدي قالي إنه هو كمان حلم نفس الحلم بالتفصيل, وعرفنا إن دي رسالة, طلبنا الأم وحكيهاها الحلم يمكن تعرف السرداب دا أو ممكن يكون موجود في البيت بشكل مخفي, راحت قالتلنا دا السرداب اللي ابنه اختفى فيه سنتين ورجع من هناك مجنون, فطلبنا منها توصف لنا مكانه وقررنا نروح لعلنا نلاقي حل اللغز هناك

الأم راحت معانا لمكان السرداب ودلتنا عليه وقولناها ترجع هي, الوقت ساعتها كان بعد الفجر, دخلت أنا والشيخ الجريدي ومعانا مصباح, لكن المصباح دا من شدة الظلام مكانش له أي فائدة

سرداب ضيق وسقفه منخفض وبعد حوالي عدة أمتار من المشي والانحناءات شوفنا قدامنا المخرج وكان مضيء, وبعد 10 دقائق وصلنا له, لكن لما خرجنا منه لقينا الوقت ليل كأن الفجر لسه مجاش, لقينا نفسنا في منطقة صحراوية قلبنا اتقبض بمجرد ما شوفناها, ولما بصينا خلفنا للمخرج اللي خرجنا منه لقيناه اختفي, الشيخ الجريدي حاول يحفر في الرمل عشان يلاقي المخرج لكنه مكالوش أي أثر كأن لم يكن

.. واللي حصل معنا بعدها كان يشيب الراس وأغرب من الخيال

عرفنا بعدها إن اللي حصل معنا دا من فعل الجن والسرداب اللي مرينا فيه ماهو إلا طريق ..بين عالم الإنس والجن أو مدخل من مداخله

الرمل كان في كل اتجاه, مفيش غير اتجاه واحد مفيهوش رمل وعلى مد البصر شوفنا بيوت قديمة وبيطلع منها لهب النار, فقررنا نتمشى ناحية البيوت دي عشان نكتشف لغزها لكن كل ما نمشي ناحيتهم ونقرب نلاقي نفسنا مبنوصلش كأننا مبنمشيش

فضلنا نمشي لحد ما تعبنا والليل لسه موجود وكنا بنستغفر لحد ما قربنا من البيوت, فجأة بدأنا نسمع أصوات مزامير وطبول وناس بتغني بطريقة كأن اللي بتغني حيوانات مش ناس عادية, ولما وصلنا لقينا ناس عريانة

واقفين بيرقصوا حوالي النار

واحد منهم جالنا وقالنا اقعدي هنا, فسمعنا كلامه وقعدنا لكن قبل ما اقعدي قولت بسم الله وبمجرد ما قعدت لقيت نفسي أنا والشيخ الجريدي وحدنا وكل اللي حوالينا اختفي, وقتها خفنا جدا ودي كانت أول مرة نخاف بالشكل دا, وبعدها سمعنا صوت حد بيمشي ورانا, ولما بصينا لقينا شخص ضخم راكب جمل شخص ضخم جدا والجمل اللي راكبه كان لونه كل أسود ووقتها سمعنا أكثر جملة رعبتنا, الشخص دا قالنا بصوت تخين جدا "إيه اللي جابكوا المكان دا؟" المكان دا محرم على بني آدم

حكينا له قصتنا راح قالنا البيت محدش هيخرج منه, والولد دا لينا عنده تار وسكنا البيت ومحدش هيطلعنا منه ارجعوا مكانكوا ومتاجوش هنا تاني, فقولنا المخرج اللي خرجنا منه اختفي وحاولنا بكل الطرق نحفر مكانه

لكن بدون فائدة

قالنا ارجعوا وهتلاقوا الحفرة مكانها, بشرط محدش فيكوا يلتفت وراه, واللي هيالتفت هيندم
بباقي عمره وشاورلنا على طريق رجوعنا

رجعنا لنفس المكان واتفاجئنا بوجود حيوانين بجسم كلب ورأس إنسان, بيحفروا في المكان
اللي حفرنا فيه ومخرج السرداب ظهر بعدها سابونا ومشيووا

نزلت أنا قبل الشيخ الجريدي وهو ورايا وفضلنا نمشي في السرداب لحد ما قربنا نطلع من
السرداب وقبل ما نخرج سمعت الشيخ الجريدي بيكلم والدته ووالدته بتكلمه, عرفت انها والدته
من كلامه معاها وفجأة سمعت صراخه وبعدها بثواني الصراخ سكت وسكت معاها الشيخ
الجريدي.

انا خوفت التفت خلفي وعملت بالنصيحة ولما طلعت من السرداب انتظرت الشيخ الجريدي
يطلع لكنه مطلعش, فضلت مستتية فترة طويلة لكنه مخرجش, ومظهرش تاني أبدا

فضلنا نبحث عن الشيخ الجريدي لكن بدون فايده والسرداب اختفى هو كمان, القصة اتشهرت
والناس كلها عرفتها فقاموا بهد البيت وبنوا مكانه مسجد وسموه مسجد محمد الجريدي

انتهى

الغريب إن بعد الحادثة دي بعدة أشهر, الناس عثروا على الشيخ البغدادي ميت في بيته والنمل
بياكل من راسه وكل أطرافه مخلوعة من جسمه

قصر الدميري

اكتشفت إن المستقبل في قنوات اليوتيوب, كنت أحيانا بشوف فيديوهات بتحسب أجور مشاهير اليوتيوب والتيك توك, الفلوس اللي بيكسبوها خيالية, وبتحسب بالدولار, فكرت في الموضوع كذا يوم لحد ما قررت آخذ الخطوة دي بس إزاي هجيب مشاهدات عالية وأنا لسه جديد! لازم فكرة تكون جاذبة للناس وفضولهم, وفي يوم كنت بتفرج على فيديوهات مختلفة على اليوتيوب وشوفت فيديو لواحد حاطط صورته ووراه بيت بالأبيض والأسود وتحتة عنوان جذبني جدا, فتحت الفيديو لقيت الشخص دا صاحب القناة بيعمل مغامرات في بيوت مهجورة, بيروح البيوت اللي بيسمع عنها إنها مسكونة وياخد كشاف صغير ويشغل كاميرا التليفون بتاعته ويبدأ يتجول في البيت, في الفيديو دا كنت خايف جدا وأنا بس بتفرج, نبضات قلبي زادت مع كل صوت وحركة بتحصل حوالين اليوتيوبر دا, كنت مرعوب يمكن زيه وأكثر, حاجات تقع فجأة وهو طول الفيديو يستغفر ويقول الله أكبر ويقرا آيات قرآنية, كرسي يتحرك, باب يتقلل بصوت عالي, لحد ما الفيديو خلص واليوتيوبر خرج من البيت.

دخلت على التعليقات لقيت ناس حالتها زي حالتي, خايفين ومستعجبين من شجاعة الشخص دا, وناس تانية بتقول إن كل دا تمثيل واستحالة كل الرعب دا يعدي على إنسان بدون ما يغمى عليه أو يلبسه عفریت أو يحصله أي حاجه.

الفكرة لمعت في دماغي, بعد ما شوفت عدد المشاهدات قريب من 3 مليون مشاهدة, وقررت أعمل قناة وأنشر فيها الفيديوهات دي, أكيد هتنتشر بسرعة, وهاخد عائد كويس, بس مشكلتي إنني خوّاف جدا, ومستحيل أدخل مكان مهجور لوحدي أو حتى لو كان معايا حد.

عاندت نفسي ودا طبع مش حلو فيا, لما بحتاج أعمل حاجه لازم أعملها, مهما كانت الظروف, وعصرت دماغي عشان ألاقي حل لغاية ما اضطررت إنني أدخل شريك معايا في القناة, كلمت يونس صاحبي وعرضت عليه الفكرة ورحب بيها جدا وكلامه كان كله تفاؤل وأمل لحد ما قولتله بس أنا مش هقدر أدخل, أنت اللي هتدخل وتصوّر وأنا بحكم إنني أحسن منه في الكمبيوتر فأنا اللي هيعمل القناة ويتابعها ويطورها ويرفع الفيديوهات ويربطها بحساب أدسينس وشوية كلام تاني كان واضح إنه مش فاهمه, دماغه سرحت في المغامرة نفسها والخوف اللي هيواجهه, بعدها بقيت أشجع فيه وأقوله إنت قلبك أقوى من قلبي شويه, أنا ممكن وسط الفيديو أهرب وأجري من البيت وساعتها مش القناة هتفشل... إلخ, كنت حاسس نفسي شيطان ببيوسوس.

وافق وموافقش في نفس الوقت, بس أنا بدأت أتعامل معاه على إنه وافق, وقعدنا احنا الاتنين نفكر في البيت اللي هنعلم فيه أول حلقة من حلقات القناة اللي هتكسر الدنيا

قربتنا فيه ثلاث أو أربع بيوت بتدور حوالهم الشبهات إنهم مسكونين, بيوت قديمة مبنية على طراز القصور البكوية, مهجورة وورثتها مش سائلين فيها عشان عددهم كبير ومش متفقين, منهم اللي عاوز يبيع ومنهم اللي رافض وبيحافظ على تاريخ أسرتهم وأمجادها

اخترت قصر عائلة الدميري, مبنى قديم في منتصف القرية تقريبا, وعلى شارع شبه رئيسي وحركة الناس بتقل عنده من بعد العشا, معظم أساساته خشبية والتراب مغطي كل ركن فيه, وبالليل بيكون مظلم مقارنة بالبيوت اللي حواليه فبيبقى أشبه بوحش هادئ في انتظار فريسته

حكايات كتير اتقالت عن القصر دا, ومواقف حصلت مع رجال وأطفال, وخاصة من الجيران, منهم اللي بيشوف بالليل عيون حمرا شبه الليزر بنتحرك في القصر, ومنهم اللي قال إنه كان راجع من الأرض زمان وشاف بقرة جميلة واقفة قصاده والسلسلة بتاعتها مفكوكة ولما سحبها وراه لحد البيت عشان ياخذها بمجرد ما وصل لقي نفسه ماسك سلسلة بس والبقرة مش موجودة, واعتقادات قربتنا أو معظم المصريين عموما إن أي بيت مش مسكون من الإنس وبفضل مقفول لفترة كبيرة فالجن الطيار اللي بيتنقل من بلاد لبلاد بياخد البيت دا مسكن ليه, عشان كذا أي حد عندنا بيشتري شقة أو بيت كان مقفول لفترة كبيرة بمجرد ما بيدخل بيحس

بقبضة في صدره وإنه مش مرتاح وأحيانا تحصل معاه مواقف خفيفة كذا من عمار البيت تعبيراً عن استاءهم لاقتحامه مسكنهم, فبيشغل قرآن بصورة مستمرة لكذا يوم لحد ما الوضع يبقى طبيعي.

لما يونس سمع اسم القصر رده ورايا بصوت تايه وتقريبا دماغه سرحت في نفس الحكايات اللي قولتهاكوا فوق, حددتله الميعاد يوم الاثنين بالليل, واتفقت معاه إننا هنتكلم مكاملة فيديو وأنا هسجل فيديو للشاشة بتاعتي وبعدين ننشرها, كنت عايز أظهر في الفيديو طبعا عشان يونس مياخدش الشهرة كلها لوحد بعد ما الفيديو ينجح.

وفي اليوم الموعد وتقريبا الساعة واحدة ونص بالليل كنت أنا ويونس واقفين قصاد القصر, الشارع فاضي وأنوار البيوت اللي حواليه مقفولة وكله راح ينام, معظم كلامي معاه في اللحظة دي إني بقوله التعليمات اللي هيعملها عشان نسجل كل حاجه, كنت بحاول أشغل عقله الباطن بفكرة غير فكرة رفض الدخول, أو الخوف من الجن والعفاريت.

طلعنا موبايلاتنا واتصلنا ببعض مكاملة فيديو وأنا بدأت الفيديو وحييت الناس اللي هنتفرج علينا وقولت إن صديقي يونس هيعملنا مغامرة مرعبة في قصر مسكون وبدأت أمدح فيه وفي شجاعته وإنه الوحيد اللي وافق يدخل القصر دا .. إلخ.

يونس حط التليفون في جيبه وبدأ يتسلق حائط القصر الطيني القديم, وفي أقل من دقيقة كان في الناحية الثانية من الداخل, طلع الكشاف بتاعه ووجهه قصاد فيديو التصوير وبدأ يتحرك داخل القصر وأنا بشوف كل حاجه بيشوفها بعد ما اتمشيت بعيد عن القصر وقعدت على أقرب مصطبة عشان محدش يشك في اللي بنعمله.

أول سبع أو تمن دقائق كانوا عاديين جدا, وبدأت أحس بالملل, يونس بيمشي في كل حته وبيصور أي حاجه قدامه وساعات يرجع لنفس المكان يصوره تاني, مكانش محترف زي الفيديو اللي شوفته للشباب اللي بيعمل مغامرات.

بالتدريج بدأت أسمع صوت نفسه وهو بينتنفس بصعوبة, وظنيت إنه من كتر الطلوع والنزول, لأنه ركب الطابق الثاني ونزل أكثر من ثلاث مرات, لحد ما بدأ يكلمني ويقول لي الجو حر جدا

هنا, الجو مكانش كدا لما دخلت.

بدأت أركز في الفيديو وزودت إضاءة الفون على الآخر وبدأت ألاحظ حاجات هو مش واخذ باله منها, كان بمجرد ما يبص فوق على السقف أو وراه والتليفون موجه ناحية الحيطه كنت بشوف ظل بيتحرك على الحيط وبعدها بثواني الظل بقى ظلال, لحد ما يونس في لحظة ما شاف الظل دا وصرخ صرخة كبيرة وراح يجري هنا وهناك زي المجنون, العجيب إني كنت سامع صرخاته في الفيديو لكن مش سامعها طالعة من القصر, القصر كان هادي جدا كإن مفيهوش حد, قربت من القصر ووقفت تحته وأنا شايف يونس وهو بيجري وبيصرخ وهو بيقولي الحقني فيه واحدة ست عجوزة بتجري ورايا, ويخبط في الحيطه يوقع يبص وراه ميلاقيش حاجه, بعدها يشوف طفل صغير خارج من الحيطه وهو بيضحك ويلعب ونظراته كلها جراءة وشجاعة بيجري ناحيته وأول ما يهرب منه ويطلع للدور الثاني يبص وراه ميلاقيهوش.

وفي الآخر يونس وهو بيهرب ومش عارف رايح فين طلع للدور الثالث بعدها للدور الرابع, لكن إزاي, القصر كان عبارة عن دورين بس, بدأت أرجع بضهري لورا وأبص على القصر من ثاني اللي أنا متأكد إنه دورين بس, وفعلا كان دورين بس, لكن السلاالم اللي طلعتها يونس مش عارف طلعتها إزاي أو لقاها فين! لحد ما وصل لمكان وبمجرد ما دخله فجأة الباب اختفى ويونس بقى قاعد وسط أربع حيطان مقفولين, وبدأت أسمع نبرة البكاء في صوته وهو بيتكلم ويستغفر, وأنا كمان كنت مرعوب زيه ويمكن أكثر منه, وفضلنا احنا الاتنين بنتنفس بنفس الصعوبة تقريبا, لحد ما بدأنا نشوف كلام على الحيطه اللي يونس موجه كاميرا التليفون ناحيتها:

" هذا عقاب من أقلق منا منا .. يمكنك الخروج فقط إذا وجدت النور مرة أخرى "

انتهت

حكاية صابر

حكاية العفريت دا مشهورة في القرية عندنا من زمان, جيل بيسلمها لجيل, الموضوع باختصار إن فيه واحد اسمه صابر لقوه ميت في الترة, نايم على ضهره في المياه ووشه باصص للسما وفيه نظرة خوف مرسومة عليه, أول واحد شافه كان رايح الأرض بتاعته الصبح بدري, وبمجرد ما شاف صابر بالشكل دا نزل من على الحمار ونزل يجري ناحية البلد وهو بيصرخ ويقول "صابر مات, صابر مات في الترة" وطبعا البلد كلها كانت صاحية اللي رايح الزرع واللي بيظفر وغيره, الناس كلها طلعت بره البيوت وسمعت منه اللي شافه, والخبر خلال أقل من ساعة كانت انتشر في البلد كلها

البلد كلها اتجمعوا عند الترة, طلعا الجثمان وراحوا بيه على البيت اللي كان مليون صراخ وعويل, مراته وابنه الصغير اللي مش فاهم حاجه بس ببيكي من العبايات السوداء اللي اقتحمت البيت وعمالين يصرخوا ويقطعوا في هدمهم, قرايب المرحوم والجيران وغيرهم من الحريم غسلوه ودفنوه في مقابر القرية كعادة أي ميت لكن بعد ثلاث أيام عرفوا إن صابر مش زي أي ميت.

واحد قال وهو بيقسم ويحلف بالطلاق إنه شاف صابر وهو ماشي في أرضه, أرض الراجل دا جمب أرض صابر على طول لازقين في بعض, بس شافه من بعيد وبعدها اختفى بسرعة واحد تاني برضو قال إنه شاف صابر بنفس الجلية اللي لقوه ميت بيها, كان مايش في الأرض وبيدخل بين القصب هنا وهناك في عز الصبح

.. واحد تالت كان بيسقي الأرض بالليل شاف صابر

ومن هنا حكاية صابر بقت على كل لسان والكلام زاد بين الناس لحد ما الشيوخ قالوا إحنا نفتح القبر نشوف الجثة فيها حاجه ولا لا يمكن حد سرقها أو مثلا عمل فيها حاجه وصابر بيطلعهم. عشان يساعده وبعدها عفريته ميظهرش تاني والحكاية تنتهي

أهل البلد بعد ما فتحوا قبر صابر يمكن يلاقوا تفسير للعفريت بتاعه اللي بدأ يظهر للناس, راحوا وقت العصاري ومعاهم الحقار واتنين منهم من اللي قلبهم قوي نزلوا معاه القبر عشان يشوفوا الجثة وإيه اللي ممكن يكون حصل فيها, الناس كانوا واقفين على مدخل القبر والثواني بتمر عليهم ساعات لحد ما التلاتة طلغوا واحد ورا الثاني وهما بينفضوا جلايبهم وقالوا مفيش أي حاجة اتغيرت, والحفار قال الجثة زي ما سبتها محصلش فيها حاجة والكفن محدش لمسها

الناس احتاروا في الموضوع ويوم ورا يوم بدؤوا يتعودوا وقالوا عفريت بيطلع زي أي عفريت, الأرض الزراعية أساسا كلها عفاريت وكل واحد له قصة مختلفة وحكاية تنفع فيلم, مع إنهم مقتنعين إن العفريت مش بيظهر إلا لما يكون الميت مقتول مثلا في حادثة عربية أو قطر, لكن الميت الطبيعي اللي مش بينزل منه دم وقت موته مستحيل يطلعه عفريت, بدؤوا يفكروا في علاقة صابر مع الناس يمكن يكون فيه بينه وبين حد مشاكل مثلا في الفترة الأخيرة أو أي شئ يستدعي القتل لكن مفيش, صابر من عائلة فقيرة وملوش قرايب ومن البيت للزرع للبيت لحد ما في يوم فيه تلات شباب من القرية قرروا إنهم يروحوا بالليل أرض صابر. ويقعدوا مستنيين العفريت بتاعوا ويشوفوا هيقولهم إيه أو هيعمل معاهم إيه

منهم اللي راح عشان قلبه ميت ومبيخافش من العفاريت ومنهم اللي راح عشان عنده فضول ولإنه مشافش عفاريت قبل كدا والأخير راح عشان بتاع بنات وعايز البلد تحكي عنه وعن شجاعته ويتفشخ قدام البنات اللي هيبصوله على إنه بطل قلبه ميت مش بيخاف من حاجة

اتفق سليم وناجح وخالد إنهم يروحوا هناك, كدا كدا أرض ابو ناجح جمب أرض صابر والمفروض إنه هيزقي الزرع بالليل زي ما أبوه كلفه وسليم راح معاه عشان مبيخافش واهو يونس ناجح ابن خالته والأخير خالد بتاع البنات

بعد صلاة العشا طلّعوا الثلاثة وناجح خد البقرة معاه عشان يربطها في الساقية واللي هيكون معاهم شغل كثير وهتفضل تلف لحد ما تزقي الأرض كلها وبالتالي طول اليوم كانوا مريحينها في البيت وحطولها الأكل والعلف المناسبين زي كل مرة فضلوا الثلاثة ماشيين بيحكوا عن صابر والحكايات الجديدة اللي طلّعت عنه في البلد اليومين اللي فاتوا, سليم كان مصدق موضوع العفاريات لكن لأنه مشافش عفريت قبل كدا كان فيه جزء منه بيكدّب الموضوع وساعات يقول في نفسه دي مجرد حكاوي الناس بتحكيها على المصاطب, خصوصا إن اللي شافوا عفاريات في البلد عددهم يتعد على الصوابع وجايز يكونوا كدابيين, أما باقي الحكايات فهي قديمة بتحكيها ناس عن ناس.

أما ناجح فكان مصدق الموضوع وبيتهيئله إن بمجرد ما حركة الناس تسكت في البلد بتبدأ العفاريات تطلع من أماكنها, اللي مقتول واللي مدبوح واللي اتحرق بالنار, أما خالد فمكاشش مصدق خالص مع إنه أكثر واحد جبان فيهم وبيحمد ربنا إن أبوه موظف في السكة الحديد وأرضه مخليها مع أخوه يزرعها ويحصدها وياخذ نصيبه منها في آخر السنة والباقي ياخده أخوه.

سليم وناجح بيحكوا وخالد بيسمع وبيبص حواليه لحد ما البيوت اللي حوالهم خلصت وبدأت تظهر التربة والأرض الزراعية, في اللحظة دي خالد وقف وقالهم أنا مش عايز أكمل معاكم, يلا نرجع.

سليم انفجر من الضحك وقاله نرجع فين ياد خليك راجل كدا متبقاش زي الحريم, وناجح تابع وقال نرجع فين أنا لازم أزقي النهاردا وإلا مش هيحصلي كويس مع أبويا.

خالد قال حريم حريم أنا عايز ارجع, رد عليه ناجح بسرعة وقاله لو عايز ترجع ارجع لوحدهك أو خد سليم معاك أنا هكمل, سليم قال بتحدي لا أنا مش هرجع, أنا عاوز اشوف العفريت وبص لخالد بلوّم وقاله لو عايز ترجع ارجع لوحدهك.

بطاً خالد من خطواته وهو بيراجع نفسه للحظات وقرر يرجع, لكن بعدها بلحظة عقله فكره بكل القصص اللي حكوها طول الطريق وقال يمكن لو رجعت لوحدي في الوقت دا يطلعني عفريت من هنا ولا من هناك ويكون أصعب من عفريت صابر, وفي الآخر تابع معاهم وهو بيقول في نفسه يطلعني عفريت معاهم أحسن ما يطلعني عفريت لوحدي واهو على رأي المثل, الحزن وسط ولاد العم فرحة

وقال خلاص أنا جي بس المهم نخلص بسرعة ونرجع بسرعة, سليم ضحك بسخرية على جملة خالد من غير ما يعلق عليها وناجح رد عليه بـ إن شاء الله, وكملاوا الثلاثة طريقهم بين الزرع وخالد كل شويه يبص حو اليه كأنه مستني مصيبة هتحصل في أي وقت

وصلوا التلات لأرض أبو ناجح, وطول الطريق باصين على أرض صابر اللي المفروض العفريت بيظهر فيها على كلام الناس, القمر كان مالي السما والأرض كلها مصبوغة باللون الفضي, لكن الغريب إن الجو كان ساكن خالص مفيش لا صوت ضفادع ولا حشرات من اللي بتفضل شغاله طول الليل

ناجح خد البقرة ناحية الساقية وربطها وسليم معاه بيساعده وخالد وراهم ببص ويتوقع أي هجوم مفاجئ

قعدوا واقفين لحد ما البقرا لفت كام لفة والمياه بدأت تطلع وتمشي في السبيل, التلاتة سكتوا للحظات وكل واحد فيهم جواه سيل من الأسئلة وكل حواسه شغاله ومستنيه أي حاجة غريبة تحصل

عدت ساعة وأكثر وهما بيحكوا لحد ما نسوا موضوع العفريت خالص وفجأة وسط الحكاوي سمعوا صوت حاجه بتجري في القصب زي ما يكون عجل مطلق ملوش صاحب, أول واحد سمعه خالد قالهم استنوا استنوا اسمعوا الصوت دا, في البداية الصوت كان خفيف لكن بدأ يبقى واضح وقوي جدا, سليم قال لناجح أنا هروح اجري الناحية الثانية لتكون بهيمة مطلوقة وتايهه عن صاحبها وناجح قاله أنا برضو

هقابلك من الناحية اللي قصادك وخالد وقف مش عارف يروح مع دا ولا مع دا لإن
اللي بيعملوا الاتنين من وجهة نظره يعتبر جنون

وقف مكانه مش عارف يتصرف إزاي وقبل ما الاتنين يبعدوا عنه فجأة شاف صابر
واقف بعيد على طرف الأرض بتاعته وبيمشي حوالين حدودها لكن مكانش بيمشي
كان زي ما يكون بيتزحلق على الأرض بسلاسة, الثلاثة شافوه في نفس الوقت
والثلاثة ثبتوا مكانهم من الخوف وراحوا يتابعوا العفريت بعينهم وهو بيتحرك
ويختفي داخل القصب

الثلاثة وقفوا مكانهم من الخوف وتابعوا العفريت بعينهم وهو بيدخل وسط القصب,
وبعد ثواني بدؤوا يسمعون صوت القصب وهو بيتكسر بسرعة شديدة وفجأة ظهر لهم
عفريت صابر قصادهم وقريب جدا منهم, كان بنفس الملابس اللي غرق بيها,
متسخة وكلها طين, نفس ملامح صابر مفيش حاجة متغيرة لكن وشه مش طبيعي,
وجسمه فيه شئ مش طبيعي أي حد هيشوفه هياخد باله منها من غير ما يعرف إن
دا عفريت, عنيه بقى لونها أحمر وكان باصص ومركز نظره على خالد اللي اتصدم
من المنظر اللي شايفه قدامه وبيتمنى الأرض تنشق وتبلعه في اللحظة دي

وزي ما يكون القدر استجاب لأمنيته لأنه فجأة حس رجله بتغرز في الأرض لحد
نصها كأنه واقف في طين ناعم وبعدها رجله ثبتت, قعد يصرخ ويزوم وسليم
وناجح مش قادرين يبصوا عليه يشوفوا إيه اللي بيخليه يعمل كدا, الموقف كان
مخلي عيونهم متثبته على العفريت

بعدها صابر لف جسمه وراح ناحية القصب تاني وفضل ماشي لحد ما اختفى وسط
القصب

في اللحظة دي سليم وناجح بدؤوا يتنفسوا أخيرا وسمعوا البقرة وهي بتدور في الساقية وبتجري بسرعة زي المجنونة عشان تتخلص من الحبل لكن من غير فائدة. وفضلت تلف في نفس الدائرة بنفس الجنان

الاتنين بصوا على خالد لقوا نص رجليه مغروسه في الأرض وبيحاول يشدها ومش عارف, كانوا بين خيارين إنهم يسيبوه ويهربوا أو يساعده ويهربوا الثلاثة مع بعض, كل واحد فيهم كان جواه قرار مختلف, سليم قرر يساعد خالد وناجح قرر يهرب ويسيب الأرض والبقرة وأصحابه ونفسه لو كانت موجودة كان سابها

لكن في اللحظة اللي الاتنين خدوا فيها القرار واحد ناحية خالد والثاني ناحية البلد فجأة رجليه مطاوعتهمش, كانت ثقيلة كإن مربوط فيها طن ومنتثبه في الأرض, ناجح من الخضة فضل يزوم ويصرخ زي خالد اللي سكت من لحظات وبيحاول يخلص نفسه وسليم مش عارف يتصرف إزاي في الموقف اللي اتورط فيه

وفي وسط الحيرة بتاعة الثلاثة فجأة سمعوا صوت حاجه بتخبط في التربة كإن واحد نط فيها, الثلاثة بصوا ناحية التربة في نفس الوقت وشافوا كلب أسود ضخم خارج منها, جسمه مغطى بالمياه والطين وبعد ما خرج من التربة بأمتار وقف وراح ينفذ جسمه بسرعة والمياه والطين بيتنفضوا منه في الناحيتين, قرب منهم بكل ثقة وابتدا بناجح, الكلب كان ماشي كإنه أسد, كإنه سيد الأرض الزراعية ومالكها والمتحكم فيها وفي ظروفها, قرب من رجل ناجح وهو بيشمشم فيها وفي اللحظة دي ناجح شعر جسمه كله وقف وحس ببرودة غريبة ورعشة بتجري في جسمه, كان نفسه يصرخ أو يبكي ويولول زي النسوان لكن مفيش ولا عضو من أعضائه متحكم فيه, اكتفى بس بنظرة الخوف والهلع طول اللحظات اللي الكلب فضل يشمشم فيه وواقف تحت رجليه

خلص منه وراح ناحية سليم, وعلى الرغم من قوة قلب سليم لكنه خاف, لكن مش نفس خوف باقي الاتنين, فضل باصص للكلب وهو بيقترب منه وبيشمشم في رجليه,

وعلى الرغم من البرودة التي حس بيها لكن العرق غطى جسمه كله ومعرفش
. يتنفس غير لما الكلب سابه وراح ناحية خالد

أول ما الكلب راح ناحية خالد سمعوا صوته بيصرخ بصوت عالي ويبيكي وفي نفس
اللحظة الكلب نبج عليه أكثر من مرة ووكان واضح إن خالد شايف حاجه في الكلب
. هما مش شايفينها

فضل يلف حواليه ويفتح سنانه كأنه عايز يفترسه ويزوم, فضل على الحالة دي
دقيقة أو دقائق كان فيهم خالد طاقته من الصراخ خلصت ومش قادر غير على
. النههة من أثر البكا

الكلب سابه ورجع ناحية المكان اللي كان واقف فيه صابر قبل ما يسيبهم ويرجع
للقصب تاني, التلاته باصين عليه ومتابعينهم بعينه وبمجرد ما وصل للمكان فجأة
. الكلب بقى يطول وشكله اتغير بالتدريج لحد ما بقى صابر

المشهد نفسه يحبس الدم من العروق, وبعد ثواني سمعوه بيقولهم "انتوا مش أول
"ناس تيجوا هنا بس ممكن تكونوا آخر ناس

سكت شويه واتقدم خطوتين ناحية خالد وكمل كلامه وقال "محدث يقدر يهرب, اللي
"جي هنا لازم يدفع الزمن, وخصوصا أبوك

في اللحظة دي سليم وناجح حسوا إن رجليه بدأت تخف بالتدريج وترجع لطبيعتها
ومن غير ما يفكروا جريوا ناحية البلد وهما بيصرخوا ويستنجدوا بالناس ومحدث
عارف هما بيقولوا إيه, البلد كلها صحيت وبعد ما الاتنين عرفوا يتكلموا وحكوا اللي
حصل البلد طلعت يشوفوا خالد واللي حصل فيه ويا ترى عايش ولا العفريت عمل
فيه حاجه, وطول الطريق كان أبو خالد بيجري زي المجنون ويقول هياخد ولدي
زي ما خدته, هيقتل ولدي زي ما قتله, محدش كان مهتم بكلامه لحد ما راحوا
الأرض ولقوا خالد واقع مغمى عليه وشعر راسه كله واقف, خدوه على البيت وبعد
أيام بدأ يفوق بالتدريج لكن مرجعش زي الأول غير بعد ما لف على مشايخ كثير
. وبرضو فضل يعاني من الحالة دي

أبو خالد طبعاً اتسجن بعد ما الناس عرفت إنه قتل صابر لإنه شافه مع واحدة من
البلد وكان خايف الموضوع يوصل لأبوها أو أخوها فيقتلوه, وقرر يقتل صابر
وميفضلش تحت رحمته.

مالا تعلمون

أنا ساكن قصاد المقابر, ومش عارف إذا كان دا من حسن حظي أو من سوءه من سوء حظي إن المكان له رهبة كبيرة, وأكد كلكوا حسيتوا بيها وانتوا داخلين المقابر لمجرد لحظات أو دقائق بتعيشوها وترجعوا بيوتكوا, أمّا أنا عايش اللحظة دي على طوول, ومن حسن حظي إني دايمًا بكون متعظ وبفكر في آخرتي في كل مرة أفتح فيها شباك أوضتي, ..لكني اتعودت المشهد

هحكيلكوا حكاية مش عارف إذا كنتوا هتصدقوني فيها ولا لا, دا شئ يرجع لكل واحد فيكم حسب تجاربه السابقة, والحقيقة أنا مش عارف هحكيها ليه! بس يمكن عشان تتعظوا وربنا يصلح أحوالكم

الخميس قبل اللي فات صحيت على صوت صراخ وأصوات خطوات وهمهمة, سألت نفسي وأنا لسه نايم على سريري متحركتش هي ليه الناس أحيانًا بتدفن بالليل! الجهل هيفضل مستمر! في القرية بتاعتي لحد امتي

ولأن صوت الخطوات كان عالي والصراخ كان أعلى قومت فتحت الشباك أشوف الجنازة. وكعادتي أستنتج جنس الميت وعمره, الموضوع بقى هواية عندي من كتر ما شوفت جنايز

أول استنتاج جي في بالي قبل ما أفتح الشباك إن الميت شباب, الأطفال والعجايز مبيصرخوش عليهم كدا, فتحت الشباك, جنازة عادية زي غيرها, بصيت في الناس عشان أخمن الميت ممكن يكون من أي عائلة

الغريبة واللي خلّاني صحصحت بسرعة غير معتادة إني معرفتش ولا واحد من اللي حاضرين الدفن. طب إزاي؟

ركزت تاني وتالت لكن من غير فائدة, زي ما يكون عقلي وقف

وشويه شويه بدأت أحس بغصة وضيقة بدون سبب وقلقت الشباك وأنا بقول لنفسي أكيد الميت أصوله مش من قرينتنا وساكن برّه ولما مات أهله جابوه يتدفن هنا أو دي كانت رغبته, لكن نفسي قالتلي أكيد له قرايب في البلد وأكيد المفروض البعض منهم يكونوا حاضرين وبالتالي. هتتعرف عليهم, اتجاهلت كل حاجه ورجعت سريري نمت

ليلتها حلمت بأغرب حلم شوفته في حياتي, حلمت إني طائر وبتفرج على الناس اللي كانوا بيدفنوا الجنازة, ولما قربت من القبر أكثر عيني اتفتحت من الدهشة والاستغراب مع بعض

الناس كانت بتدفن دمية طفل قديمة, ركزت في الدمية يمكن يكون طفل فعلا لكن كان شكلها دمية, دمية زي أي دمية عادية خالص, لكن المسؤولين عن الدفن واللي واضح إنهم هينزلوا يدفنوها كان شكلهم غريب جدا, كانوا أقزام أو أقرب للأقزام ومنهم اللي إيده أطول من رجله واللي دماغه أكبر من جسمه

كنت بتابع اللي بيعملوه والخوف بدأ يتسلل لقلبي بالتدريج وفجأة واحد منهم لمحني قبل ما ينزلوا المقبرة وشاور بعينه للي جمبي وبص عليا وبقوا الاتنين باصين ناحيتي

أنا لحظتها مبقتش عارف المفروض أعمل إيه؟

أنا إزاي طائر كدا أساسا؟

وقبل ما آخذ أي قرار شوفت واحد فيهم استعد عشان يهجم عليا, راح الثاني مسكه من إيده وشاورله بعينه على شباك الأوضة بتاعتي, وفي لمح البصر طار ناحية أوضتي ومن بعدها ناحيتي.

حسيت بالجاثوم كالعادة وسبته ياخذ راحته لإنني نسيت أعض لساني عشان أفوق نفسي وصحيت مفزوع

صحيت من النوم مفزوع، أنا متعود على زيارة الجاثوم مرة كل يوم أو يومين تقريبا, لكن اليوم دا مع الحلم العجيب دا كانوا مفزعين جدا مع بعض, افكرت تفسير قبل كدا قالتهولي صديقة مغربية عندها قبيلة من الجن عايشه معاها أو بمعنى أصح مولودة معاها, لكن دا مش

موضوعنا, عرفت منها حل كويس جدا بعد ما بحثت عن علاجه من الناحية النفسية والدينية والصحية والاجتماعية والتاريخية والجغرافيا وجربت كل الحلول بدون فائدة. قالتلي إن الجاثوم دا عبارة عن نوع من أنواع التحرش من الجن بالإنس, على حسب جنس الشخص. النائم يعني لو ذكر يبقى بتتحرش بيه جنية, ولو أنثى يبقى بيتحرش بيها جني وهكذا.

وقالتلي على العلاج بتاعه والصراحة كان نافع معايا لفترة كبيرة من الزمن, كان العلاج بالقرآن قبل النوم, ومن ضمن العلاج بالسور القرآنية اللي المفروض أقرأها في كفي وأمسح بيها جسمي قبل ما أنام هو قراءة سورة الزلزلة سبع مرات وتكرار كلمة "أشتاتا" سبع مرات. في كل مرة أقرأ فيها السورة.

خلال فترة الغدا مع أهلي فتحت معاهم موضوع الجنازة المزعجة اللي كانت بالليل, واتفاجئت !إني مفيش حد منهم سمعها غيري, بس إزاي ده أنا شوفتها كمان يعني مسمعتهاش بس

حتى أبويا قالي إنه لسه جاي من بره ولو كان فيه أي حالة وفاة أكيد كان هيعرف. عنده حق, احنا قريتنا صغيرة وبتنتشر فيها أخبار الجنائز والمصائب أسرع من أخبار الأفراح والمسرات.

هل كل اللي شوفته كان عبارة عن حلم؟
أحيانا بتحصل معايا, أكون بحلم وأصحي وأنام أحلم تاني وفي الآخر خالص أكتشف إنني كنت في حلمين مش في حلم واحد.

.اللي غير عادي إنني لما نمت تاني يوم حلمت بنفس الحلم
جنازة .. صوت خطوات .. صراخ .. بفتح الشباك وروحي بتطير فوق المقابر.. مشهد الدفن .. التلات أقزام .. واحد منهم يشوفني وتاني يهجم عليا .. جاثوم .. أصحي مفزوع وجسمي .عرقان ور عشة خوف بتسري في جسمي من تحت لفوق

!كدا الموضوع مش طبيعي, فيه حاجه غلط
كابوس بيتكرر مرتين في يومين ورا بعض دي عمرها ما حصلت معايا, ممكن أشوف

.الكابوس مرتين وتلاته عادي بس بيكون بين كل مرة والتانية شهر وممكن سنين

دخلت بحثت في جوجل يمكن ألاقي حل وللأسف نتيجة البحث اللي بتطعلي مع كل حلم ببحث عن تفسيره, وأي حاجه وكل حاجه, بخصوص العزباء مبروك هتتجوزي قريب, وبخصوص المتزوجة مبروك فيه ولد جاي في الطريق, ولو كنت أعزب يبقى خلال هانت وكلها فترة صغيرة وهتبقى من العشرة المليونيرات الأوائل وتتجوز فتاة أحلامك, ولو كنت متجوز يبقى فيه خير وزيادة في الرزق ومولود جديد لو مكانش معاك وكل سنة وأنت طيب

تفسيرات واهية بيكتبها واحد فاضي عنده وقت فراغ بيقتضيه على توزيع البشائر على خلق الله, بس كويس إنه بيوزع الأمل, خلّي الناس تتفائل أحسن ما يكتبلهم مصايب في نتائج البحث. ويرسم البؤس والكآبة على وجوه الناس

الحلم لما اتكرر للمرة الثالثة بدأت آخذ منعطف تاني في البحث, لازم أشوف حد من اللي بيّفهموا في الحاجات دي وأحكيه, شيخ أو معالج أو حتى دجال المهم حد ينفذني من الكابوس دا. اتصلت بصاحبي الوحيد ونزلنا القهوة اللي بنروحها مرة كل عشرين يوم أو شهر واتناقشنا في الموضوع وعرض عليا نروح للشيخ مرعي, هو مشي شيخ قوي يعني لإني عمري ما شوفته معانا في المسجد بس الناس بتناديله كدا وبيتمنوا بركاته

وبدون دخول في التفاصيل وكتابة مواصفات الشيخ مرعي وبيته القديم والمكان اللي بيستقبل فيه ضيوفه والشويتين اللي بيعملهم مع كل ضيف جديد.. إلخ لإن المهم في الموضوع واللي زاد من حيرتي أنا وصديقي إني لما حكيت لمرعي الحكاية لقيت عينه اتفتحت على آخرها كأنها عايزة تنظّبره مكانها, وفضل صامت للحظات شوفته فيهم وهو يبيلع ريقه أكثر من مرة ولما أخيرا نطق طلب مني بصوت مبحوح إني أوصفه المقبرة اللي بيحصل فيها الحلم دا, ولما وصفتهاله دهشته زادت أكثر لكنه اتحكم فيها وأخفاها بسرعة وقالي بنبرة فيها لا مبالاة بتخفي وراها سر كبير زي ما بشوف في الأفلام "هكتباك ورقة تاخداها معاك البيت تحرقها". .. وتتبخّر بيها وتستحمى بملح

قال شوية حاجات من اللي بيقولها لكل الناس ووصفات زي اللي بياخدوها كل الناس واهي لو.. نفعت يبقى الشيخ مبروك لو منفعتش يبقى المشكلة كبيرة والفوس اللي هتتدفع أكثر

معملتش ولا حاجة من اللي قالي عليهم واليوم الرابع حلمت نفس الحلم لكن بشكل مختلف,
تقريباً الحلم كان بيفسرلي نفسه

الكابوس في المرة الرابعة كان مختلف عن التلات مرات اللي فاتوا, صوت الجنازة والصراخ
كانوا عاليين جداً, ولما صحيت شوفت التلات أقزام موجودين معاً في الأوضة, أو بمعنى
أدق مربوطين

كل واحد فيهم إيده مربوطة ورا ظهره ورجليه الاتنين مربوطين ببعض, ومنظرهم مرعب
وهما لحظة بيان عليهم الغضب ويحاولوا يفكوا أنفسهم ولحظة تاني منكسرين مش عارفين
يتخلصوا من قيودهم. والدمية أو العروسة اللعبة مرمية على الأرض قدامهم

من هول الموقف كنت متفرج فقط, جسمي وعقلي رافضين استيعاب الموقف اللي قدامي,
وبطرف عيني شوفت شيخ ضخم قاعد على كرسي المكتب بتاعي, ملامحة ممزوج فيها القوة
والطيبة, شعره أبيض مختلط ببعض السواد, وبشرته مشرابة بالحمرة وفي عينيه قوة وثقة
عمرى ما شوفتها في مخلوق قبل كذا

وما بين حيرتي ودهشتي حسيت بقوة غريبة حركت جسمي خلتنى قومت من السرير واتمشيت
بخطى ثابتة ناحية الأقزام التلاتة وأنا مش خايف منهم, وطيت مسكت الدمية المرمية على
الأرض وبدأت أقطعها لحد ما وصلت للقطن اللي جواها, كل دا جسمي بيعمله بشكل لا إرادي,
الشيخ اللي قاعد تقريباً هو اللي كان متحكم فيا, ولما وصلت للقطن وشوفت الموجود فيه فهمت
كل حاجة

داخل الدمية فيه صورة لعريس وعروسة ليلة فرحهم, ومكتوب عليها بخط أسود مايل كلمات
كثيرة زي خراب, تفريق, كره, مشاكل, والصورة مقفولة بقفل ومرسوم مربع في نصها
مكتوب جواه حروف وأرقام

سمعت صوت الشيخ وهو لسه مكانه بيقول "مريم بنت سكينه" وصحيت بعدها من النوم

مكنتش خايف, صحيت مطمئن, بدأت الذكريات والأفكار ترجعلي من جديد, فيه عمل مدفون في المقبرة دي وكيان غريب بيحاول يعرفني عشان أنقذ الضحية, بس ليه أنا؟

فكرت كتير طول اليوم عن الحل اللي ممكن أعمله, أو أتصرف إزاي أو أقول لمين وفي الآخر اهتديت لفكرة لو مش هتتفعني مش هتتفعني, قررت أروح لحفار القبور وأحكيه يمكن يصدقني ويساعدني أتخلص من الكابوس ويساعد الضحية إنها تتخلص من العمل المدفون.

بعد صلاة العصر اتجهت للمقابر وفي نيتي أتكلم مع الحفار لكني لقيت ابنه هو اللي موجود, شاب في بداية العشرينات بيسقي الزرع والشجر الموجودين حوالين المقابر وبينضف الأوراق المرمية هنا وهناك بكل همة ونشاط.

اتشجعت أكثر إني أحكيه, احنا شباب زي بعض ولغة التواصل هتكون أسهل, سلمت عليه وكان ودود جدا والابتسامه أغلب الوقت مرسومة على وشه, قعدنا مع بعض وحكيتله عن كل حاجه من البداية للنهاية, ابتسامته اختفت بعد ما شاورتله على القبر اللي بشوفه كل مرة في الكابوس, لإني عرفت منه إن القبر دا آخر مرة اتدفن فيه طفل صغير عمره شهر وهو اللي دفنه بنفسه لإن الوقت كان ليل وأبوه أوكل له الدفن لأنه سهل وطفل صغير ومفيش ناس كتير حضرت الدفنه.

خلصنا كلام والشاب وعدني إنه هيكلم أبوه في الموضوع وإنهم هيفتحوا المقبرة يشوفوا فيها إيه من غير ما يستأذنوا من أصحابها عشان الموضوع دا بييجيب مشاكل في البيوت وبيوصل للخراب, خصوصا إن موضوع الأعمال دا بقى منتشر جدا وأكثر من مرة يشوفوا حد بالليل في المقابر بيحاول يدفن عمل هنا أو هناك, وبمجرد ما يشوفهم بيتحجج إنه بيزور حد من قرابيه أو أحيانا يجري منهم

شكرته وأخذت رقم تليفونه وخذ رقمي واستأذنت ومشيت وفي نفس اليوم بالليل حوالي الساعة
واحدة رن عليا وعرفت منه إن كان فيه عمل مدفون فعلا مع الطفل في اللفة اللي ملفوف فيها
واتخلصوا منه, والحمد لله ليلتها مشوفتش الكابوس دا ثاني

انتهت

جثة بإذن جمركي

الجثث ويتم شحنها في المطار من بلد إلى بلد زيتها زي أي نوع من أنواع البضائع مع الإحترام طبعاً, وبيكون ليها أوراق وتصاريح ومخلص جمركي بيخلص كل الأوراق والمستندات ..اللازمة عشان ياخذ الختم على الأوراق دي وبالتالي الجثة تطلع على الطائرة عادي

ومعلومة كذا على الماشي, سعر شحن الجثة بيبكون مكلف جداً, يعني لو تذكرة السفر بألف ..جنية, سعر شحن الجثة بيبكون عشر آلاف جنية كمثال يعني

والحكاية اللي هحكيها دي حصلت معايا من حوالي ثلاث سنين, كنت مخلص جديد وعاوز أتعلم كل أنواع التخليص سواء مأكولات ومشروبات أو أدوية أو لوازم رياضية أو أدوات مطبخ أو أي حاجة يعني, أي حد كان ببيجي يقولي عايز أخلصه كنت بخلصهوله, إجراءات كلها روتينية ومكررة ومع الوقت باخذ خبرة وبخلص كل يوم شحنات أكثر من اليوم ..اللي قبله

مفكرتش كتير لما اتطلب مني أخلص أوراق جثة, خدت الأوراق وألقيت نظرة سريعة على البيانات / م.ج العمر 33 سنة سبب الوفاة حادث خاطئ أثناء أعمال الحفر والبناء

والحقيقة سمعت كتير عن حوادث مشابهة حصلت خلال أعمال البناء, مغتربين كتير اتعرضوا للحوادث دي, أحجار ضخمة مثلا توقع على عامل فتؤدي لوفاته, أو الردم الخاص بحفرة عميقة ينزل على العمال في الحفرة دي بسبب نوعية التربة وسوء التقدير اللي كان من البداية, أحيانا الحوادث بتحصل بسبب الإهمال ودي بتكون مرّات قليلة جدا وأحيانا تانية بتحصل بدون سبب, قضاء وقدر بدون أي أخطاء من مسؤولي الأمن والسلامة

خلصت أوراق الجثة ورحت للعامل المسؤول عن تلاجة الموتى الخاصة بالمطار, بص في ..الأوراق بنظرة روتينية مكمش فيها دقيقة وقال بلغة عربية ركيكة تعال يا صديق داخل

اللي أعرفه إن المفروض وقتها إن قريب الجثة بيبكون منتظر من الناحية الثانية عند مخرج

تلاجة الموتى عشان يستلم الجثة, ومكنتش فاكّر إني هدخل التلاجة بنفسى يعني, كان في اعتقادي إن العامل هياخد الأوراق وأمضيله عليها ويروح يسلمّ الجثة لصاحبها, ولما قولت للعامل كدا راح يشرحلي بشكل روتيني لإن الظاهر إن مخلصين كتير قبلي سألوه نفس السؤال وهما واقفين في نفس مكاني دلوقتي ورد عليهم بنفس الإجابة اللي قالهالي, لإن كان واضح من ..كلامه العربي المكسّر إنه قال التفاصيل دي لألف واحد غيري

في الآخر فهمت إن دي مسؤولية ولازم أنا أدخل واشوف بنفسى وأوقعه على الأوراق بعد الاستلام عشان يكون معروف اسم المخلص اللي خلّص الجثة دي ..إلخ

نفخت في استسلام بعد ما خلص المحاضرة اللي قالهالي وقولتله ماشي افضل قدامي..
وياريتني ما دخلت

دي كانت المرة الأولى اللي أدخل فيها تلاجة الموتى, مكان واسع ومعالمه مش باينه بسبب بخار الثلج اللي موجود في كل مكان تقريبا, مجرد دخولي حسيت برعشة مش عارف إذا كان سببها الخوف أو شدة برودة المكان, العامل بيمشي قدامي بخطوات عادية محفوظة وأنا ماشي وراه وعقلي بيفكر في عشرات القصص اللي سمعتها وقريتها عن تلاجات الموتى والمشرحة وغيرهم من الأماكن الموجودة فيها الجثث, كنت فاكّر إنها عبارة عن دواليب وأرقام مثلا وكل دولايب فيه جثة مختلفة يشده وتظهر منه الجثة وهي نصف عارية زي ما بشوف في الأفلام لكن المكان كان مختلف تماما, مفيش أي دواليب ولا حاجه, أربع جدران مصمتين عاديين بحسب رؤيتي الضعيفة بسبب دخان الثلج, وبعد عدة أمتار العامل وقف وأنا وقفت زيه ولمحت قدامه على الأرض تابوت خشب كبير بمجرد ما شوفته جسمي رجع تاني وعرفت وقتها إنه بسبب الخوف مش بسبب برودة الجو ولا حاجه

العامل بص في الأوراق بصبه أخيرة كأنه بيتأكد من كل البيانات وقبل ما يخلص تليفونه رن, تجاهل تليفونه وراح يكمل متابعة باقي الأوراق لكن التليفون رن تاني راح استقبل المكالمة بغیظ وبدأ يزعق من أول كلمة, وبسبب لغته غير المفهومة بالنسبالي إن كانت نيبالية أو بنجالية معرفتش سبب صراخه في التليفون, هل دي مشكلة كبيرة يعني ولا الجماعة دول طريقة كلامهم دائما بصوت عالي, مش عارف. وأنا مش عارف أتدخل في الحوار وأقوله

خَلَّصَنِي وبعدين تابع مشاكلك ولا أسيبه يكمل لأنه أكيد عارف إننا في مكان شغل ومش أي مكان وخلص أقل من دقيقة والمفروض يقفل, سكت فجأة وهو بيستمع للطرف الثاني وبعد نص دقيقة رجع يصرخ من ثاني وبدأ يتحرك من مكانه وهو بيَشوَح بإيده وسابني أنا والتابوت قصاد بعض, المكالمة اللي استقبلها خلتنى للحظات أنسى الموقف اللي أنا فيه وبمجرد ما بعد عني رجعت للخوف والتفكير والخيالات من ثاني.

للحظة حسيت بجسمي ثقيل جدا ومش عارف أتحرك كإني مسمار وانتبثت في الأرض, وبدأت عيني يحصل فيها زغلة, وغيرها من التطورات اللي خلتنى مهياً لاستقبال الموقف اللي هيحصل بعد لحظات واللي عمري ما هنساه في حياتي.

فوق التابوت بالظبط بدأ بخار الثلج يتشكل في هيئة كيان مش هعرف أوصفه, كل اللي أعرفه إن اللي ظهر قدامي شئ له جسم وراس وإيد ونصه السفلي مش باينه معالمه, ضربات قلبي زادت وحاولت أتكلم أو أصرخ لكن لساني كان ثقيل جدا, الكيان اللي اتشكل مكانتش له عيون بس أنا متأكد إنه كان بيبيص عليا ومركز معايا كإنه طالعلي أنا وبس, جسمي بدأ يعرق على الرغم من برودة الجو ومش فاكر حاجه بعدها لإني صحيت لقيت نفسي في مكتب مسؤول من مسؤولي الجمارك وناس كثير أعرفها ومعرفهاش بيحاولوا يفوقوني, وعرفت منهم إن الإسعاف كانت جايه في الطريق, بعد ما فوقت طبعا ذاكرتي رجعتلي الموقف اللي حكيت هولكوا دا وياريتها ما عملت كدا, عرفت إن العامل قالهم إنني بمجرد ما دخلت وشوفت التابوت أغمى عليا ومقالش طبعا إن كانت معاه مكالمة شخصية واللي سابني لوحدي بسببها وحصل اللي حصل, وأنا أكدت على كلامه عشان مسيلوش أي أذى لإن اللي حصل حصل خلاص, بس بعد يومين من الحادثة دي رحته وخدته على جمب وقولته لو محكتليش على اللي حصل هقول للمدير واعملك مشكلة, راح قالي بالعربي المكسر إنه لما خلص تليفونه ولف يتمشى ناحيتي شافني واقف ثابت مبتحركش, نادى عليا ومسمعتوش ولما قرب مني وقبل ما يوصلني جسمي اتشنج ووقعت على الأرض.

عموما من بعدها رفضت أي شغل في تخليص للفواكة والخضار والسّمك وأي حاجه بتكون موجودة في تلاجة أو مكان مبرّد.

انتهت

الشقة المسكونة

واحد أعرفه بيسافر مصر يشتغل هناك وكان مشهور عن الشقة اللي ساكن فيها إن فيها عفاريت لكن هو واللي ساكنين مكانوش بيخافوا أو لأنهم دايمًا مع بعض فمكانش فيه خوف, الصبح كله في الشغل ومن بعد العصر أو المغرب كلهم في السكن

نسيت أقولكوا إن صاحبنا دا مش مقتنع بحوار العفاريت من أساسه ولا بيصدق قصصه وبيقول الكلام دا كان زمان لكن دلوقتي مفيش حاجه, تمر الأيام وصاحبنا دا يقعد في الشقة لوحده, قعد أكثر من أسبوع لوحده وبتحصل معاه حوارات وفاكر إن مفيش حاجه, بيقولي لما أكون نايم ومتغطي لما اصحي ألقى البطانية ملمومه ومحطوطه جمب راسي أروح واخدها واتغطي واكمل نوم, مره ألقى الغطا واقع تحت السرير أقوم اجيبه واكمل نوم وفاكر إن كل دي حاجات عادية وفي مرة كنت في الحمام بستحمي وملقيتش الليفة دورت عليها حواليا لحد ما لقيتها ولما لقيتها ملقيتش الصابونة مع إنها كانت قدامي وأنا بدور على الليفة وهكذا, العفريت بيشتغلني وأنا فاكر إن دا كله نسيان مني أو لإن دماغي كان مشغوله بحاجات كتير. فمكنتش واخذ بالي

لحد ما في مرة كنت نايم ومن عادتي بحط إيديا الاتنين فوق بعض وبعدين احطهم تحت راسي وفجأة الأقي حد بيسحب إيديا بشويبييش من تحت راسي وبيفكهم من بعض, في اللحظة دي كنت نطيت بقيت جمب الباب, طبعًا الأوضة ضلمة والصالة ضلمة والشقة كلها ضلمة مفيش غير نور المطبخ اللي شغال, ومن سوء حظي إن لمبة الأوضة بتاعتنا عبارة عن فيشة بتركبها في الكهربي مش كبس, دورت على الفيشة لحد ما مسكتها وبدور على مكان البريزة ومش شايف حاجه وفجأة سمعت صوت خربشة ضوافر جمب مكان البريزة, الخربشة بيسرع شوية ويبطأ شوية كأن بيعزف على آلة موسيقية, في اللحظة دي جسمي كله اتثبت, رعب, خوف, لساني ثقيل, جسمي مش حاسس بيه ورجليا مش شايلاني وبمجرد ما الأحاسيس دي كلها حصلتلي راحت الخربشة زادت كأن العفريت فرحان, اللي هو أخيرا خفت, أخيرا حسيت إنني معاك في الشقة وليا أسبوع بشتغلك وانت ولا انت حاسس, ومن ستر ربنا سمعت صوت واحد خبط على باب الشقة وفتحته وهو بينادي عليا ويسألني فينك, الشخص دا ساكن في الطابق اللي

الدور اللي فوقى وكنا متفقين نطلع أنا وهو بعد ما نتعشى نروح على القهوة وأنا نسيت وكنت هنام, المهم أول ما سمعت صوته راحت الخريشة وقفت وكل الأطباق والكبايات والمعالق والحلل اللي في المطبخ بقت تترفع وتتضرب في الحيطان وأنا جريت على صاحبي ومسكت في رقبتة كنت هموته, جسمي متشنج وبيتنفض من اللي حصل معايا وصاحبي يقولي طب اهدى, صلي على النبي, خلاص مفيش حاجة أنا معاك اهو, وفييين لحد ما هديت, وخذني وطلعنا على القهوة

كنت قاعد على الكرسي زي المعاقين, واللي يعدي من معارفي ويشوفني بالمنظر دا ويسأل صاحبي عليا, يروح يقوله أصل حصل معاه موقف كدا في الشقة اللي ساكن فيها, يروح الثاني يقولي أحسن عشان ياما قولناك ومصدقتش

انتهت

عم عبده الحارس

"قصة حقيقية"

بتحصل قصص ومواقف غريبة وساعات مرعبة مع الحراس, حراس المدارس والكليات وغيرهم, خصوصا انهم بيقضوا معظم الوقت وحدهم وبالذات في الليل والقصة اللي هحكياها دي تعتبر أغرب قصة سمعتها من (عم عبده النوبي) حارس استراحة موجودة في أسوان

طبيعة عملنا كجولوجيين أننا نسافر أماكن كثيرة في مصر وخصوصا الأماكن الجبلية زي المحاجر والمناجم وأي مكان جديد يكون فيه شغل خاص بمهنتنا. ولأن الرسم موهبتي فكنت بقضى أوقات استراحتي في الرسم وكنت باخد معايا سكتشات أثناء السفريات. المناظر الطبيعية والأماكن هناك كانت بتساعدني أرسم سكتشات جميلة جدا. وفي مرة كنت في سفرية لأسوان وخلصت شغل كالعادة وبرسم جي قعد جمبي حارس الاستراحة اللي نازلين فيها (عم عبده) وبدأ بيدي إعجابه بالرسم اللي لسه مخلصتهاش وكلام كثير كدا وفي وسط كلامه قال لي " يا بختك يا أستاذ بتشوف الأماكن من فوق " الجملة كانت غريبة جدا ما هو كل الناس بتشوف الأماكن من فوق. بطلت رسم وقلته " وإيه فيها يا عم عبده هو الرسامين بس اللي بيشفوا الأماكن من فوق يعني؟ الناس كلها كدا " رد وقال " إلا أنا يا أستاذ أنا مينفعلش أبص لفوق " تحت شويه عشان استوعب جملته وفي الآخر قلت " إزاي مش فاهم؟ " قال " منا لو حكيتلك مش

" هتصدقني يا أستاذ

" سبت القلم من إيدي وبصيت كلي ناحيته وقلته " لا طبعا هصدقك احكيلي

بدأ يحكي وقال قبل ما اشتغل هنا كنت حارس مع المفتشين اللي بيطلعوا تعدين في وادي العلاقي وفي يوم طلعتنا الجبل ونصبنا الخيام وكالعادة بعيد شويه عن المكان اللي فيه الشغل, هما راحوا شغلهم وأنا قعدت جنب الخيام ودي كانت شغلتي, بعد ما خلصوا شغلهم رجعوا وكنت حضرتلهم الغدا, الأكل بتاعنا كله معلبات فمش باخد وقت كبير فيه وبعد ما خلصنا واتفرقنا من تاني بدأت أشوف قدامي خيال بيتنطط, فركت عيني وبصيت تاني شوفت نفس

" المنظر خيال بيتنطط, سألت واحد منهم كان قريب مني " شايف اللي أنا شايفه يا أستاذ؟
" فين؟ "

" الخيال اللي بيتنطط هناك دا؟ "

" خيال بيتنطط؟ إيه ياعم عبده أنت بتشرب ولا إيه؟ "

" لا والله يا أستاذ أنا مبشربش, ركز هناك أهو بيتنطط شايفه؟ "

بصلي باستغراب ومردش عليا. بدأت أنادي على اللي حواليا يا جماعة شوفوا الخيال اللي بيتنطط هناك اهو لكن ولا واحد منهم صدقتي وكل واحد قال كلمة ورجعوا أماكنهم تاني

قربت ناحية الخيال راح اختفى بعدت عنه شويه ظهر تاني وفضلت على الحال دا يومين مش عارف أكل ولا أنام بسبب الخيال دا. أنا أول مرة يحصل معايا موقف زي كدا في اليوم الثالث كنت قاعد لوحدي كالعادة والمفتشين راحوا شغلهم وأقسم بالله لما بصيت للسما شوفت كيان باصص ناحيتي بغضب وشكله كان مرعب جدا وأنا من هول الموقف أغمى عليا

لما فتحت عيني من جديد شوفت المفتشين واقفين حواليا بي فوقوني وبيطمنوا مالك؟ حصل إيه؟ رديت عليهم بجملة واحدة " عاوز أمشي " واحد منهم قال " طب فيه إيه وهتمشي ليه والشغل لسه مخلصش؟" جاولت عليه بنفس الجملة " عاوز أمشي مش هقعده هنا تاني ولو محدش "وصلني أنا همشي لوحدي

قالولي طب اهدى هنخلي حد يوصلك بالعربية وبالفعل ركبنا ويادوب مشينا خمس دقائق والعربية غرزت, حاولنا نطلعها بكل الطرق مفيش فايده وفي الآخر اتواصلنا مع اللي كانوا معانا باللاسلكي عشان بيعتولنا عربية تشدنا ودا طبعا لأن مفيش إشارة للتليفون واستخدامنا بيكون باللاسلكي بس

العربية جات تشدنا ولسوء الحظ قبل ما نطلع من الغرز عجلها فرقع وبقينا عربيتين عالقين وسط الصحراء, اضطررنا نبعث إرسالية للمقر الرئيسي وعسكرنا في أماكننا وكانت أقرب نقطة جمبنا فيها ناس تبعد حوالي خمسة وعشرين كيلو أو أكثر لكن من حسن حظنا إن (سيد) قصاص الأثر كان معانا يعني في أسوأ الأحوال هنعرف نوصل لأي مكان نحتاجه ومن حسن حظنا برضو إن العربية اللي جات تساعدنا كان فيها جركن مياه كبير يكفيننا لحد النجدة ما تيجي ولما رحنا أشرب منه لقيته مخروم والمياه بتتسرب منه وفيه خيال بيتنطط جمبه,

فضلت أصرخ زي المجنون والمفتشين طلعا من الخيام يجروا ناحيتي يشوفوا فيه إيه

المفتشين كلهم خرجوا من الخيام وجريوا ناحيتي يستفسروا عن سبب الصراخ والعيول ولما شافوا المياه اتسربت على الأرض وأكثر من نصها راح بدأوا يشكوا فيا وإني سبب الحوارات اللي بتحصل دي كلها لدرجة إن واحد منهم قال " الراجل دا شكله مجنون, أنا من رأيي ندخله " في عربية وميخرجش منها لحد ما الإنقاذ بييجي ونشوف حكايته وبالفعل الكل وافق على كلامه ومفيش ولا واحد منهم صدقني غير (سيد) قصاص الأثر هو الوحيد اللي مكانش مستغرب من الحكاية لدرجة انه قرب مني وقال " أنت شكلك كنت عاوز " تشوفهم وظهرولك

يوم كامل وأنا محبوس في العربية وهما بيدخلولي الأكل والشرب بعدين طلعتوني واعتذروا عن اللي عملوه وبدأت أفتح معاهم الموضوع من جديد وقتلهم أنتوا مش عايزين تصدقوا ليه؟ أنا من ثلاث أيام بشوف خيالات بتتنطط

بالليل سمعنا صوت مفتش بيهلوس وهو نايم, مرة يضحك ومرة يصرخ ودرجة حرارته كانت عالية جدا والموضوع اتحول لرعب حقيقي وسط المجموعة لحد ما قررنا ننقسم مجموعتين, مجموعة تفضل جمب العربيات ومجموعة يكون فيها (سيد) وتروح لأقرب نقطة عمار تشوف أدوية وأكل, أنا كنت في المجموعة الثانية

اتحركنا وبدأت أشوف الخيالات تاني بس المرة دي مكانش خيال واحد كانوا كثير جدا وبيتنططوا حواليا ولما بصيت ل فوق بالغلط شوفت الكائن دا ببيصلي برعب وأغمى عليا للمرة الثانية.

الغريب في الموضوع إني لما صحيت كنت لوحدي ومفيش أي حد جمبي. طب حصل إيه؟ راحوا فين؟ مش عارف

والأغرب إني لما بصيت حواليا اكتشفت إني جمب الموقع الأولاني خالص اللي كان فيه الشغل ولما رجعت وقابلت المفتشين وسألتهم عن العربيات اللي اتعطلت والمفتش المريض قالولي مفيش ولا حاجه من دي حصلت ومحدث فينا اتحرك من ساعة وصولنا للموقع

خلصت السفرية السودة دي يا أستاذ ورجعت لبلدنا, أهل الخير دلوني على شيخ كويس جدا في منطقه جمبنا, رحته وحكىته كل اللي حصل وفي الآخر قال لي احمد ربنا إنها جات على قد كدا ومقدرش يخلصني من الشئ اللي بشوفه كل ما ببص لفق وأنا لحد دلوقتي مش ببص للسمما نهائي.

قصة عم عبده كانت عجيبة وأنا مش عارف ليه صدقتها؟ يمكن من الصدق اللي واضح في كلامه ونظراته وهو بيحكى ويمكن لأنى سمعت حاجات كتير زي كدا فمبيقيتش استغرب

لما رجعت أسوان مرة تاني مكانش عم عبده هو حارس الاستراحة ولما سألت عليه قالولي تعبان ومقدرش يبجي واحتمال يبجي كمان أسبوع

نويت أزوره بعد ما اخلص أول يوم في الشغل وبالفعل سألت عن عنوانه ورحته وقضيت باقي اليوم معاه واللى خلاني صدقت قصته أكثر وأكثر لما دخلت أوضة نومه كان نايم تحت السرير مش فوقه عشان بيخاف يبص لفق حتى لو كان فيه سقف

انتهت

الحمام

أمي حبستني في الحمام وأنا صغيرة, مش عشان تعاقبني لا, عشان تغيظ أبويا, كانوا كل ما يتخانقوا ومتعرفش تعمل معاه حاجه كانت تعاقبني أنا لأنه كان بيحبني جدا, وفي مرة اتخانقوا مع بعض خناقة كبيرة وأول ما خرج للشغل راحت حبستني ..في الحمام

ومش في حمام البيت, حمام كان بره البيت في الحوش بتاعنا, احنا ساكنين في بيت ..كبير عائلي وكانت عمتي وأولادها ساكنين معنا

الحمام دا بيقلوا إن تحته فيه سرداب لمغارة بتحرسها الجن, أجدادي كانوا بيقلوا كدا لكن احنا مشوفناش حاجه ولا الحمام دا كان فيه شئ مريب أصلا, فضلت أبكي وأخبط على الباب عشان حد ييجي يخرجني لحد ما عمتي سمعت الصوت وجاءت ..فتحتلي واتخانقت مع أمي وهددتها إنها هتقول لأبويا لما يرجع

كل اللي حصل دا بالنسبة للي هحكيهولكوا يعتبر ولا حاجه لإني بعدها عانيت سنين ..طويلة بسبب حبستي في الحمام دا

تاني يوم على طول دخلت بيتنا قطة, والغريب إن القطة دي مكانتش بتحب حد قدي, كانت بتقعد معايا وتنام معايا وتاكل وتشرب معايا, ملازماني زي ضلي, أنا كمان حبيبتها واتعودت عليها جدا وفضلت معايا فترة لحد ما سافرنا بلد تانية ورجعنا بعد سنتين, وكنت عاوزة أأخذ القطة معايا لكني ملقيتهاش في اليوم اللي سافرنا فيه ولما رجعنا وسألت عمتي عليها قالتلي إن محدش شاف القطة من وقت ما احنا ..سافرنا, ممكن تكون ماتت أو هربت لبيت تاني

زعلت عليها جدا لدرجة إنني نمت وأنا ببكي, وفي المنام سمعت صوت حد بيقلولي

..أنا مهربتش منك ولا رحت لمكان تاني, أنا هفضل جمبك دايمًا ومش هسيبك

صحيت من النوم وفي اليوم دا وأنا بلعب لوحدي في حوش البيت القطة ظهرتلي تاني وقبل ما اجري عليها واحضنا لقيتها اتشكلت في شكل ولد, ولد أسمر أطول مني بشوية وعنيه خضره, مخوفتش منه وطلب إني مقولش السر دا لأي حد وإنه ..مش هياذيني وهيحمني من أي حد ممكن يحاول ياذيني وقد كان

في مرة واحنا أطفال بنلعب جي طفل من الجيران وضربني وشدني من شعري, تاني يوم صحبوا لقوه إيديه ورجليه مكسرين, كان أي حد ياذيني ولو بنظرة كان ..بيتعاقب, حتى أمي كانت أحيانًا تقولي إنتي شيطانة مش بني أدمة

كبرت وهو كبر معايا لحد ما اتخطبت وقبل ما اتجوز اختفى ومظهرش تاني, لحد ما ربنا كرمني ببنوته جميلة ولمّا تمت تسع شهور ظهرلي من تاني وأمرني إني أتطلق من جوزي وإلا هياذي بنتي, اترجيته يسبيني في حالي أكمل حياتي مبسوفة وسعيدة لكنه رفض وقال إني متعرفيش لو منفذتيش كلامي هيحصل في بنتك إيه؟

وقالي عشان جوزك يطلقك لازم تباني إنك بتمشي على حل شعرك, اخرجي كتير ..واتأخري بره, كلمي شباب وخليهم يكلموكي على التليفون, وبكدا هنتطقي

وللأسف عملت كذا واتطلقت وخسرت بنتي لإن عائلة أبوها رفضوا يسببواها مع ...واحدة منحرفة زيي, نسيت أقولكوا إن أبويا وأمي ماتوا قبل ما اتجوز

كان فيه عرسان بيتقدمولي لكنه كان بيطفشهم, لحد ما في يوم رحت لعمتي وحكيته كل حاجه, ومن حسن حظي إنها كانت تعرف شيخ بيعمل حجابات, خدتنني ورحناله

وحكيته هناك قصتي, راح عملي حجاب وقال لي خليه معاكي ولازم تحرقيه بعد ما جوزك يدخل عليك

بعد ليلة الدخلة بـ7 أيام بدأ يظهر لي ثاني ولأول مرة في حياتي بقي بإذيني, كنت كل يوم اصحى من النوم جسمي كله متكسر زي المشلولة وكنت بغيب عن الوعي أوقات كثير, بنام أكثر ما اصحى, زوجي احتار في اللي بيحصل معايا ومن حسن حظي كان معاه عم بيعرف يعالج وعنده خبرة في الشغلات دي, راح قاله هاتالي

رحته وبدأت رحلة العلاج لحد ما سألني انتي فيه حاجة تربطك بالجني دا؟ حجاب مثلا أو أي شئ؟ افكرت وقتها الحجاب اللي عملهولي الشيخ قبل ما اتجوز وقال لي احرقيه بعد دخلتك على طول, قولتله أه معايا حجاب قالي دلوقتي تروحي البيت ..تجيبه, وقد كان

بمجرد ما حرقنا الحجاب هو احترق معه ومبقاش يظهر لي ثاني, استريحت أيام قليلة وبعدها بدأت أيام أصعب, عائلته كلها جات عشان تنتقم مني, كنت بمجرد ما أنام يظهرولي في الحلم ويعذبوني ولما أصحى واروح للشيخ عم زوجي كان بيضربني ..برضو

المشكلة إن الكوابيس اللي بيظهرولي فيها مبكونش عارفة إنها كوابيس, في مرة حلمت إنني قاعدة قدام التلفزيون بتفرج وسمعت صوت حد بيخبط على الباب بره ولما خرجت فتحت ملقيتش حد وبمجرد ما قفلت الباب وبصيت ورايا شوفت ثور ضخم واقف في الطرقة اللي بين غرفة النوم والحمام وعنيه حمرة وجري عليا وفات فيا وأنا بصرخ وبعدها صحيت من النوم, مرة ثاني مثلا حلمت ببنتي اللي أهل زوجي الأول خدوها مني, قاعدة أنا وهي بلاعبها راحت وقفت ودخلت المطبخ وجاءت بعد ثواني وهي من غير راس, كانت ماسكة راسها في إديها وراسها

بتضحك وراحت رمتها عليا وقومت مفزوعة, كوابيس كثير, وأماكن مهجورة كثير
كانوا بيرموني فيها واسمع صوت صراخ وكيانات بتجري ورايا في الضلمة مش
عارفة مصدرها ولا ماهيتها, اتعذبت لمدة شهر, كنت بتضرب وأنا صاحية ووانا
نايمة لحد ما الحمد لله اتعالجت على إيد عم زوجي وحاليا عندي ابن 3 سنين
وأموري كلها تمام

نصيحتي بس للأمهات ياريت ياريت متكرروش نفس غلط أمي وتحبسوا أولادكوا
سواء في الحمام أو في الغرفة لوحدهم وتقولوا هيبكوا لحد ما يسكتوا, أنا اللي حصل
معايا متمناش يتكرر تاني حتى مع أعدائي, وربنا يرحمنا برحمته

انتهت

شاليه العين السخنة

من المواقف المرعبة واللي هتفضل محفورة في ذاكرتي ومقدرش أنساها لما كنت شغال أمن في بورتو السخنة, القرية السياحية اللي رحت أشتغل فيها كانت كلها شاليهات وقلل ومناظر طبيعية جميلة جدا لكن اللي مش جميل جدا لما عرفت إن فيها شاليهات وأماكن معينة مسكونة ودا طبعا عرفته بعد ما قضيت أسبوعين هناك. وبسبب اللي شوفته سبت الشغل وسبت بورتو كلها

الناس القديمة اللي هناك عارفه الأماكن دي ولها ذكريات معاها لكن معظمهم مبيخافوش وكمان المشرفين بيودوهم أماكن تانيه وبيوزعوا الناس الجديدة اللي زي حالاتي على الأماكن المسكونة دي عشان ميعرفوش عنها حاجة فبالتالي مش هيخافوا إلا لو حصلت معاها مواقف والناس القديمة طبعا مش بتحكي حاجه من ذكرياتها عشان ميخوفوش الناس الجديدة وكمان عشان يضمنوا يروحوا أماكن آمنة. مفيهاش عفاريت واشتغالات

قضيت يومين عاديين وفي اليوم الثالث كالعادة صحيت الساعة 6 المغرب عشان كنت ماسك شفت ليلي من 7 بالليل لحد 7 الصبح وخرجت من الاستراحة مع باقي أفراد الأمن عشان نروح القرية اللي على بعد دقائق مننا

الساعة ست ونص بنكون قدام البوابة والمشرف بيوزعنا وبيقول لكل واحد المكان اللي هيقتضي فيه الـ 12 ساعة بتوعه

بيقول اسم الشخص وبعدها يقول مثلا التبة الأولى, التبة الخامسة, التبة الشرقية

وهكذا .. لحد ما جي الدور على رجل كبير في السن حوالي خمسين سنة والمشرف قال عم أشرف التبة الغربية, وقتها الراجل دا قال بسرعة التبة الغربية ليه ماهو فيه اتنين مستجدين – وبص عليا وعلى واحد جديد واقف جمبي – خلي واحد فيهم يروح التبة الغربية, المشرف انزعج من نبرة صوت عم أشرف وقاله زي ما سمعت ياعم أشرف والمستجدين لسه ميعرفوش حاجه هنا وسكت لحظات وداس على نبرته شوبه وقال وواحدة واحدة هخليهم يمسكوا هناك بس أنت قضي ليلتك.

أنا واللي جمبي بصينا لبعض اللي هو مالها التبة الغربية وإيه الغريب فيها؟ مفيهاش واي فاي مثلا أو الواي فاي مش بيوصلها عشان على حدود القرية وتعتبر أبعد تبة؟

الموضوع أثار فضولي فحببت أستفسر من عم أسعد ودا يعتبر أقدم واحد في الأمن وأكبرهم سنا ولما سألته عن التبة الغربية وليه عم أشرف مش عايز يروحها اتلخبط .. في الكلام وفكر شويه وفي الآخر قالي مفيهاش حاجه .. أشرف بيتدلع شويتين

نسيت الموضوع ومركزتش فيه لحد ما جي الدور عليا والمشرف قالي في يوم أثناء توزيع الخدمة هتروح النهاردا التبة الغربية ودي كانت أول وآخر مرة أروحها

U التبة الغربية زيها زي أي تبة عبارة عن منطقتين كل منطقة على شكل حرف نص دايرة يعني وفي كل منطقة كشك صغير حوالي مترين في مترين بيقد فيه فرد الأمن, قعدت على الكرسي وزى كل يوم شغلت فيلم على الموبايل لإني كنت محمل مجموعة أفلام كتيرة قبل ما اروح هناك عشان أسلي بيهم وقت فراغي

الساعة واحدة ونص كدا سمعت صوت رجلين بتمشي بعيد عني شويه ولإن الحمام الخاص بأفراد الأمن قريب من التبة الغربية افكرت حد من الأمن يعني والموضوع عادي لكن اللي مش عادي إن صوت الرجلين دا فضلت سامعة كذا دقيقة بنفس

.الوضوح اللي هو لا بيقترب ولا بيبتعد كأن صاحب الصوت بيتحرك في نفس المكان

خرجت من الكشك واتمشيت ناحية الصوت من باب الفضول لكن قبل ما اوصل عنده اختفى.

..رجعت الكشك تاني وماخدتش في بالي ومسكت التليفون كملت مشاهدة الفيلم

وبعد حوالي ربع ساعة سمعت نفس الصوت من جديد, وقتها مش عارف ليه حسيت بالخوف وافتكرت عم أشرف من كام يوم وهو بيقول ليه اروح التبة الغربية؟ لكني ضغطت على نفسي وخرجت ناحية الصوت والمرة دي قبل الصوت ما يختفي لمحت باب شالية 363 بيتقل بسرعة كأن حد قفله بمجرد ما شافني والغريب والمخيف إن الشاليه دا مفيهوش مالك حاليا يعني مقفول، بالتالي المفروض الشبايبك والأبواب تكون مقفولة كويس

طبعا اتصلت بالمشرف وحكيته اللي حصل وفاجئني لما لقيته مش مهتم بالموضوع وبيحاول يلاقي أي حجة يعني شويه يقولي ممكن الهواء وشوية تاني يقولي ممكن ..باب الحمام وأنت بيتهيئك

المهم كان بيتلكك بأي حجة ولإني كنت مسترخم المشرف دا قولته أنا قولتك وريحت ضميري عشان المشرف العام لو سألنا الصبح عن أي ملاحظات هحكيه !اللي حصل, ما يمكن يكون حرامي وتلبسوها فيا أنا

وياريتني ما قولته كدا وكنت سكت وحاولت أفنع عقلي بأي حجة من الحجج اللي قالهالي لأنه لما سمعني بقوله كدا قالي طب خلاص خليك مكانك وأنا هجيب مفاتيح الشاليه واجيلك

وبالفعل جي بسرعة، بعد حوالي خمس دقائق بس ولما قرب مني قالي تعالي ورايا نتأكد، طلع مفاتيح من جيبه وفتح الشاليه وشغل مفتاح الكهرباء الرئيسي وراخ يبص حواليه.

شاليه كبير بيطلقوا عليه اسم فيلا لأنه من طابقين، فتشنا الطابق الأول وطلعنا للطابق الثاني فتشناه ومفیش حاجه برضو.

المهم نزلنا والمشرف قفل مفتاح الكهرباء الرئيسي واللي كان موجود عند آخر درجة من درجات السلم.

المشهد اللي خصل هو صفهولكوا عشان تتخيلوه معايا، المشرف عند آخر درجة في السلم تحت وأنا وراه فوق السلم بحوالي 3 درجات، هو قفل النور واتمشى قدامي وبقينا شايفين طريق الخروج من خلال نور الكشافات اللي بره واللي داخل الشاليه عشان معظم أبوابه زجاج، المشرف قدامي وأنا وراه بخطوات ومش عارف إيه اللي خلاني أبص لورا على شمالي؟

شوفت الظل بتاعي وبتاعه ماشي وراه بعض عادي وفجأة الظل بتاعي وقف مكانه عند نص السلم من فوق اتحركت وأنا باصص ورايا ولما اتأكدت إن ظلي مبيتحركش شعري وقف ورجلي ثقلت وبقول للمشرف بص بص لقيته طنشني وخرج من الباب واللي خلا قلبي كان هيووقف لما شوفت الظل بتاعي بيطلع لفوق . وهو بيجري ناحية للطابق الثاني

وقتها جريت بأقصى سرعة وراه المشرف وأنا مرعوب وقلبي هينفجر من شدة الدقات لحد ما خرجت بره خالص للنور وحطيت إيدي على قلبي وأنا بحاول آخذ

نفسى وبتنفض من الخضة، لقيت المشرف جاي من ورايا وبيقول تعالا يا سيدي لما
نشوف الشاليه اللي قولتلي عليه دا

انتهت

قصة حقيقية

بنت جميلة كانت راجعة من كليتها عادي وفي تقاطع من تقاطعات الطرق كان فيه
..سحر مرمي على الأرض ومكانتش هي اللي مقصودة بيه, وللأسف جي فيها هي

مين رمى السحر؟

وإزاي كان بالغباء والقسوة في نفس الوقت إن يرميه في الشارع للي رايح وللي
جاي؟

وهل كان متابع المشهد بعينه مثلا ومنتظر الشخص المقصود ولما لقي شخص غلط
حاول يمنعه ولا لا؟

.. محدش يعرف

كل الأسئلة دي محدش يعرف إجابتها, أهلها فقط عرفوا المعلومة دي بعد سنوات
من العلاج.

وصلت البيت وبالليل بدأت تحس بصداع شديد جدا في رأسها, رأسها كانت ثقيلة
جدا على جسمها والصداع دا كان ملازمها طول الوقت زيه زي ظلها بالظبط, دا
غير الكسل والخمول وعدم القدرة على الحركة لحد ما الموضوع وصل لملازمة
الفراش دائما.

أهلها لما شافوا حالتها اللي بتسوء يوم عن الثاني قرروا يروحوا بيها لطبيب ولمدة
فصل دراسي كامل بيلفوا بيها على الأطباء ومفيش أي حل ولا حد عارف يشخص
المرض, أو بمعنى أصح كل واحد يقول كلام مختلف ويمشوا على العلاج اللي كتبه
وبرضو مفيش فايده, وفيه منهم اللي قال صراحة إن مفياش أي مرض عضوي

بعد العطلة الصيفية الحالة بتاعتها بدأت تاخذ منحى خطير ومختلف, يعني مثلا بقت تخرج من البيت وتمشي بالساعات وهي مش عارفه رايحة فين أو خرجت ليه ولما ترجع البيت وأمها تسألها كنتي فين؟ تقولها كنت في البيت معاكوا, أنا مخرجتش.

ولما الموضوع اتكرر وزاد عن الحد فكروا يمنعوها من الخروج بالعافية, لكن الفتاة الضعيفة وقتها كانت بتتحول قوتها لقوة ألف رجل ومحدث يقدر عليها أو يمنعها من الخروج.

وللأسف خروج متكرر مع حبس نفسها في غرفتها مع توهان لدرجة إن أحيانا كانت تسأل نفسها هي مين أو مين اللي بيعيشوا معاها دول, وكانت بتردد جملة واحدة لما يلحوا عليها في الأسئلة وتقولهم "عاوز ياخدني أعيش معاه" ولما يقولولها مين دا؟ تقولهم معرفش.

الموضوع دخل في الروحانيات والأهل والجيران بعد ما قصتها اتعرفت نصحوا أبوها يجبلها شيخ وبالفعل أحضروا شيخ يمكن يكون العلاج على إيده ويحل اللي معرفوش الدكاتره يحلوه.

الشيخ جي والعائلة كلها مجتمعة حواليتها, أبوها وأمها وعمها واخواتها البنات وبدأ الشيخ يقرأ عليها, وبالتدريج بدأت تغضب وتحاول تهاجم الشيخ وتضربه أو ترمي القرآن اللي ماسكه في إيده, ونبرة صوتها تتغير لنبرة رجل ويقول "لن أخرج منها أبدا"

الشيخ قالهم إن تليسه جن شرير وقالهم هحاول إخراجه, لكن من بعد زيارة الشيخ

دي وحالتها بقت أسوأ مما قبل, ولما كانت تحاول الخروج ويسألوها رايحة فين تقولهم "عاوز ياخدني عشان يعلمني السحر" وكان فعلا عاوز يعلمها السحر وكانت بتردد الجملة دي كثير, الشيخ جي مرة واثنين وتلاته لكن كلهم كانوا بدون فايده.

أمها بتقول والله كان يضربها ضرب لدرجة إن كنت هقول إنها هتموت تحت إيدته لدرجة إن الشيخ كان بيتعب وتخور قوته وهي هادئة وديعة مبتسمة كأن محدش لمسها, ولما الشيخ احتار معاها قالهم أنا عملت كل اللي عندي, حاولوا تجيبوا شيخ أقوى مني ويارب يقدر على اللي معاها.

بعد الحادثة دي بأيام قليلة البنت اختفت وخرجوا يدوروا عليها في البيوت اللي جمبهم والشوارع بدون فايده, اختفت فجأة, حتى أصحابها والقريبين منها كلهم قالوا مشوفناهاش.

وفي اليوم الثاني صحيت لقت نفسها في بيت غريبة في مدينة تاني ومكانتش عارفه. هي فين أو جات إزاي وبعدها اتصلت بأهلها وقالتلهم مكانها وراحوا جابوها.

جابوا شيخ تاني أقوى من الأول, وبدأ يقرا عليها ويضربها برضو بدون فايده.

أمها بتقول بنتي شعرها طويل, كان يلف إيدته على شعرها ويرميها من الحيطه دي للحيطه دي, كان بيمسح بيها الأرض والحيطان بدون فايده برضو, الشيخ مصر إنه يخرج منها والجن مصر إنه مش هيخرج وبعد عدد من الجلسات حصل اتفاق بين الشيخ والجن, الجني مش هيخرج منها وهيسيبها تعيش في سلام بدون أي أذى. والشيخ مش هيضربها ويأذيه تاني.

لحد ما جي اللي أقوى من الشيخ والجنى, (الجب) وبعدها الحكاية خدت منعطف
تاني خاااالص

الغريب إن البنت كانت بتعرف اللي هيحصل في المستقبل القريب, فتقولهم مثلا إن
فيه عريس هيجي يتقدم لأختي خلال اليوميين الجايين, عريس طويل ولابس نضارة
.مثلا أو عريس قصير وشعره خفيف, والغريب إن كلامها كان بيتحقق بالحرف

وأحيانا كانت لو زارتهم واحده تروح تقول إن الست دي حامل في الأسبوع الأول
مثلا أو الثاني والست نفسها مبتكونش عارفه لأنه حمل جديد ولما تسمع وتروح
تعمل تحاليل حمل بتلاقي نفسها حامل فعلا وفي نفس المدة الزمنية اللي اتقالت

لحد ما في يوم اتعرفت على شاب وقرّبوا من بعض وارتبطوا على الرغم من إنها
حكته كل مشاكلها لكنه أصر يتجوزها واتجوزوا فعلا

بدأ الجن اللي معاها يعود للمشاكل القديمة, ويصيبها بتوهان وعزلة ومحاولات
الهروب ولما جي الشيخ وقالها عايزة تهربي فين قالتله عايز ياخدني يعلمني السحر
.في مغارة هاروت وماروت

كانت بتترجى الجن يسيبها في حالها لأسرتها وزوجها ومفيش فايده, أنجبت طفل والمشاكل مازالت مستمرة وحالتها اتطورت لا بتقبل أبوها ولا أمها ولا جوزها ولا ابنها.

انفصلت عن زوجها ورجعت بيت أهلها وهو كان يزورهم هو وابنها من فترة للتانية وأحيانا كان يخلي ابنها يبات عندهم, مكانتش تعرفهم وكانت تسأل أمها مين اللي بييجي يزورنا كثير دا؟ أمها تقولها دا واحد قريينا مراته مريضه فيجب ابنه عشان نراعيه ونهتم بيه.

أهلها مستسلموش برضو, وتقريبا كل شيوخ الدولة زارتهم وحاولت معاها لكن بدون فايده, لحد ما ربنا أرسلهم شيخ قوي خبير في الحالات المستعصية دي, الشيخ حاول يلاقي اتفاق ودي مع الجن لكنه رفض كالعادة وبدأت رحلة العلاج.

كل يوم بالساعات ما بين قرآن وضرب وسحل والموضوع دخل في العناد بين الشيخ والجن لدرجة إن الشيخ بقى يبات عندهم وبعد أيام عصيبة ما يعلم بيها إلا الله الجن قرر يخرج وبلغ الشيخ بكدا لكن مصدقوش وقاله محتاج دليل أو علامة على إنك سبتها.

قاله هتركلك الدليل في نفس الطريق اللي هي مرت فيه قبل كذا وكان السحر مرمي فيه في فجر يوم كذا, هتلاقي هناك ظفر حيوان معكوف, وبالفعل راحوا في الميعاد. دا ووجدوا ظفر الحيوان

وأما بتقول من وقتها وبنتي بقت كويسة ورجعت لطبيعتها وبيتها بعد سنين من الألم والمعاناة

انتهت

المحطة المهجورة

الحادثة دي حصلت معايا في 2008 تقريبا، كنت وقتها بدور على شغل وواحد صاحبي اسمه وليد اتصل بيا وقال في فيه محطة مياه في الإسماعيلية هيعيدوا تشغيلها من جديد بعد ما هجروها كذا سنة ومحتاجين عمال وفنيين وغيرهم، إيه رأيك تيجي والشغلانه احتمال تاخذ عشرين يوم أو شهر وهنطلع منها بمبلغ محترم؟

وافقت طبعا وقتله يديني العنوان وهو سبقني على هناك لاني اتأخرت يومين على ما رحنت، وبالفعل سافرت ووصلت على الساعة تسعة بالليل كذا كانوا وقتها خلصوا شغل وقاعدين في المبيت بتاع المحطة واللي كان عبارة عن دورين ملحققتش أعرف تفاصيلهم عشان الدنيا ليل. وأنا مش من النوع الفضولي

بس كانت فيه حاجه غريبة لفتت انتباهي، كلهم كانوا نايمين في أوضة واحدة مع إن فيه أوض كتير في نفس الدور لكن لا، متجمعين كلهم مع بعض وفارشين بطاطين ونايمين كلهم على الأرض، وتقريباً محطوش سراير عشان الأوضة تبقى واسعة وتشيل أكبر عدد، صاحبي فرشلي بطانية جمبه وقال تعالا مكانك هنا قولتله لا أنا هنام في أي حتة لوحدي مبحش الزنقة والزحمة، اتلخبط في الكلام وقال تعالا نام هنا أحسن باقي الأوض مش نضيصة وكلها كرايب. والدنيا ليل دلوقتي، اقتنعت بكلامه وقررت أقضي الليلة معاهم وتاني يوم هشوف مكان غيره

مجاليش نوم بسهولة طبعا عشان لسه جديد في المكان مع إني تعبان من السفر ونفسي أنام، تقريبا كلهم ناموا من تعب الشغل، وبعد ساعة كذا أو أكثر وأنا بتقلب مفيش نوم سمعت واحد فيهم بيصحي واحد تاني وبينادي عليه، علي قوم يا علي تعالا معايا الحمام، وواضح إن علي نومه ثقيل أو تعبان فمصحيش بسهولة، والتاني يصحي فيه قوم يا علي يا علي، لحد ما علي صحي ورد عليه بصوت نعلان وقاله مش قادر، تعبان والله، شوف حد غيري، راح التاني. قاله أنا جيت معاك امبارح لما صحيتني ومقولتكش لا، عموما افكرها

سادت لحظات صمت عجيبة بالنسبالي، إزاي واحد يصحي واحد تاني عشان يروح معاه الحمام؟

هو معقول خواف للدرجادي؟

حتى لو كان خواف، ليه علي امبارح صحاه يروح معاه الحمام؟

معقول هما الاتنين خوافين؟

ثم ليه كلهم نايمين في أوضه واحدة؟ مش معقول ملقيوش وقت ينضفوا أوضه أو اتنين تاني دول جايين قبلي بتلات أيام.

وفي وسط تفكيري واستغرابي سمعت علي بيقوله بزهدق ونفاد صبر طب يلا بينا، وقاموا الاتنين وغابوا شويه ورجعوا وأنا نمت بعدها وقولت في نفسي الصبح هسأل وليد عن كل دا. لأن واضح هو كمان مخبي عني حاجه.

صبحنا تاني يوم الصبح وواحد خد العربية راح جابلنا فطار على ما الكل يفوق ويصحصح، وبالفعل فطرنا ونزلنا الموقع.

أبنية كتيرة مكسرة وأعمدة نور واقعة على الأرض ومطلوب منا هدم الأبنية القديمة كلها وبناءها من جديد دا غير السباكة والكهربا وغيرهم، فقولت لوليد إن عددنا قليل على كدا دا وصعب نخلصه في شهر، راح قالي إن المهندس بعد يومين على بداية الأسبوع الجديد هيبعتلنا عمال زيادة.

الشغل خدني ونسيت أسأل وليد علي اللي حصل امبارح لحد قبل المغرب كدا خلصنا واللي راح انتشطف واللي استحمى وحضرنا عشان واتعشنا وكل واحد راح على مكان نومه، المبيت كان عبارة عن دورين زي ما قولتلكوا، الدور الأرضي مكاتب وحمامات والدور الثاني فيه 8 أوض كل أربعة قصاد بعض، بصيت فيهم لقيت كلهم كرايب فعلاً وسراير قديمة مكسرة وفيه منها اللي ينفع للاستخدام بس عليه كذا حاجه ومينفعش أنضفه دلوقتي، لقيت مكتب كبير سليم نفضته وشديته بره عند الأوضه اللي نايمين فيها واخذت البطانية فرشتها عليه، وكلهم عارضوني بلطف وكان واضح انهم مخبيين عني حاجه، اللي يقولي فيه ناموس عندك واللي يقولي الجو برد، بس أنا خدت قراري مش هنام وسطهم، وليد وقتها كان بيساعدني في تحريك المكتب وتنظيفه فسألته بصوت واطي عن الاتنين اللي راحوا الحمام امبارح قالي عادي مفيش حاجه وغير الموضوع وقالي كنت نمت معانا جوه أحسن من هنا برد عليك قولتله لا أنا هنام هنا، كان عايز يتكلم بس حس إنني قررت خلاص ومفيش فايده من الكلام، قالي براحتك ودخل الأوضه.

كانت فيه لمبه في الممر اللي أنا نايم فيه فقومت طفيتها وفي نفس اللحظة سمعت واحد منهم بيقول بصرخه لالا طفيتها ليه؟ راح رد عليه واحد ثاني قاله تلاقيه مبيعرفش ينام في النور. وكان واضح من نبرته إن هو كمان متضايق إني طفيت النور.

اتقلبت كتير برضو مفيش نوم لحد تقريبا ما صوتهم سكت وشكلهم ناموا قبلي ومفيش صوت لأي حاجه حواليا وطبعاً في الحالة دي بتبقى حاسة السمع قوية جداً، فجأة سمعت صوت حد طالع على السلم، الشبشب بتاعه عمال يحك في كل سلمه والتانيه والصوت يقرب لحد ما طلع السلم كله، قولت يمكن حد فيهم نزل الحمام تحت وأنا برتب المكتب فمخدتش بالي، رحت قومت شغلت النور عشان كان قريب مني وذوقيا يعني عشان أنا اللي طفيته، شغلت النور ملقيت حد، وقفت ثواني مش فاهم حاجه رحت طفيت النور ثاني وسألتهم هو فيه حد نزل تحت؟ شوية صمت راح واحد منهم قالي بنبرة خوف لأ، أول ما رجعت نمت على المكتب سمعت صوت الشبشب وهو بينزل للدور الأرضي وبيعمل صوت عشان يعرفني، بصراحة بدأت أخاف وحسيت إني عرفت إجابة كل تساؤلاتي وبدأت الخوف يسيطر عليا وبعد شوية سمعت نفس الصوت بيطلع السلالم ثاني، حطيت إيدي على ودني عشان مسمعت حاجه وحاولت أفكر في التعب عشان أنام بس الخوف بيترد النوم وفجأة وانا في الحالة دي راح الباب اللي جمبي مخبوط جامد واتقفل، في اللحظة دي قلبي اتحرك من مكانه من الخوف وجريت دخلت وسطهم واتضح إن كلهم صاحيين لإنهم عارفين إن هتحصل معايا حاجه بس مش عايزين يخوفوني، قولت لهم مش هنام النهاردا غير لما تقولولي فيه إيه هنا؟

..وبدأ كل واحد منهم يحكي لي حكايته

فضلت متنح مش لاقى كلام أقوله ولما لقاني سكت فجأة سألني مالك قولته إنت كنت معايا من دقيقة وشغال في الحيطه اللي ورايا وقولتلي هروح الحمام, بص للحيطه لقاها زي ما سابها ودا كان هيجنني قالي بطل اشتغالات ياعم محمد احنا في مكان مهجور ومش ناقصين دول ببيجوا على السيرة, قتلته والله إنت كنت معايا من دقائق, لكن للأسف مصدقنيش وقالي باستهزاء طب ماشي ياعم أنا كنت معاك, تعالا نتغدى ولا أنت مجوعتش؟

بشوية تفكير عرفت إن عمرو مش بيشتغلني, لأنه استحالة يروح يجيب الأكل ويرجع بالسرعة دي وبيعمل فيا مقلب مثلا دا غير إنه ملوش في المقابل, كنت باكل لقمة كل خمس دقائق بسبب التفكير والسرحان ولما لاحظ وكان يسألني مالك كنت بقوله مفيش حاجه عشان ميخافش ويخوفني معاه, ورحت أفكر في اللي حصل معايا والحوارات اللي هتحصل معانا في الأيام الجايه, وأنا كنت أول واحد يعرف حقيقة المكان دا

سكت شويه راح واحد تاني اتكلم وعرفت إنه عمرو, قال في الليلة دي بعد ما خلصنا شغل رحنا اشترينا أكل وأكلنا ونضفنا الأوضة اللي احنا ساكنين فيها دلوقتي وفرشناها واتشطفنا وقبل ما أنام نزلت أروح الحمام تحت, ويادوب دخلت ومفيش ثواني راح محمد خبط عليا, قولته أنا يادوب داخل ياعم اصبر, شويه وخبط تاني قولته ما الحمام فاضي من الصبح منزلتش ليه ولا افكرت لما نزلت أنا؟ المهم مخبطش تاني وأنا بعد شويه استعجلت نفسي وقولت يمكن محمد مزنونق فعلا ومكانش فيه غير الحمام دا اللي فيه إضاءة ومياه شغالين, باقي الحمامات مش شغالين إما عيب في الكهرباء أو السباكة

خرجت وقولت ادخل ياعم بس مكانش فيه حد بره, افكرته طلع فوق أو عمل حمام في أي حته ولما رجعت الأوضة قولته يعني افكرت الحمام لما نزلت أنا؟ قالي إزاي؟ قولته مش هتروح الحمام ولا خلصت نفسك في أي حته؟ قالي حمام إيه وبتاع إيه أنا مش فاهم حاجه, قولته مش أنت جيت وخبط عليا في الحمام؟ أول ما قولته كدا اتنفض وقعد على حيله وقالي أقسم بالله ما نزلت بعدك حتى, أنت جيت من الحمام من دقيقة خدت علبة السجاير وطلعت .. تشرب سيجارة بره عشان عارفني מבحبش ريحتها

بصينا لبعض أنا وهو وافكرنا اللي حصل معانا الصبح ومن ساعتها بدأت حوارات كثير .. تحصل معانا ومع الناس اللي جات سكنت في المكان

الليلة دي كانت من أصعب الليالي اللي عدت علينا في حياتنا أنا ومحمد, ليالي كثير نمنا فيها على الضلعة وليالي أكثر من غير عشا وفي أماكن مهجورة أكثر من دا بس الليلة دي كانت أصعبهم, تخيل تبات في مكان غريب عنك وواثق تمام الثقة إن المكان دا مسكون, أنا أسمع إن الأماكن المسكونة بتحصل فيها المواقف دي بعد ثاني يوم أو ثالث يوم لكن المكان دا بدأت الحوارات تحصل فيه من أول يوم, أكيد اللي ساكنينه مش عاوزين حد معاهم

من تعب الشغل حاولنا ننام لكن من غير فايده, كل واحد فينا مرمي على الأرض مغمض عنيه لكن ودانه صاحية وبتسمع دبة النملة, في البداية سمعنا صوت حد بيطلع السلالم وينزلها مره بيطلع بهدوء وينزل جري ومرة ثاني العكس, انكمشنا في الغطا ولما الصوت سكت بدأنا بعدها نسمع صوت السراير في الأوض اللي حوالينا بتتحرك كأن حد بيرتبهم أو هينقلهم من مكانهم فانكمشنا في الغطا أكثر من الخوف وقربنا من بعض لحد ما سمعنا صوت خطوات بتجري على السقف كأن فيه ناس بتلعب أو بتجري ورا بعض

فضلنا على الحالة دي لحد الفجر وما بين كل وقت والثاني تحصل حاجه جديدة أصعب من اللي قبلها, كأنهم بيقولولنا سيبوا المكان ويحاولوا يطفشونا منه, ومحمد المسكين كان عاوز يروح الحمام في الليلة دي وفضل ماسك نفسه للصبح وكان الواحد فينا كل عشر دقائق مثلا ينادي على الثاني يشوفه نام ولا لا, كان كل واحد خايف الثاني ينام ويسيبه يواجه كل دا لوحده

لما الشمس طلعت قررنا اننا نسيب المكان ولو كان على الشغل فأرض الله واسعة, أينعم الحال له فترة واقف وجايز منلاقيش شغل ثاني بسرعة لو سبنا الشغل دا بس سلامتنا بفلوس الدنيا كلها, بدأنا بالفعل نحضر شنطنا وفي وسط الترتيبات سمعنا صوت عربية دخلت المحطة وضربت كام كلاكس ولما بصيت من الشباك شوفت تاكسي وقف في مدخل المحطة ونزلها منه ثلاثه وبعدها التاكسي لف وخرج. محمد سألني بعنيه فيه إيه قولتله المهندس بعت ثلاثه زي ما قالنا امبارح

بصينا لبعض أنا وهو وكان كل واحد فينا عاوز يقول للثاني خايفنا قاعدين طالما الناس بتيجي فأكيد هيبجي معاهم الونس واحتمال مفيش حاجه من اللي حصلت تحصل ثاني, وبادرت أنا بالكلام ومحمد وافقني على طول كأنه مستتيني أقول كدا فقولتله طب رجع كل حاجه مكانها وأنا هنزل أستقبلهم

نزلت تحت وسلمت عليهم وسألوا على عمرو فقولتلهم أنا وعرفوني بنفسهم أحمد وهشام وسيد,
أحمد وسيد بنائين وهشام كهربائي, سيد كان أكبرنا كلنا في السن فعرض عليا يشوف المكان
يعني واعرفه الشغل فعجبني بصراحة وبالفعل سابوا الشنط على مدخل المبيت وخذتهم فرجتهم
في المحطة كلها وعرفتهم الشغل المطلوب زي ما المهندس قالي بالظبط وبعدها طلنا كلنا
المبيت.

قلتلهم يرتاحوا شويه من السفر وفي الضهر نبدأ على بركة الله وسألتهم لو محتاجين فطار
قالولي لا فطرنا قبل ما نيجي, أنا ومحمد استغلينا الفرصة ونمنا قبلهم زي المقتولين

سكت عمرو واتكلم واحد تاني وقال أنا بقي هشام, في اليوم استغربنا من عمرو ومحمد بمجرد
ما حطوا راسهم على الأرض ناموا على طول, أحمد وعم سيد هما كمان مددوا من تعب السفر
وأنا مجاليش نوم فقولت أنزل أقعد تحت شويه أشم هوا لحد ما أحس نفسي عاوز أنام, أنا بحب
الأماكن المعزولة جدا اللي زي دي وبحب الهدوء وعندي استعداد أقعد سنة في مكان زي دا
من غير ملل ولا زهق

جمب المبيت كان فيه كام كرسي مكسرين اخترت أحسن واحد فيهم وقعدت عليه, مدخل
المحطة في ضهري وباقي المحطة كلها قصادي, وفي وسط سرحاني شوفت واحدة ست لابسه
أسود من بعيد, مش عارف ظهرت منين وفضلت ماشيه بحركة بطيئة لحد ما دخلت مبنى
صغير كدا دور أرضي ومخرجتش منه تاني, فضلت مركز مع المدخل فترة لكن محدش طلع
أو دخل تاني, فجأة افكرت إن عمرو قالنا إن محدش في المكان غيرنا فقولت في نفسي أكيد
.. الست دي حرامية ودخلت تسرق حاجه وقررت أروح أشوفها بتسرق إيه

دخلت ورا الست دي وأنا مش عارف أعمل إيه أو أواجهها إزاي, والحمد لله بعد ما دخلت واتمشت شويه ودورت عليها ملقيتهاش, وقولت احتمال تكون خرجت من شباك أو مخرج ثاني أو ممكن أنا أقنعت نفسي بكدا عشان مدورش ثاني في المبنى دا, خصوصا إني أول ما دخلت قلبي اتقبض وكرهت المكان من غير سبب, التراب في كل حته والطوب مرمي هنا. وهناك دا غير الضلعة اللي مستحملتهاش

فجأة وأنا بلف عشان أخرج شوفت قط أسود واقف عند الباب وبيبصلي, اتخضيت بصراحة كانت نظرة إنسان لإنسان مش مجرد حيوان, أول ما شوفته واتخضيت أكثر من نظرته ليا لإنسان, شوحت بإيدي عشان يجري أو يخرج لكنه معبرنيش, ضربت رجلي على الأرض مرتين تلاته عشان يخاف مني زي منا خايف منه لكن من غير فايده, عينه مثبتها في عيني وحسينه ببيتسلمي وفجأة حاجه وقعتني على الأرض في أقل من ثانية والباب اتقفل جامد وحد مسك رجليا وفضل يجرجرني في المكان كله, مسح بيا الأرض حرفيا وأنا عاوز أصرخ أو أستنجد بحد يلحقني من غير فايده, صوتي مكانش بيطلع كأن حد قافل بوقي غصب عني

استمرت على الحال دا دقائق كانوا أصعب دقائق عدوا عليا في حياتي وبعدها أغمى عليا, العجيب بقى إني لما صحيت لقيت نفسي قاعد على الكرسي اللي كنت قاعد عليه قبل ما اشوف الست دي.

فضلت ثواني مذهول مش فاهم إيه اللي حصل أو إيه اللي بيحصل؟ معقول أكون نمت من غير. ما أحس وكل دا مجرد كابوس؟ أو يكون حصل فعلا وحد شالني وجابني هنا؟ مش عارف

استسلمت للخيار الأول وأقنعت نفسي بيه لكن عرفت اللي فيها لما مواقف مشابهة حصلت معنا كلنا وكل واحد حكى اللي حصل معاه, ولا إيه يا عم سيد؟

رد عليه أكبرهم في السن واللي عرفت انه عم سيد من قبل ما يتكلم وقال أيوه والله, أنا اشتغلت في أماكن كتيره وشوفت حاجات أكثر بس زي اللي بيحصل هنا مشوفتش, وأنا نايم في اليوم دا حلمت بشخص أسود طويل واقف عند آخر سور المحطة وعمال يشاورلي بإيده إشاره معناها تعالا, بصيت حواليا ممكن يكون قاصد حد ثاني بس مكانش في حواليا حد, افتكرته المهندس جي مثلا واحنا نايمين ولما شافني نزلت شاورلي عشان يوريني شيء في المكان أو

يقولي على شغل نعمله خاصة إني معرفش المهندس شخصيا لأنه معرفة أحمد, اتمشيت ناحيته ولما قربت منه اتضحلي إنه بيشاورلي عشان أبعد أو أمشي من هنا, المرعب إنه ملوش أي ملامح كأنه ضل مرسوم على حيطه وإيده بس اللي بتتحرك ولما لقاني واقف مش بتحرك لإني مش فاهم اللي بيحصل فجأة لقيته بيجري ناحيتي بكل سرعته وأول ما قرب مني اختفى وصحيت, أما بقى اللي حصل مع أحمد في اليوم الثاني اللي هو امبارح فدا أعجب من اللي ... حصل معنا كلنا

محدثش فينا حكى عن الرعب اللي حصل معاه في المكان دا لحد ما واجهتهم أنا بعد الموقف اللي حصل معايا والحمد لله انه عدى على خير

صحيت اليوم دا بعد الظهر وكان الكل صاحي وباين الهم والغم على ملامحهم كأن كل واحد فيهم مخبي سر جواه وأنا عشان مبحبش أسأل عن اللي مليش فيه مسألتهمش, اتغدينا ونزلنا الشغل اللي اتوزع علينا وكان عبارة عن تكسير كل الأبنية اللي موجودة عشان نعيد بناءها من تاني لما عددنا يزيد وبيجي باقي العمال والصناعية, ولأني أنا وعم سيد كنا قريبين من بعض اخترنا مبنى ورحنا نكسر فيه, عم سيد حكالي عن الحلم بتاعه أثناء الشغل زي ما يكون بيفضض عشان يرتاح أو يلاقي تفسير للحلم دا مع إنه عارف إني مليش في التفسير, لكن أنا ريحته وقولتله طالما مكانش قبل الفجر يبقى كابوس عادي وممكن من تغيير مكان نومك زي ما بنسمع يعني

بعد ما اشتغلنا شويه حلوين لقيته ساب الشغل وقال هروح أجيب مياه, حلفت إني أروح أنا من باب الذوق طبعا ورحت المبيت, لكن قبل ما اوصل هناك لقيت كائن غريب عمري ما شفت شبيه له حتى في الحيوانات, طويل حوالي مترين وأكثر لونه رمادي ورجليه طويله أطول من نصه الفوقاني وضهره منحني لأقدام وإيده واصله لحد تحت ركبته وكان من غير هدوم, وقفت مكاني من الصدمة زي ما تكون جليا اثبتتوا في الأرض, ضربات قلبي زادت وريقي نشف وأنا مش عارف أتصرف إزاي وفضلت متابعه بعيني لحد ما خرج من البوابة, لقيت عشان أجري ناحية عم سيد أحكيه لقيته واقف ورايا على طول, اتخضيت أكثر وضربات قلبي زادت. وقولتله بصوت منقطع شوفت.. شوفت اللي خرج دلوقتي؟ قالي تعالا عاوزك

دخلت أنا وهو أوضه صغيرة بابها مكسر وفيها فتحة شباك من غير شباك وأنا مفيش على لساني غير شوفت.. شوفت اللي أنا شوفته وهو يقولي بس تعالا, لحد ما دخلنا الأوضة دي عم سيد قدامي وأنا وراه وبمجرد ما دخلت الباب اتقفل لوحده ولما بصيت عليه ورجعت أبص لعم سيد وشوفته بيتحول قدامه من عم سيد للهيئة بتاعة الكائن الغريب اللي شوفته عليها من دقائق لهيئة بشري من ثاني, حسيت ساعتها إني في فيلم رعب أو حلم اتمنيت أصحى منه, أكيد حلم ماهي الحاجات دي مبتحصلش غير في الأحلام

اتشكل بهيئة بشري بشعر طويل ناعم ودقن جميلة متوسطة الطول وعلى قد ما اترعبت لكن لما لف ناحيتي وشوفت ملامحه الهادية بدأ الرعب يقل أو بدأت أطمئن مع إن الموقف مفيهوش ذرة اطمئنان لكن دا اللي حسيته

ابتسملي ابتسامة جميلة وقال لي بصوت هادي بص يا معلم أحمد, أحنا اختارناك دونا عنهم كلهم لأنك أكثر واحد متعلم وملتزم فيهم وهتفهم اللي هقولهولك, هما اختاروني عشان أنا أكثر واحد هادي فيهم وعندي قدرة للإقناع بدون أذى أو ضرر

احنا عايشين هنا من قبل ما انتوا تيجوا, مش انتوا العمال لا من قبل المكان ما يتبني من الأساس ويبقى محطة مياه, بدأوا يبنوا المحطة وجن كثير مننا كانوا رافضين وقرروا يطفشوا العمال من قبل ما بيدؤوا لكن فيه جزء مننا وافق باعتبار دا حقكوا تعمروا الأرض واحنا نسكن الصحاري والكهوف كعادتنا, اتقسمنا فريقين فريق راضي وفريق رافض وفضلنا على الحال دا لحد ما المحطة اتبنت واشتغلت, ساعتها الزحمة زادت زيادة عن اللزوم لدرجة أن مجموعة من اللي كانوا موافقين على عمار المكان انضموا للي كانوا رافضين ومن ساعتها بدؤوا يعملوا مقالب ومواقف مرعبة مع الغفير والعمال اللي بيشتغلوا فترة ليلية, ولما العمال اتكلموا والكلام زاد راحت الشركة بدلتهم واللي كان شغال بالنهار اشتغل بالليل والعكس, احنا كمان استمرينا في المقالب بدون ما نأذي حد, الكلام زاد أكثر من اللازم والعمال بقت تخاف تيجي الشغل وتعمل غيابات لحد ما الشركة سابت الموقع وفضل مهجور لحد ما جات شركة ثاني وقررت إعادة تشغيله من جديد, وقتها عرفنا واتضايقنا وفررنا نعيد اللي عملناه معاكوا لكن فيه كام جني من أكابرننا في السن وأكثرنا عقل وحكمة قالولنا نعمل معاكوا صفقة, انتوا تشتغلوا وتاخذوا راحتكوا فترة النهار كلها لحد المغرب واحنا ناخذ فترة الليل ومحدث فيكوا ينزل من المبيت طول فترة الليل غير للحمام أو للضرورة القصوى وإلا هيتأذي ويشوف اللي عمره ما شافه, احنا الأول كنا مراعيين انكوا مش عارفين حاجه مع إن كل واحد من اللي معاك حصل معاه موقف عشان يعرف لكنه رفض يقول لباقيين, كمان قبل ما امشي عاوز

أعرفك حابه.. سكت شويه وقال فيه جزء قليل جدا مننا رافضين وجودكوا في المكان ومش مقتنعين بالرأي دا وجايز يعملوا مواقف معاكوا لكن متقلقوش هحاول نفتحهم ونعيش كلنا في المكان وعشان أثبتلك حسن نيتي هسيبك في سلام وهخرج من الشباك زي أي بني آدم بيخرج خرج من الشباك وفي نفس اللحظة الباب اتفتح بنفس الهدوء اللي اتقل بيه وأنا ما شدة الخوف جريت عشان أخرج وطلعت أصرخ وكلهم اتجمعوا حواليا وحكيتهم اللي حصل وعرفنا من بعضنا كل المواقف اللي حصلت مع كل واحد فينا وكلما المهندس وهيجي ياخذنا الصبح عشان محدش فينا وافق يشتغل في المكان دا

محدش فينا حكى عن الرعب اللي حصل معاه في المكان دا لحد ما واجهتهم أنا بعد الموقف اللي حصل معايا والحمد لله انه عدى على خير

صحيت اليوم دا بعد الظهر وكان الكل صاحي وباين الهم والغم على ملامحهم كأن كل واحد فيهم مخبي سر جواه وأنا عشان مبحبش أسأل عن اللي مليش فيه مسألتهمش, اتغدينا ونزلنا الشغل اللي اتوزع علينا وكان عبارة عن تكسير كل الأبنية اللي موجودة عشان نعيد بناءها من تاني لما عددنا يزيد وييجي باقي العمال والصناعية, ولأني أنا وعم سيد كنا قريبين من بعض اخترنا مبنى ورحنا نكسر فيه, عم سيد حكالي عن الحلم بتاعه أثناء الشغل زي ما يكون بيفضفض عشان يرتاح أو يلاقي تفسير للحلم دا مع إنه عارف إنني مليش في التفسير, لكن أنا ريحته وقولتله طالما مكانش قبل الفجر يبقى كابوس عادي وممكن من تغيير مكان نومك زي ما بنسمع يعني

بعد ما اشتغلنا شويه حلوين لقيته ساب الشغل وقال هروح أجيب مياه, حلفت إنني أروح أنا من باب الذوق طبعا ورحت المبيت, لكن قبل ما اوصل هناك لقيت كائن غريب عمري ما شفت شبيه له حتى في الحيوانات, طويل حوالي مترين وأكثر لونه رمادي ورجليه طويله أطول من نصه الفوقاني وضهره منحني لقدام وإيده واصله لحد تحت ركبته وكان من غير هدوم, وقفت مكاني من الصدمة زي ما تكون جليا اثبتتوا في الأرض, ضربات قلبي زادت وريقي نشف وأنا مش عارف أتصرف إزاي وفضلت متابعه بعيني لحد ما خرج من البوابة, لفيت عشان أجري ناحية عم سيد أحكيه لقيته واقف ورايا على طول, اتخضيت أكثر وضربات قلبي زادت. وقولتله بصوت متقطع شوفت.. شوفت اللي خرج دلوقتي؟ قالي تعالا عاوزك

دخلت أنا وهو أوضه صغيرة بابها مكسر وفيها فتحة شباك من غير شباك وأنا مفيش على لساني غير شوفت.. شوفت اللي أنا شوفته وهو يقولي بس تعالا, لحد ما دخلنا الأوضة دي عم سيد قدامي وأنا وراه وبمجرد ما دخلت الباب اتقفل لوحده ولما بصيت عليه ورجعت أبص لعم سيد وشوفته بيتحول قدامي من عم سيد للهيئة بتاعة الكائن الغريب اللي شوفته عليها من دقائق لهيئة بشري من ثاني, حسيت ساعتها إني في فيلم رعب أو حلم اتمنيت أصحى منه, أكيد حلم ماهي الحاجات دي مبتحصلش غير في الأحلام

اتشكل بهيئة بشري بشعر طويل ناعم ودقن جميلة متوسطة الطول وعلى قد ما اترعبت لكن لما لف ناحيتي وشوفت ملامحه الهادية بدأ الرعب يقل أو بدأت أطمئن مع إن الموقف مفيهوش ذرة اطمينان لكن دا اللي حسيته

ابتسملي ابتسامة جميلة وقال لي بصوت هادي بص يا معلم أحمد, أحنا اختارناك دونا عنهم كلهم لأنك أكثر واحد متعلم وملتزم فيهم وهتفهم اللي هقولهولك, هما اختاروني عشان أنا أكثر واحد هادي فيهم وعندي قدرة للإقناع بدون أذى أو ضرر

احنا عايشين هنا من قبل ما انتوا تيجوا, مش انتوا العمال لا من قبل المكان ما يتبني من الأساس ويبقى محطة مياه, بدأوا يبنوا المحطة وجن كثير مننا كانوا رافضين وقرروا يطفشوا العمال من قبل ما بيدؤوا لكن فيه جزء مننا وافق باعتبار دا حقكوا تعمروا الأرض واحنا نسكن الصحاري والكهوف كعادتنا, اتقسمنا فريقين فريق راضي وفريق رافض وفضلنا على الحال دا لحد ما المحطة اتبنت واشتغلت, ساعتها الزحمة زادت زيادة عن اللزوم لدرجة أن مجموعة من اللي كانوا موافقين على عمار المكان انضموا للي كانوا رافضين ومن ساعتها بدؤوا يعملوا مقالب ومواقف مرعبة مع الغفير والعمال اللي بيشتغلوا فترة ليلية, ولما العمال اتكلموا والكلام زاد راحت الشركة بدلتهم واللي كان شغال بالنهار اشتغل بالليل والعكس, احنا كمان استمرينا في المقالب بدون ما نأذي حد, الكلام زاد أكثر من اللازم والعمال بقت تخاف تيجي الشغل وتعمل غيابات لحد ما الشركة سابت الموقع وفضل مهجور لحد ما جات شركة ثاني وقررت إعادة تشغيله من جديد, وقتها عرفنا واتضايقنا وفررنا نعيد اللي عملناه معاكوا لكن فيه كام جني من أكابرنا في السن وأكثرنا عقل وحكمة قالولنا نعمل معاكوا صفقة, انتوا تشتغلوا وتاخذوا راحتكوا فترة النهار كلها لحد المغرب واحنا ناخذ فترة الليل ومحدث فيكوا ينزل من المبيت طول فترة الليل غير للحمام أو للضرورة القصوى وإلا هيتأذي ويشوف اللي عمره ما شافه, احنا الأول كنا مراعيين انكوا مش عارفين حاجه مع إن كل واحد من اللي معاك حصل معاه موقف عشان يعرف لكنه رفض يقول لباقيين, كمان قبل ما امشي عاوز

أعرفك حابه.. سكت شويه وقال فيه جزء قليل جدا مننا رافضين وجودكوا في المكان ومش مقتنعين بالرأي دا وجايز يعملوا مواقف معاكوا لكن متقلقوش هنعامل نقتنعهم ونعيش كلنا في المكان وعشان أثبتلك حسن نيتي هسيبك في سلام وهخرج من الشباك زي أي بني آدم بيخرج
خرج من الشباك وفي نفس اللحظة الباب اتفتح بنفس الهدوء اللي اتقبل بيه وأنا ما شدة الخوف
جريت عشان أخرج وطلعت أصرخ وكلهم اتجمعوا حواليا وحكيتلهم اللي حصل وعرفنا من بعضنا كل المواقف اللي حصلت مع كل واحد فينا وكلمنا المهندس وهيجي ياخذنا الصبح
عشان محدش فينا وافق يشتغل في المكان دا

انتهت

في الجيش

عرفت إن سعيد عنده حالة مس بمجرد ما الشاويش عبد الحميد قالنا خلوه محبوس في المخزن لحد ما احي ومحدث يفتحله, وأنا هكلم الشيخ إبراهيم أو أجيبه معايا وأنا راجع بالليل

طبعا السرية كلها اتقلبت, وكل العساكر بتسأل إيه اللي حصل والخبر انتشر والكل بقى مستني ومترقب اللي هيحصل, خصوصا إن كان بين كل ساعة والثانية نسمع صوت كرايب بتتحرك في المخزن, وحاجات بتتكسر وحاجات كأنها بتوقع من مكان عالي, ومحدث كان يجرو حتى يقرب من المخزن

سمعنا صوت عربية وقفت قدام بوابة السرية ولما عسكري الأمن فتح لقينا الشاويش عبد الحميد ومعاها واحد تاني ميبانش عليه إنه شيخ غير من السبحة اللي ماسكها في إيدته, لا لابس جلبية قصيرة ولا دفنة طويلة ولا هدومه قديمة زي ما بنشوف في الأفلام ولا أي حاجة, راجل ضخم ظاهرة عليه علامات الصحة وواضح كمان من لبسه إنه ميسور الحال, ملامحه هادية وعنيه مبتتحركش كثير ودايما باصص قدامه, تابعتهم بعنيا بعد ما الشاويش رمى شنتته في غرفة الأفراد اللي جمب بوابة السرية, الشيخ ماشي هادي ثابت عكس الشاويش اللي كان واضح من مشيته إنه متوتر وخايف, عذرتة طبعا عشان المسؤولية

عسكري الأمن كان ماشي جمبهم لكنه متأخر عنهم بخطوة, واضح عليه هو كمان الخوف, ويمكن كان خايف أكثر منهم ولولا إن هو اللي معاه مفتاح المخزن مكانش راح معاهم من الأساس

وقفوا الثلاثة عند المخزن بعدها اتكلم الشاويش مع العسكري مش عارف قاله إيه لكن واضح إنه زعق فيه, بعد العسكري سابهم وجي ناحيتنا وهو بيمشي بسرعة لكن بعد كام متر الشاويش نادى عليه فرجع والشاويش هو اللي جي ناحيتنا, كلنا طبعا باصين عليه لإن تقريبا السرية كلها كانت منتظرة اللحظة دي ومستتية اللي هيحصل, ولما وقف قصادنا قالنا عاوز أربعة خمسة يكونوا صعايدة أو يكونوا ميخافوش

فضلنا متتحين ثواني من غير رد راح الشاويش قال تعالا يا أحمد, حسين, يونس, وانت يا على, مش عارف إن كان من حسن حظي ولا من سوءه إنه اختارني من ضمنهم, هل عشان هشوف حاجه عمري ما شوفتها ولا خوفي من اللي هيحصل لا قدر الله

مشينا كلنا مع الشاويش لحد ما وصلنا للمخزن وبعدها الشاويش قال لعسكري الأمن افتح القفل دا, وقبل ما يفتح القفل, الشيخ وقفه بإشارة من إيده وبصلنا وقال بمجرد ما تدخلوا مش عاوز منكوا غير إنكوا تمسكوه وتثبتوه سواء على الأرض أو على السرير, ومحدث يخاف لإن مفيش حاجة هتحصل إن شاء الله بس كل اللي عاوزه منكوا إنكم تثبتوه وبس

كلامه ريحنا شويه وبعدها عسكري الأمن فتح الباب ودخل الشيخ قدامنا ودخلنا احنا الأربعة والشاويش مع بعض, عسكري الأمن مد إيده لمفتاح النور اللي جمب الباب وبمجرد ما فتحه شوفنا سعيد قاعد على سرير مكسور بكل هدوء, مد عينا ناحيتنا وكان واضح عليه زي ما يكون خف ومعدوش حاجة, لكن بمجرد ما عينه جات على الشيخ راح اتحول فجأة ووقف بسرعة وجري عليه كأنه عاوز يقتله

الشيخ متحركش من مكانه, احنا اللي جرينا على سعيد وحاولنا نمسكه, تثبته مره ويهرب مننا مرتين لحد ما قدرنا تثبته بعد ما كل واحد فينا خدله على الأقل خمس ست دكومات منه, بصينا للشيخ وسألناه بعيننا نعمل إيه تاني, راح قالنا ثبتوه على الأرض وكل واحد يمسكوا من ناحية

عملنا كدا وكل واحد كان ماسكه من ناحية, اتنين من إيده واتنين من رجله وهو بيحاول يقاوم من غير فايذة, وشه كان لونه أحمر وعروق رقبته وجبينه نافرين, حسيت بالخوف لما شفته بكمية الغضب دي لأنه أكيد لو قلت مننا ممكن يقتل واحد فينا, خصوصا احنا الأربعة اللي مثبتينه

التفت للشيخ لقيته بيتتم وبدأ يمشي إيده على راس سعيد والتاني بيتحرك أكثر لغاية ما الرعب الحقيقي بدأ, وسمعت صوت غير صوت سعيد بيتكلم بلغة عربية فصحي أو خليجية مش عارف, لكنها مكانتش مصرية ولا تمت لها بصلة

بدأ يقول

ماذا دهالك يا شيخ إبراهيم, أصبحت ضعيفا إلى هذا الحد؟-

الشيخ مردش عليه وفضل يتمتم بصوت واطي.. راح قاله

أهكذا تعاملون جيرانكم؟ أنا لن أمسه بسوء-

..الشيخ على نفس الحالة لكنه قرب من وذن سعيد اللي قال

..أنا مسلم مثلي مثلكم لماذا تفعلون ذلك, أقسم أني سأنتقم منكم-

...الشيخ على نفس الحالة

بدأ الصوت يصرخ

حسنا حسنا سأقول الحقيقة, لم أكن مسلما والآن أسلمت, أشهد أن لا إله إلا الله, أشهد أن لا إله -
.. إلا الله

وراح يكررها كذا مرة لكن الشيخ برضو مسابوش, وظهرت على وشه ابتسامة ساخرة فعرفت
..إن اللي بيتكلم مأسلمش ولا حاجة ودي وسيلة بس عشان نسييه

الشيخ مد إيده في جيبه وطلع حاجة صغيرة ملفوفة بقماشه لونها أبيض متسخ شوية, ولما فك
القماشة شفت خاتم أصفر قديم وقال لواحد من اللي ماسكين إيده قربلي إيده, وراح ملبسه الخاتم
..وقالنا بس سيبوه

بصينا لبعض وبعدين بصيناله اللي هو بجد نسييه؟ راح كررها تاني بنبرة هادية وبالفعل سبناه

حركة سعيد هديت خالص وشبه نام أو دخل في غيبوبة, والشيخ خد الشاويش على جمب
واتكلم معاه شوية وطلب من واحد فينا يروح يجيبه مياه وبعد دقائق خد الخاتم وحطه في نفس
القماشة اللي خرجه منها ومسك المياه رش منها علي إيده ومسح على راس سعيد وطلب منا
نساعده يقومه شويه وبدأ يطبطب على خدوده لحد ما صحي وشربه مياه وسعيد رجع زي
الأول كأن مفيش حاجه حصلت لكن كان واضح عليه الخضه ووشه بقى اسمر شويه لكن بعد
... كام يوم بدأ يرجع زي الأول ولا كان حاجه حصلت

في قريتي

"مجموعة حكايات حقيقية"

الحكاية الأولى: مواقف يرويها أحد الأشخاص..

الكلام دا حصل في 2013 تقريبا وتحديدا في أيام الحصيد, وزى مانتوا عارفين الحصيد بيبدأ من بالليل عشان لما الصبح بيصبح بيكون الجو حر وناموس, فالناس بتشتغل في الحصيد بالليل وتمشي الصبح, المهم في ليلة كنا بنحصد والأنفار هناك وأبويا اتصل بيا حوالي الساعة اتنين بالليل عشان أوديله طلب كدا وطبعا عشان الحماره معاه فانا أخذت الطريق مشي

بعد ما خلصت البيوت وبدأت أمشي في الزرع حسيت بشئ من الخوف ودا طبيعي, مفيش إنارة وبين كل عامود والثاني مسافة ومحدش ماشي على الطريق غيري, يعني لو طلعتي ديب أو كلب صعيران أو حرامي مثلا مش هعرف أروح فين ولا أعمل إيه وهكون فريسة سهلة, بس ياريت كان طلعتي ديب ولا أسد حتى ومشوفتش اللي شوفته في الليلية دي

عند مكنة فلان وبدون داعي لذكر أسماء شوفت ثلاثه قاعدين جمب المكنة بيتكلموا مع بعض بصوت عالي بس مش مفسر منه حاجه, اطمنت أهو لقيت حد يونسني والناس المزارعين فاهمين قصدي يعني مثلا لو واحد بيسقي وواحد تاني بيسقي بعيد عنه بكذا فدان بيكونوا متونسين ببعض, المهم اتونست بيهم وقولت في بالي اهو همشي ربع ساعة كمان وأنا مطمئن بيهم وكدا, لما وصلت عندهم قولت السلام عليكم وكملت مشي بس محدش فيهم رد السلام, بعد لحظات سمعت صوت خشن ومرعب بيقول " متعديش من هنا تاني " وقبل ما ابص عليهم استفسر عن الجملة اللي اتقالتلي دي لقيت طوب بيتحدف عليا وسمعت صوت رجليهم بتتحرك ناحيتي

مكنتش فاكرهم عفاريت, كنت هلف ناحيتهم اتخانق أو اشتم وفجأة جسمي كله اتثبت في

الأرض, لا عارف أبص ورايا ولا أتحرك لقدام, ورجلي ثقلت كأن وزن كل رجل 100 كيلو, عرفت اللي فيها وبصعوبة ومعافرة رجلي اتفكت وواحدة واحدة جريت بأقصى سرعتي ولما وقفت بعد شوية جري حلوين عشان آخذ نفسي ونبضات قلبي تهدي شويه شوفت راجل راكب حمارة وواقف في أول غيط كدا وواقف جمبه كلب, اطمنت شويه ومشيت بسرعة ناحيته لكن حصلت حاجة غريبة, كل ما اتقدم ناحيته الأقيه بيرجع لورا, مكانش بيتحرك بالعكس كان ثابت بس بيرجع لورا ويبعد عني يعني كأني مبمشيش, بصيت ورايا لقيتني دخلت في الغيط لحد نصه تقريبا ولسه موصلتش, لفيت راسي ناحية الراجل لقيته اتحول للثلاث عفاريت اللي قابلوني من شوية, تقريبا واحد فيهم اتحول لحمارة والثاني لكلب والثالث هو اللي كان راكب الحمارة, حدفوني بالطوب وجريوا ورايا وهما بيضحكوا ويتريقوا عليا بضحكاتهم المربعة. وسمعت الصوت بيقولي عشان متاجيش هنا تاني... والباقي مش لازم يتحكي

القصة الثانية

كان فيه واحد قريبي مولع في أمينة, وأنا وأصحابي وقرابيننا الشباب كنا متجمعين عنده بالليل, نسهر معاه ونشرب شاي ونحكي ونهزر واللييلة كانت حلوة, لحد ما واحد فينا قال الواحد نفسه في قناديل والله, رد عليه واحد قاله مش أوانها دلوقتي لسه فاضل عليها شويه, رحتم قتلته لا, فلان الفلاني قريبيننا زارع شامي حكومي يعني ممكن نلاقي عنده قناديل على الأقل تنفع تتشوي وتتاكل, أه هي صغيرة بس تقضي الغرض يعني

كل اللي قاعدين وافقوا على فكرتي واتصلنا بقريبيننا نسأله عن القناديل وكدا قالنا أه هتلاقوا قناديل تتاكل هناك بس ابقوا طلعوا القنديل بالبوصة بتاعته, قولنا له ماشي.. وقتها كنا عشر أشخاص, اتنين مننا تطوعوا يروحوا يجيبوا قناديل, كنت أنا عشان صاحب الفكرة وواحد ... قريبي عشان كان معاه موتسيكل وياريتنا ما رحنا

ركنا الموتسيكل في أول الغيط ونزلنا احنا الاتنين, كانت معانا شواله بيضه صغيرة عشان نعبي فيها القناديل وكدا, واتفقنا كل واحد يروح مثلا ينقي خمس ست قناديل ينفعوا يتاكلوا عشان زي ما قولنا كونا مكانش الموسم بتاعها وكل واحد فينا راح في ناحية عشان يدور على أكبر قنديل.

القمر كان منور الحرجه كلها ومفيش داعي لكشاف التليفون, وأنا كنت باصص لتحت شويه
عشان أنقي القنديل الكبير وكدا, لفيت شويه وجمعت قنديلين تلاته وفجأة برفع عيني لقيت واحد
واقف في وشي بينه وبينه كدا أقل من متر, كان باصص في عيني وساكت ومفيش أي تعبير
على وشه, جلابيته مقطوعة وملامحه مشوفتهاش في البلد قبل كدا, جسمي اتنفض طبعا
وضربات قلبي زادت وشعر راسي وقف ومن غير مناطق بكلمة طلعت جري على صاحبي,
جريت عليه وأنا بنادي باسمه ولما رد عليا رحت ناحية الصوت لحد ما خبط فيه ووقعنا احنا
اللاتين على الأرض.

أتاري العفريت طلع لصاحبي قبلي ومرضيش يقولي عشان مخافش وعشان قلبه جامد عني
لكن لما شافني بجري عليه بالخوف دا خاف هو كمان وقيل ما حد فينا يتكلم شوفناه واقف
قصادنا بيضحك ضحكة ترعب أجدعها شنب فيكي يا بلد.. ايدينا ورجلينا اتكتفوا ومكناش
عارفين نتحرك وأنا من شدة الخوف حسيت إن ممكن تجيلي جلطة أو اقع على الأرض أو
قلبي ينفجر من سرعة النبض, راح صاحبي قال بصوت عالي " والله لو مسبتناش لاضربك
بالنار " سمعت بعدها صوت مرعب جدا بيقول بغضب " لو كنت راجل اعملها " وفجأة
الشامي بقى يتكسر من حوالينا كأن فيه جمل أو حيوان ضخم بيجري وسط الشامي, وانا
وصاحبي طلعا نجري ناحية الموتسيكل وورانا حد بيجري والقناديل كلها وقعت مننا وبمجرد
ما وصلنا للموتسيكل شغلنا بسرعة وفي نفس واحد كنا عند الأمانة

الحمد لله إن اصحابنا مشافوش الخوف في ملامحنا عشان الدنيا كانت ليل طبعا ولما سألونا
عن القناديل قلناهم القناديل كلها صغيرة ومينفعش تتاكل بس بعد كام يوم حكيئناهم الحكاية
وبقوا يحفلوا ويطريقوا علينا لحد دلوقتي

القصة الثالثة

الكلام دا حصل من حوالي 10 سنين في موسم الصيد, بعد ما خلصنا دريس كنت أنا وواحد
صاحبي وابن عمه رايعين نعبي التبن حوالي الساعة تسعة بالليل كدا وكل واحد فينا معاه
حمارته, المهم عبينا التلايس وكل واحد حط تليس فوق الحماره وركب فوقها, ابن عم
صاحبي دا رفعنا تليسته وركب واتحرك قبلنا واتحرك, وأنا وصاحبي رفعنا لبعض بس أنا
ركبت قبله واتحركت وهو لم شوية حاجات وركب بعدي واتحرك

عند الباطه كدا في مكان معين لقيت الحمامة اللي أنا راكبها وقفت مرة واحدة زي المسمار,
وطبعا بسبب رد الفعل المفاجئ بتاعها لقيت نفسي اتزحقت من فوق التليس ووقعت على
الأرض والتليس وقعت فوقي, الموضوع كان عادي يعني فنفضت هدومي واستنيت صاحبي
اللي جاي ورايا عشان يبقى يرفعلي التليس, أول ما جي قتلته انزل ارفعلي وبالفعل نزل
ورفعنا التليس وركبت فوقها ويادوب اتحركت مترين سمعت صوت صاحبي وقع على
الأرض هو والحمامة والتليس بتاعته وفي نفس الثانية اللي شوفته فيها رحت أنا كمان واقع
بالحمامة بالتليس بتاعتي, نزلنا ورفعنا لبعض ونركب شويه ونوقع تاني لحد ما اتكررت ثلاث
اربع مرات, فجأة صاحبي قالي فيه ظل بيتحرك حوالينا, أنا كنت مشغول في التبن والحمير
ومواخدش بالي من الظل دا راح صاحبي قالي بص بقولك فيه حاجه بتتحرك حوالينا, بصيت
ناحية المكان اللي ببشاورلي عليه شوفت ظل كبير كدا ملوش ملامح لا إيدين ولا رجلين,
وبعدھا سمعنا حد بيضحك بصوت عالي والطوب بيتحذف علينا, الحمير خافت وجريت واحنا
اترعبنا وجرينا ورا الحمير ومأخذناش نفسنا غير لما وصلنا أول البلد

الحكاية الثانية:

في البلد لما حد بيموت, شباب العيلة بتتجمع أول ناس وقبل حتى ما الميت بيندفن ويروحوا يفتحوا المنذرة بتاعتهم, بينضفوها ويرشوها ويجيبوا دكك لو عندهم نقص فيها, ويفرشوا وكدا عشان لما الصوان يبجي بيتنصب على نضافة, المهم الشباب دول فيه منهم اللي ببيات في العزا وفيه منهم اللي بيرجع ينام في البيت وييجي ثاني يوم الصبح, بس الأغلبية ببياتوا في العزا وبيعتبروها فرصة عشان اتجمعوا كلهم مع بعض, وتقريبا بيناموا آخر ناس, بيسهروا يحكوا في حاجات كتير منها حكايات العفاريت, واللي هحكيها لكوا النهارده قصة حقيقية حصلت مع واحد من البلد وطلب مني أنزلها بدون ذكر اسمه أو اسم المنذرة اللي حصلت فيها القصة دي.

كنا سهرانين بالليل بنتكلم في مواضيع كتير أنا وقرابيبي, الكلام دا كان ثاني يوم العزا يعني بكرة آخر يوم, فقولنا نسهر شويه حلوين عشان مش هنبات مع بعض ثاني, الكلام جاب بعضه لحد ما اتكلمنا عن العفاريت, والعفاريت اللي في المنذرة بتاعتنا والقصص والحواديت المشهورة بيها, أنا طبعا مش مقتنع بحوار العفاريت دا وكنت الوحيد فيهم, حاولوا يقنعوني بكل الطرق ومفيش فايده, وقتها كنا نايمين على الكنب بره المنذرة وآخر ما زهقوا مني واحد فيهم قالي أنت مش مصدق حكايات العفاريت دي؟ طب لو راجل أدخل بات فيها لوحدهك, أنت لو بتفهم أساسا كنت صدقت من نفسك, مش شايف كل الناس نايمه بره ومفيش ولا واحد دخل ينام فيها؟

كلمة لو راجل أدخل دي عصبتني بصراحة, أخذتني الجلالة وقتلتهم طب إيه رأيكوا هدخل أنام فيها لوحدي عشان أثبتلكوا إن مفيش حاجه اسمها عفاريت, الكلام دا كان زمان إنما دلوقتي الدنيا اتطورت والحكايات دي جايز تكون تهيئات من الناس القديمة عشان كانوا عايشين في الضلمة على لمبات الجاز, المهم أخذت كليم ومخده والكوفرتة بتاعتي اللي بتغطي بيها. ودخلت.

المنذرة ضلّمة كحلّ ومش شايّف فيها أيّ حاجه, منظرها مخيف شويه ويمكن عشان مخي فكر في الحاجات اللي سمعتها عنها, حاولت أفتح النور لكن للأسف اكتشفت إن اللي ركب توصيلات الكهرا بتاعة الميكروفون والسماعات ربطها بالإضاءة يعني لو فتحت النور كل حاجه هتشتغل والناس هتقول فيه إيه.

مكدبش عليكوأ خوفت شويه من فكرة إني أبات فيها لوحدي في الضلّمة دي, لكن لو خرجت نمت معاهم بره شكلي هيبقى وحش جدا وهيقولوا أنت مقعدتش فيها دقيقة حتى, قوّيت قلبي ونورت بكشاف الموبايل وفرشت الكليم على أقرب كنبه جنب الباب ونمت عليها, كنت بحاول أشغل مخي بأيّ موضوع غير العفاريّ والرعب عشان أعرف أنام.

وزي ما بيقولوا الخوف بيطرّد النوم, فضلت صاحي مش جايلي نوم, وتقريباً كلهم ناموا بره, لإني كنت سمعت عمي بيزعق فيهم قبلها وقال ناموا عشان بكرة آخر يوم ولازم تصحوا بدري عشان فيه ناس غريبة هتيجي.

بعد شويه حسيت بحركة كدا عند رجلي, اتنفضت من الخلعة ومسكت التليفون شغلت الكشاف لقيته قط أسود بعيون صفره بيتمسح فيا, من كتر الخلعة اللي ادهالي رحت ضاربه برجلي وأنا بشتمه راح نزل ودخل تحت الكنبه. طفيت الكشاف ويادوب حطيت راسي على المخدة راحت الكنبه مرفوعة بيا بييجي مترين, وراحت تتحرك في المنذرة يمين وشمال وأنا نايم فوقها مش عارف أعمل إيه, فكرت أنط منها وأجري لكن من كتر الخوف بقيت نايم نص نومه ومعرفتش أتصرف إزاي, حاولت أصرخ وأنادي على الناس لكن صوتي اتكتم ولساني اتربط ومفيش فايده, فضلت على الحال دا شويه لحد ما كنت هعملها على نفسي من كتر الخوف والرعب, وفجأة لقيت الكنبه بطلت تتحرك وبهدوء كدا رجعت مكانها الأولاني, وببص حواليا لقيت قرايبي كلهم متجمعين جمبي, سألتهم فيه إيه؟ قالولي انهم سمعوني بصرخ وصحيوا على صوتي.

الموقف دا مش عارف إذا كان حلم ولا حقيقي, لكني متأكد إنه حقيقي عشان أنا مش فاكّر إني نمت.

الحكاية الثالثة:

الموقف اللي هحكيه دا استحالة يتمحي من ذاكرتي على الرغم من مرور اكثر من سبع سنين لكن هفضل فاكره لأنه كمان مصاحب لذكرى أليمة جدا ، ذكرى وفاة عمي الله يرحمه . مش هتكلم في تفاصيل الدفن والجنزة لأنها مش من تفاصيل الموقف دا . عندنا في الصعيد فيه حاجه اسمها المندره أو الخيمة وتتكون عبارة عن مبنى خاص بالعائلات كل عيلة ليها مبنى منفرد بيتم فيها نصب الصوان أثناء المآتم ونادراً لما يتم فيها عقد قران وكأنها مخصصة لليالي الحزن فقط .

بعد ما خلصنا الدفن ونصبنا الصوان دا بعد ما نضفنا المندره طبعا وفرشنا الكنب وما يلزم كان العشاء أذن وعدى عليه وقت كبير كمان كانت عدومنا أنا وباقي شباب العيلة اتعقرت بالتراب واللي بقاياه كانت واضحة على رؤوسنا فقررت ارجع البيت عشان أغير هدومي واستأذنت من ابويا في اني هغيب شويه ولما قتلته على السبب رفض وقالي مش وقته دلوقتي خليك معانا في العزاء عشان في ناس غريبة ممكن تيجي ولازم تكون في استقبالهم معانا .وبالفعل فضلت متواجد لحد ما آخر فوج مشي

أصحاب العزاء بيفضلوا موجودين دايمًا عشان كذا كل واحد منا ظبط كنبه للنوم عليها في نفس مكان الصوان عشان يستقبلوا الناس اللي هتيجي بدري وأنا قررت بعد ما الكل ينام وخصوصا ابويا ارجع البيت أغير هدومي عشان مينفعش أستقبل الناس اللي هتيجي بكرة بالجلابيه اللي كنت لابسها . نسيت اعرفكوا إني ساكن في قرية من قرى محافظة قنا . المهم فيه طريقين يوصلوني للبيت واحد منهم أسفلت ودا هياخد مني حوالي تلت ساعة أو أكثر والطريق الثاني زراعي يدوب عشر دقائق وأكون في البيت وطبعا رفض ابويا خلاني أختار الطريق الزراعي عشان اعرف اروح وأرجع بسرعة قبل ما يكتشف غيابي ، وعشان تتخيلوا معايا الموقف هو طريق ترابي على جانبيه ترعة من ناحية وأرض زراعية من الناحية الثانية وفيه سكة حديد هعدي عليها وجمب السكة دي في كولدير مياه شوفته بالصدفه واللي فكرني .بعطشي وقررت اشرب منه

الكولدير من بعيد كان واضح ان فيه حد عطشان زي وبيشرب منه وكانت جمبه عربية كارو
بيجرها حمار ، قربت من الكولدير وقلت السلام عليكم لكن الراجل فضل مديني ضهره
ومردش عليا السلام ، ماخذتش في بالي ومديت إيدي عشان أشرب والراجل بيديني ضهره
وبيلف معايا كأنه بيتحاشاني وفضل مديني ضهره لحد ما شربت وكملت طريقي . بصراحة
مفكرتش في الموضوع لأن موت عمي كان شاغلني وقتها وفجأة وبدون سابق إنذار سمعت
صرخة في حياتي ما سمعت مثيل ليها ، صرخة خوف صرخة فزع المهم كانت صرخة مخيفة
جدا للي سمعها فما بالكم بصاحب الصرخة نفسها بصيت ورايا بعد ما اتملكني الخوف وشوفت
الراجل دا راكب عربيته وبيجري ناحيتي كأني فريسة بيحاول صيدها قبل ما تهرب منه
وتفوفته الفرصة ، منظر الحمار الضخم من بعيد كان مفزع والخوف وعنصر المفاجأة خلوني
أهرب من غير سبب وفضلت اجري لحد ما وصلت البيت والحمد لله محدش شافني وانا في
الحالة دي فضلت اجري حتى بعد ما صوت الحمار والعربية اختفوا ، وصلت البيت على آخر
نفس فيا وضربات قلبي كانت وصلت لكامل سرعتها ، غيرت هدمي بسرعة ورجعت المندره
بس من طريق الأسفلت ولما شوفت ابن عمي تاني يوم الصيح حكيتله راح قايلي باستغراب
هو طلعلك ؟ قتلته مين ؟ قالي سيد الله يرحمه مات من زمان في حادثة قطر وهو راجع من
الصيد بعربيته وناس كتير بتقول انهم شافوه وبيطلعلهم في نفس الهيئة اللي أنت وصفتها لي
دي.

أعمال أخرى للكاتب:

- داخل مقبرة الفرعون "رواية"

- قصتي معهم "مجموعة قصصية إلكترونية"

- القصص "رواية"

انتهت

15 رمضان 1446 هـ

جمال الحفني